

UGÁNU BUÍTI LE LABŪRŪJABEI LÚCAS LUÁGU JESÚSU

Labūrūjani Lúcas lé meja asúseredubei

1 ¹Lun Teófilo le weírigubei. Gíbeeña gürígia oúchutiña jabūrūjani cátei lé buri luáguti wasálbarun lé meja asúseredubei wagánagua lídan lúaragun, ²áfaaguatiña jabūrūjani ítara quei jarúfudajani ja aríjbalin buri cátei ligía lúmagiñe lagúmeserun, apúrichija jagía luágu, woun. ³Au gíñe, álügüdajaadina gíñe buídu buídu libúgürü sun cátei le asúseredubei lúmagiñe lagúmeserun, áni affñetina luágu maríban lan lun nabūrūjanun gárada to bun quei lubúdubu, ⁴subúdi bámugei linárün cátei le arúfudúaalibei bun buídu buídu. Niján le asúseredubei.

Lasúbudiragüdüni ában ánjeli luáguti lagúriajóun Juan le abásteragüdajabei

⁵Dán meja le Heródes lan urúeibei Judéa, ñíñein meja ában fádiri lánina jaffñen juríu, gíriri Zacarías, jádaangiñeti fádirigu ja lánigu Abías. Elisabét tíribei lúmari, jádaangiñetu gíñe ladúgawagun Aarón. ⁶Biángubei jagía, richáguatiña ligíbugiñe Búngiu, gúnfulitiña luma, adúga jameí sun le lubeíbei darí lun siñá lan laríñawagún ni cáta wuríbati jawágu. ⁷Masáanigutiña ladúga siñá lan tagáragüdüni Elisabét, áni derébugugaaña gíñe jagía biángubei.

⁸Luágu ában wéyu, lídan lidáani jesériwidun lánigu Zacarías quei fádirigu ligíbugiñe Búngiu, ⁹ába jabúdujan según jagáburi fádirigu juríu, lun jasúbudiruni cába lan ebélura lídoun fulásu le sándutimaabei témpulurugu águdaja cupáli ligíbugiñe Búngiu, ába láburujan luágun Zacarías. ¹⁰Sun niján lan cupáli águdajóua, añája gürígia boúgudi ayúmuragua lun Búngiu. ¹¹Ábati lasáliragun ában lání Wabúreme ánjeli lun Zacarías, rára lueígiñe loúnwenren latáru le ñí lubei cupáli. ¹²Dan le laríjini Zacarías ánjeli ligía, ába laweíridun lanígi, ába lebélorun anúfudei lídoun. ¹³Ába laríñagun ánjeli ligía lun.

—Manúfudebá, Zacarías, ladúga agáamba láali Búngiu bayúmuragun, tagáraüduba búmari ában irájü, ábame bíchuguni líri Juan. ¹⁴Tabuínchuba banígi láu ugúndani luágu, áni sarágujaba gíne agúndaarutiña láu lagúriajóun, ¹⁵ladúga weírigubei biraú ligíbugiñe Búngiu. Mátunbei diweín ni bínu, áni ñíbei Sífiri Sándu lúma lúmagiñe lubáragiñe lagúriajóun lun ladúndejani lídan sun cátei. ¹⁶Ladúgüba lun jagíribudun sarágu jádaangiñe Israelítagu lun jagáambuni Jabúngiute, ¹⁷lesériwiduba lun Búngiu láu sarágu ubáfu queí meja ladúgüni Elías. Laráansejaba lubá Jesúsu láu laráandaragüdüniña agúbüriagu jáma isáanigu, láu gíne larúfudajan joun ja magáambadibaña lun Búngiu lun júaradun lúma queísi gürígia richáguatiña. Ítara lúba laráanseruniña lubá jerésibiruni Jabúreme Jesúsu.

¹⁸Ába laríñagun Zacarías lun ánjeli ligía.

—¿Ída lubági nachoúrui cátei le? Áu táu sun númari, derébugugaadiwa.

¹⁹Ába laríñagun ánjeli ligía lun.

—Gabriel áu, áni nesériwiduña lun Búngiu, ligía oúnajabalina adímureja bun lun níchuguni ugánu buíti le bun. ²⁰Guetó, quei mafínerun bubeí luágu le naríñagubei bun, berédera merérunga, siñábei badímurejan daríme lagúriajóun biraú. Lagúnfuliruba cátei le lídan lidáani.

²¹Sun dan le, añájeti buga gürígia bougudi agúrabajei Zacarías, weírititi janígi luágu lílú témpulurugu. ²²Dan le láfuridunbei, siñá ladímurejan joun, ábati jasúbudiruni luágu salígua lan som cátei lun, témpulurugu. Ladímurejati joun láu seíni, meréngadijaali.

²³Dan le lagúmuchun dan le lúnbei lesériwidun Zacarías témpulurugu, ába lídin lúbiñoun. ²⁴Lárigiñe cátei le, ába tadágeinadun Elisabét, to lúmari, ába máfuridun tan jábiñegiñe luágu seíngü játi, teréngati túnguarügü. ²⁵“Ladúgüñein Búngiu lubuídun cátei le nun guelé lun lagídaruni nibúsigari jagíbugiñe gürígia.”

Lasúbudiragüdüni ában ánjeli luáguti lagúriajóun Jesúsu

²⁶Sísi játi lárigiñe, ába louñajani Búngiu ánjeli Gabriel lídoun ában ubúrugú lání Galiléa, gíriti Nazarét, ²⁷lun lídin bisídoun ában wúri irájügiru, gíritu María. Wúri tugúya, gadáraduñoun lúma ában wügúri gíriti José lun tamárieidun lúma, wügúri ligía, linébaanfan urúei David. ²⁸Ába lebélorun ánjeli ligía le ñíjin tubeí, ába laríñagun tun.

—¡Báfaguagüle, María! Níjein Búngiu búma, binílaadibu sügü jáu sun würiña.

²⁹Dan le tagáambuni ánjeli ligía, ába tájüchürün láu le laríñagubei, ába tálügüdagun túngua ca lan uágu labúsura tun ítara. ³⁰Ábati laríñagun ánjeli ligía tun.

—Manúfudebá María, fuleísei láadibu Búngiu, ³¹badágeinada, ábame bagúriajan ában irájü, ábame bíchuguni líri Jesúsu. ³²Weírigubei, Liraú Búngiu le ínubei lúba lagúarúniwa, áni larúeigüdübei Wabúreme Búngiu quei larúeigüdüni David, le binádu lidúje. ³³Lagúmadirubei linásiñun Israel lun sun dan, áni magúmuchadibeí lagúmadijan.

34 Ábati tarínagun María lun ánjeli ligía.

—¿Ída lubági lasúseredun cátei le, mámarigidinagu?

35 Ába larínagun ánjeli tun.

—Liábinba Sífiri Sándu buágun, ábame loúburagunibu lubáfu Búngiu.

Ligía sándubei lubei irájü le lúnbei bagúriajani, Liraú Búngiu lúba lagúarún.

36 Tiábin bidúje to Elisabét, dageínaaru gíne lau sun weíyaaru lan, tagáraüdüba ában wügúri irájü, ítara líña lubeíti, tó meja uáguboun jarínaga luágu siñá lan tagáraüdü, nñein sísi játi dageínaü tuágu. 37 Úati ni cáta siñáti lun Búngiu.

38 Ábati tarínagun María.

—Lidámun Nabúreme Búngiu nugúya, adúgalei le barínagubei náu.

Lárigiñe, ába lídin ánjeli.

Tídin María bisídoun Elisabét

39 Lídoun dan ligía, ába tídin María furése lídoun ában ubúrugu le labádinaguabei buri wúbü Judéa, 40 ába tebéllurun lúbiñoun Zacarías, ába tabúsurun tun Elisabét. 41 Dan le tagáambuni Elisabét tabúsurun, ába lánjingichagun tiraú turágeirugu, ába liábin Sífiri Sándu tuágun. 42 Ábati tarínagun láu umálali le jéreti.

—Binílaadibu Búngiu sügú jáu sun jináriñu, binílaali gíne biraú.

43 ¿Cátanañadina lun tiábin lúguchu Nabúreme bisídana? 44 Láu nagáambuni babúsurun, ába lánjingichagun niraú nurágeirugu láu ugúndani. 45 Gúndaatibu bugúya le afñerubei, luágu lagúnfuliruba lan cátei le larínagubei Wabúreme bun.

46 Ábati tarínagun María.

Rútu nuwáni uwefriguni lun Nabúreme,

47 gúndaagua tugúya nanígi luágu Búngiu le Nasálbaragüle,

48 lugúndun gudémejabujaali nun, nugúya le lidámun.

Lúmagiñe guelé, jarínaguba sun gürigia luágu fuleíseiwaadina lan,

49 ladúga adúgaali Búngiu, le Súnti Gabáfu, cátei weínamuti nun, sánduti líri.

50 Súnwandan gudémebaña lan ja inébejabúbaña lun, lun.

51 Adúgaali oúnwenbun buri cátei, adúgaali lun ni cáta jamá ja barúguabaña joúngua.

52 Gídálalaña ja gabáfubaña lídaangiñe jaweírigun, ja únabubaña, ába ladúgüniña lun weírigu jamá.

53 Já buga lamábaña, quimúlegüda lumútiña, ánjeinti ja rísibaña, míchugunti ni cáta joun.

54 Íderagua lumútiña linásiñun Israél, ja esériwidubaña lun, mabúlieidun lumúti lun gudémejabu lan,

55 queí meja lidáradun jáma binádu wagúbürigu—

Abrahám jáma ladúgawagun—lun gudémejabu lan joun lun sun dan.

56 Ába teréderun María úriüwa játi ñi, lárigiñe, ába tagíribudun jábiñoun.

Lagúriajóun Juan le abásteragüdjabei

⁵⁷Ába lagúnfulirun dan lun tagúriajan Elisabét, ába tagúriajan ában wügüri irájü. ⁵⁸Dan le jagáambun tubésinanigu jáma tidújeñu luágu lubuídun cátei le ladügübei Búngiu tun, ába jagúndaarun úara túma. ⁵⁹Luágu liwídün wéyu, ába lerésibiruni circuncisión, le liseíni luágu láni lan Búngiu irájü ligía. Buséntiña yebéti jíchuguni líri lúguchi luágu, le Zacarías, ⁶⁰ába taríñagun lúguchu.

—Uá, Juánba líri.

⁶¹Ába jaríñagun tun.

—¿Cági uágu? Úati ni ában jádaangiñe binébaanfaangu gíriti Juan.

⁶²Ába jálügüdüni lúguchi irájü láu seíni ca lan íri labúseerubei líchugun luágu. ⁶³Ába lamúriajan ában murúsun fuláansu, ába labúrüdün luágun. “Juan líribei.” Ába laweíridun janígi súngubei láu cátei le.

⁶⁴Lídan méme óra ligía, ába gayáraajaali lan ladímurejan Zacarías, ába líchugun uweíriguni lun Búngiu. ⁶⁵Ába laweíridun janígi besínagu láu cátei le, ába labájüdawagún cátei le lídan sun fulásu geyégua jáu. ⁶⁶Sun ja agáambubalin, ába jeréderun asáminara, ába jálügüdagun jámagua, jaríñaga.

—¿Cáteibeí funasan irájü le?

Ladúga biní lumútija Búngiu le tímatimaati.

Lerémujan Zacarías

⁶⁷Ába liábin Sífiri Sándu luágun Zacarías, le lúguchi irájü ligía, ába ladímurejani Zacarías dimúrei le laríñagubei Búngiu lun, ába laríñagun.

⁶⁸Buídulá ladímurejóun luágu Wabúreme le Jabúngiutebei gürígia ja Israelítagu,

ladúga ñúbinjali woun, wagía le lánigu, áni sálba láadiwa.

⁶⁹Rújali ában Asálbaragülei le gabáfuti woun jádaangiñe linébaanfaangu Davíd, lé meja esériwidubei lun.

⁷⁰Ítara líña meja laríñaguni Búngiu jádaangiñe láni profétagu ja edéregeragubaña jóungua lun, lúmagiñe meja binádu dan,

⁷¹luágu lasálbarubádiwa lan jaweí wáganiñu lúma jaweí sun ja iyéreejabúbaña woun.

⁷²Ítara líña gudémejabu lan Búngiu joun binádu wagúbürigu, arúfudaleí luágu mabúlieidagun lan lueí lidáradun le sándubei jáma.

⁷³Niján lé meja laríñagubei lun wáguchi Abrahám.

⁷⁴luágu leséfurubadíwa lan jaweí wáganiñu, lun gayáraabei lan wesériwidun lun manúfudeiga,

⁷⁵láu úarani, derégeguñu wagía woúngua lun, sun dan le wabágaridubei.

⁷⁶Áni bugúya nisáaniraü, láni Búngiu le íñubei proféta lúba bagúarúniwa, ladúga baráansejaba lubá Wabúreme,

77 subúdi lámuga úma lánina asálbaruni joun lánigu,
le áubei ferúdunawa lan jafígoun.

78 Wabúngiute, láu lísiñejabu lúma lugúdemejabu,
loúnajabei Crístu wámoun siélugiñe

79 lun larúgoundagádúidún jáu ja lídaanbaña lubúriga lúma jáu ja
luágubaña úma le ouwenibei lébeja,
lúma lun ladúndejani wapásun lídoun úma le anúgübaliwa lídoun
darángilaü.

80 Aweírideina ligíati irájü ligía, afáragadagueina gíñe lídan láni espíritu.
Ába laganoún lídan fulásu mageírawati darí lúmoun wéyu le lagúmeserun
luwádigimari lun Búngiu jagánagua lumútuniña Búngiu ja Israelítagu.

Lagúriajouíniwa Jesúsu

(Mt. 1.18-25)

2 ¹Lídoun buga dan ligía, ába laríñagun urúei Augústo lun jabájüdüün sun
gürígia ja Rómabaña. ²Furúmiñe meja jadúgüni cátei le, dán meja le
Cirénio lan agúmadijabei Síría. ³Súnti gürígia mósu jóudin jageíra lun ñi lan
jabájüdüüwa. ⁴Ligía láfuridunbei José Nazarétgiñe, loúbawagugiñe Galiléa, ába
lídín loúbawagun Judéa lídoun fulásu le gíribei Belén, le ñi lubei lagúriajouía
David, quei linébaanfan lubei David José. ⁵Ába lídín Belén lun labájüdüün úara
túma María to gadáradunboun lúma lun jamárieidun, áni dageíñañoun. ⁶Dánti
le añája lan ñi Belén, ába lachúlürün dan lun tagúriajan María. ⁷Ába tagúriajani
furúmiñeti tiraú ñi, ába toúburaguni tídan lágei, ába taroúnragüdüüni ñi tídan
jában anímaalu ladúga úati ubáraü joun tídan jában chülüdügütiña.

Ánjeligu jáma oúnigirutiña mudún

⁸Lídan áraabu bougudi lueí Belén, ñíñanu jóuniri mudún, bou larúgan jáu
oúnigiraña jalúgüniña mudún. ⁹Sódini, ába lasáliragun ában láni Wabúreme
Búngiu ánjeli siélugiñe joun, ába jaríjin ában oúnwenbun larúgounga le lánina
Búngiu geyégua jáu, ába janúfudedagun. ¹⁰Ába laríñagun ánjeli ligía joun.

—Manúfudeda jumá, ladúga níjein ugánu buíti nanúgün jun, lébunabei
sarágu ugúndani joun sun gürígia. ¹¹luágu agúriajouaali lan ában
asálbaragülei jun ugúñe, lageíra David, Crístu le Jabúreme. ¹²Jadárirubei
irájú ligía jóúburagu tídan lágei, roun tídan jában anímaalu.

¹³Lídan óra ligía, ába jasáliragun sarágu ánjeligu lubádu furúmiñeti
ánjeli, ába jíchugun uweíriguni lun Búngiu, jaríñaga.

¹⁴Uweíriguni lun Búngiu lídan líñutima siélu,
darángilaü múarugu jádan gürígia ja ibíjubalin lufúleisein!

¹⁵Dánti le jagíribudun ánjeligu járigoún siélun, ába jaríñagun jóuniri
mudún jámagua.

—Queímoun Belén aríjei cátei le asúseredubei, le uágubei
lasúbudiragüda Wabúreme Búngiu woun.

¹⁶Ába jóúdin furéseguaina, ába jadárirunun María lúma José, lúma irájü roun tídan jában anímaalu. ¹⁷Dan le jarjínbalin, ába jabájüdaguni le laríñagubei ánjeli joun libúgürü le. ¹⁸Súnti ja agáambuliña, weíriti janígi láu le jaríñagubei. ¹⁹Áni María, areídañu tíñein sun cátei le tídan tanígi, arítagua luágu. ²⁰Ábati jagíribudun jóúniri mudún, adímurejeina weíri luágu Búngiu, luágu sun le jagáambubei lúma le jarjíbei, ladúga suséreti ítara quei laríñawagúniwa joun.

Larúfudúniwa Jesúsu témpulurugu

²¹Luágu liwídün wéyu, ába lerésibiruni circuncisión, ába jíchuguni líri Jesúsu, íri méme le líridubei ánjeli tun María lubáragiñe tadágeinadun.

²²Dan le lagúnfulirunbei lidáani jarúmadun lagúbürigu Jesúsu según igáburi lídan lilúrudun Moisés, ába janúgüni irájü ligía ubúrugun Jerusalén lun jedéregeruni lun Búngiu. ²³Jadúgünbalin líra ladúga laríñajare tídan lilúrudun Búngiu. “Sun furúmiñeti wügüri irájü agúriajóuti lúnbei Búngiu.” ²⁴Ába lubeíti jóúdin adágaragüda le uágubei laríñaga lilúrudun Búngiu. bián wagúgua o bián lan únjun.

²⁵Lídan meja dan ligía, ñíñein meja ában wügüri Jerusalén gíriti Simeón. Wügüri ligía ában wügüri buíti, weíriti ledéregeragun lúngua lun Búngiu, áni agúraba lumúti liábin Crístu, le lúnbei lasálbaruniña Israelítagu. Ñíñein Sífiri Sándu lúma Simeón, ²⁶áni arúfuda láali lun luágu moúnwenbei lan maríjingleí Crístu le lúnbei loúnajani Wabúreme Búngiu. ²⁷Ába lídin wügüri ligía témpulurugun, ladúndejan Sífiri Sándu. Dánti le janúgünbalin lagúbürigu Jesúsu Jesúsu témpulurugun lun jadúgüni le laríñagubei lúrodu láu, ²⁸ába loúyuajani Simeón, ába líchugun eteíngiruni lun Búngiu, aríñageina ligía.

²⁹Nabúreme, gayáraajali bígirunina lun noúnwen láu darángilaü, nugúya le esériwidubei bun,

ladúga gúnfuli báali le baríñagubei nun.

³⁰Aríja náali Wasálbaragüle láu nágu,

³¹Asálbaragülei le boúnajabei joun sun gürígia.

³²Ítara lúba queísi ában lámpu lun larúfuduni inárüni joun ja mámabaña juríu,

ru ligíame uweíriguni joun Israelítagu, ja bánigu.

³³Ába laweíridun lanígi José táu sun María láu le laríñagubei Simeón luágu irájü le. ³⁴Ábati labíniruniña Simeón, ába laríñagun tun María, to lúguchu Jesúsu.

—Irájü le, lébunabei achúgeraguni joun sarágu Israelítagu, lébunabei gíñe asálbaruni joun jíbiri. Ítara lúba queísi ában seíni le lúnbei gíbe jamá májatiña jerésibiruni. ³⁵Ítara lúba lasúbudirúniwa le larítagubei cáda ában tídan lanígi luágu Crístu. Áni ítara lúba sun cátei le bun quei ában efeín to ácharurutu tuágu buwáni.

³⁶Ñíñoun gíñe ában wúri proféta, gíritu Ána, wúri tugúya liraú Fanuél, jádaangiñe ladúgawagun Áser. Weíriyaaru wúri tugúya, ñúraügiro meja tamárieidunbei, sédüñein irúmu táu lúma túmari, ába loúnwen, ³⁷guetó,

gádürü-weín-gádürü irúmu táu. Máfuriduntuti témpulurugugiñe, terédera ñi esériwida lun Búngiu árieibu wéyuagu, ayúnara lúma ayúmuragua lun Búngiu. ³⁸Ába tiábin Ána jawágun María, José, lúma Jesúsu lídan méme óra ligía, ába teteíngiruni Búngiu luágu irájü ligía, adímureja tugúya luágu Jesúsu joun sun ja agúrabajabaalin lasálbarún Jerusalén.

Agíribuduni Nazarétün

³⁹Lárigiñeti jagúnfulirun láu sun le laríñagubei lilúrudun Búngiu, ába jagíribudun María, José, lúma Jesúsu Galiléoun lídoun jabúrugute le Nazarét. ⁴⁰Aweírideina ligíati irájü le, éredeina ligía, afáragadagueina lídan lichú áu, biní lumútijati Búngiu sarágu.

Jesúsu témpulurugu

⁴¹Ságüja irúmu jóúdin lagúbürigu Jesúsu ubúrugú Jerusalén lubá fédu le páscua, ⁴²áni dan le lagúnfulirunbei Jesúsu dúusu irúmu, ába jóúdin súngebui Jerusalén quei le jagáburi lídan fédu ligía. ⁴³Dánti le jagíribudun lárigiñe lagúmchagun fédu, ába leréderun irájü ligía Jerusalén, ibídiñoun tun lúguchu ni lun José, ⁴⁴jarítagún yebe luágu nítan lan jádan güriegia ja jámarigubaña luágu úma. Ítara líña jadúgün ában wéyu eíbuguni, dan le jáluajani jádan jadújeñu lúma jádan jasúbudiraagun, ⁴⁵madári jamúti. Ábati jagíribudun ubúrugun Jerusalén áluajei ñi.

⁴⁶Üriwa wéyu lueígiñe, ligía jadáriruni témpulurugu ñun jádan arúfudajatiña lilúrudun Moisés, agáambajaña, álügüdaguaña. ⁴⁷Súnti ja agáambubalin, weíríti janígi luágu lichú láu lúma luágu buri loúnabagüle. ⁴⁸Dan le jaríjinbalin lagúbürigu, ába laweíridun janígi, ába taríñagun lúguchu lun.

—¿Cáme badúgei cátei le woun, niraú? Nugúya lúma búguchi, wáluajañadibutia láu idíjeri.

⁴⁹Ábati laríñagun Jesúsu joun.

—¿Cági uágu jáluajana? ¿Ibídiñeti jun luágu lúnti lan neténirun lun cátei le láni Núguchi?

⁵⁰Úati gunfaráanda jamáni le laríñagubei joun.

⁵¹Ábati lagíribudun jáma, Nazarétün, ába lasígirun láu meme lagáambadi joun. Ábatí buri tareíduni lúguchu sun cátei le tarítagunrugun. ⁵²Niján mémeti Jesúsu aweírideina dándu lúgubu queísi lisáminan, áni buítiti dándu ligíbugiñe Búngiu quei jagíbugiñe güriegia.

Lapúrichijan Juan le abásteragüdjabei, lídan fulásu mageírawati
(Mt. 3.1-12, Mr. 1.1-8, Jn. 1.19-28)

3 ¹Lídan liqueínsin lirúmuduri lagúmadijan Tibério César, Póncio Piláto ligía meja gumándanbei Judéa, Heródes gumándan Galiléa, Felípe, le lamúlen, ligía gumándan Itúrea lúma Traconíte, Lisanías gumándan Abilínia, ²Anás lúma Gáifasi, jagía fádirigu íñutimáabaña lídan jafíñen

juríu. Ábati líchugun Búngiu ában ugánu lun Juan, le liraú Zacarías, lídan fulásu mageírawati, ³ába leíbuguni Juan sun fulásu buri le lubádubei dúna le Jordán, aríñagueina joun gürígia luágu lúnti lan jaságürijan luágu jafígoun, sáansi jameíme jagáburi lun ferúdunawa lan jafígoun, badísei jagíame.

⁴Suséreti cátei le ítara queí meja labúrtüdüni proféta Isaías, laríñaga.

Agaambúati lumálali ában agúarajati lídan fulásu mageírawati ítara.

“Aráanseja jumoún janígi lubá liábin Wabúreme,
queísi ladárarúniwa úma surúti.

⁵Labuínchagüdúwaba sun gudúungu,
sun wúbü, lagurúaba,
úma buri le segéti, lásururuba,
úma buri le múaragunti, lúwaradaguba.

⁶Larijúbei sun uboú Wasálbaragüle, le loúnajabei Búngiu woun.”

⁷Núbintiña sarágu gürígia lun Juan lun labásteragüdúniña, ába laríñaga joun.

—Jarásan jéwe jugúya le! ¿Ca awísarubalün lun jeíbaagun lueí lanárime lafáyeiragüle figoú le yaráfaalibei? ⁸Ígira jumeí binádu jigáburi, abágarida jumá lun gayára lan larijín buídu luágu sáansiguaali lan jigáburi. Maríñaga jumá jídaangua. “Linébaanfaangu Abrahám wagía”, ladúga queí naríñaguni jun, gayáraati ladúgün Búngiu linébaanfaangu Abrahám lídaangiñe buri dúbü le. ⁹Yaráfaali dan lun jafáyeijan luágu jifígoun queísi taráanserún jaráwa lun tánychuguni tídibu wéwe. Sun ídibu le mabuídunti lin lánchugúba, ábame lagudún.

¹⁰Ábati jaríñagun gürígia jagía lun.

—¿Cáteiti lúnbei wadúgüni?

¹¹Ába laríñagun Juan joun.

—Le biámabei isímisin, lúnti líchugun ában lun le úaboun ni ában lúma, le geíginbei, lúnti lafánreinraguni lúma le meíginbei.

¹²Núbintiña gíñe agúburajatiña liseínsuna gumádi lun jabásterun, ába jaríñagun lun.

—Maésturu, ¿ca cátei lúnbei wadúgüni?

¹³Laríñaga Juan joun.

—Magúburaja jumá louígiñe le uágubei laríñaga lúrudu.

¹⁴Aríñagatiña gíñe fiú súdeara lun.

—Ángi wagía, ¿cági lúnbei wadúgüni?

Laríñaga joun.

—Magídara jumá ni cáta ni ca ueí, ni láu siádi, ni láu jíchugun lidúnrun mútu le madúgün lumúti, gufúruma jumá láu jafáyeiruaia.

¹⁵Añájeti gürígia madéraguagüdünja arítagua luágu fágua lan Juan Crístubei, ¹⁶ába laríñagun Juan joun súngubei.

—Áu, láu dúna nabásteragüdaün, nítenbei ában le lúnbei labásteragüdünün láu Sífiri Sándu lúma láu queísi wátu geméti, ligía Crístubei. Gabáfutimaati nueí darí lun madúna nan ni lun nafáragaduni tagúruga ligeídin. ¹⁷Dánme liábin, jafánreinrúaba gürígia ja lánigubaña jádaangiñe ja wuríbabaña

queísigubeirügü lagídarúniwa ífei lídaangiñe türígu buíti, ába loúndarún türígu buíti tídoun lágei, ába lagudún ífei lídan wátu geméti le méneguchati.

¹⁸Láu igáburi le lúma láu buri ámu ewéridijani líchigei Juan ugánu buíti joun güirgía luágu wasálbaragüle. ¹⁹Erérati gíñe lun gumándan Heródes luágu laganoún túma Heródias, to lúmari Felípe, le lamúlen, lúma luágu ámu buri cátei wuríbatí le ladügübei. ²⁰Lubáragiñe ladügün Heródes gásu láu, adúgarügü ligía ában cátei wuríbatimaati. ládaruni Juan furísunrugun.

Labásterun Jesúsu
(Mt. 3.13-17, Mr. 1.9-11)

²¹Lubáragiñe ladaürúniwa Juan, dan le labásteragüdüniña güirgía, badíseiti gíñe Jesúsu. Dánti le niján lan Jesúsu ayúmuragua lun Búngiu, ába lánjunrenchagun juánriñu, ²²ába larijíniwa larárirun Sífiri Sándu luágun camá jamuga ában únjun, ába lagaambúniwa laríñagun ában umálali siélugiñe.

—Amürü Niraú le jínsiñebei nun, gúndaatina báu.

Linébaanfaangu Jesúsu
(Mt. 1.1-17)

²³Queí burí darándi irúmu láu Jesúsu dan le lagúmeserunbalin luwádigimari le uágubei loúnajei Búngiu. Jarítawagúati luágu liraú lan José, José, liraú Elí, ²⁴Elí, liraú Matát, Matát, liraú Leví, Leví, liraú Melquí, Melquí, liraú Jána, Jána, liraú José, ²⁵José, liraú Matatías, Matatías, liraú Amós, Amós, liraú Nahúm, Nahúm, liraú Eslí, Eslí, liraú Nagaí, ²⁶Nagaí, liraú Maat, Maat, liraú Matatías, Matatías, liraú Semeí, Semeí, liraú José, José, liraú Judá, ²⁷Judá, liraú Joána, Joána, liraú Résa, Résa, liraú Zorobabél, Zorobabél, liraú Salatiél, Salatiél, liraú Néri, ²⁸Néri, liraú Melquí, Melquí, liraú Adí, Adí, liraú Cosám, Cosám, liraú Elmodám, Elmodám, liraú Er, ²⁹Er, liraú Josué, Josué, liraú Eliézer, Eliézer, liraú Jorím, Jorím, liraú Matát, ³⁰Matát, liraú Leví, Leví, liraú Simeón, Simeón, liraú Judá, Judá, liraú José, José, liraú Jonán, Jonán, liraú Eliaquím, ³¹Eliaquím, liraú Meléa, Meléa, liraú Mainán, Mainán, liraú Matáta, Matáta, liraú Natán, ³²Natán, liraú David, David, liraú Isaí, Isaí, liraú Obéd, Obéd, liraú Booz, Booz, liraú Salmón, Salmón, liraú Naasón, ³³Naasón, liraú Aminadáb, Aminadáb, liraú Arám, Arám, liraú Esróm, Esróm, liraú Fáres, Fáres, liraú Judá, ³⁴Judá, liraú Jacób, Jacób, liraú Isáac, Isáac, liraú Abrahám, Abrahám, liraú Taré, Taré, liraú Nacór, ³⁵Nacór, liraú Serúg, Serúg, liraú Ragáu, Ragáu, liraú Pelég, Pelég, liraú Héber, Héber, liraú Sála, ³⁶Sála, liraú Cainán, Cainán, liraú Arfaxád, Arfaxád, liraú Sem, Sem, liraú Noé, Noé, liraú Laméc, ³⁷Laméc, liraú Matusalén, Matusalén, liraú Enóc, Enóc, liraú Jaréd, Jaréd, liraú Mahalaléel, Mahalaléel, liraú Cainán, ³⁸Cainán, liraú Enós, Enós, liraú Set, Set, liraú Adán, Adán, liraú Búngiu.

Loúchwagúniwa Jesúsu
(Mt. 4.1-11, Mr. 1.12-13)

4 ¹Ába lígiruni Jesúsu fulásu loúbawagu dúna Jordán, buin láu lubáfu Sífiri Sándu, ába lanúgüni Sífiri Sándu lídoun fulásu mageírawati. ²Reídeiti Jesúsu bián-wein wéyu ñi láu Máfia oúchaguei ánjein áburuja lídoun wuríbani. Meíginti ni cáta lídan sun bián-wein wéyu ligía, ába lasándirun ában oúnwenbun ilámaü. ³Ábati laríñagun Máfia lun.

—Ánjein Liraú bubei Búngiu, salíguagüdadei dübü le feínme.

⁴Laríñaga Jesúsu lun.

—Taríñajare Lerérun Búngiu. “Mámarügüba táu fein jabágarida gürígia, jabágariduba gíñe láu jagúnfulirun láu sun dimúrei le laríñagubei Búngiu.”

⁵Lárigiñe, ába lanúgüni Máfia Jesúsu luágun ában wúbü íñuti, ába larúfuduni sun fulásu le uboúagubei lun lídan ában. ⁶Ába laríñagun Máfia lun.

—Níchugubei sun ubáfu lúma sun uweíriguni le bun ⁷ánjabu ájuduragua nun lun banúgünina quei bubúngiute, báníbei súngubei, ladúga ibíja náali sun le, áni gayáraati níchuguni lun le únti nabúseera.

⁸Ába laríñagun Jesúsu lun.

—Dísebá nueí, Máfia, ladúga taríñajare Lerérun Búngiu. “Judúguabá lun Búngiu le Babúreme, lúnrügülá besériwida.”

⁹Lárigiñe, ába lanúgüni Máfia ubúrugu Jerusalén, ába laweíñragüdüni tábulugu témpulu, ába laríñagun lun.

—Ánjein Liraú bubei Búngiu, chúguabá búngua yágiñe lun únabun,

¹⁰ladúga taríñajare Lerérun Búngiu.

Loúnajabaña Búngiu láni ánjeligu lun joúnigiruníbu,

¹¹janúgübadibu jájaburugu lueí labúleiseirun bugúdi luágu dübü.

¹²Ába laríñagun Jesúsu lun.

—Taríñajare gíñe Lerérun Búngiu. “Moúchaguabeí Búngiu le Babúreme.”

¹³Dánti le madárijali Máfia cába lan luwúyeri oúchwagúni ladúga lun Jesúsu, ába lígiruni lúngua luágu átiri dan.

Lagúmeseruni Jesúsu luwádigimari Galiléa
(Mt. 4.12-17, Mr. 1.14-15)

¹⁴Ába lagríbudun Jesúsu Galiléoun buin láu lubáfu Sífiri Sándu, ába buríti ladímurejoún luágu lídan sun fulásu geyégua. ¹⁵Arúfudajatija tídan jalígilisin juríu lídan sun fulásu, buíti jadímurejan sun gürígia luágu.

Jesúsu lídan ubúrugu Nazarét
(Mt. 13.53-58, Mr. 6.1-6)

¹⁶Ábati lídin Jesúsu Nazarétün, le fulásu le ñi lubei lagúriajouá, ába lebélorun tídoun jalígilisin juríu lídan wéyu le eméraagüagülei quei ligáburi yebu, ába laráramun lun lalíjan tídan Lerérun Búngiu. ¹⁷Ába jíchugunun

lilíburun proféta Isaías lun, dan le ladárunun, ába ladáriruni le ñí lubei laríñaga ítara.

¹⁸ Níjein láni Búngiu Sífiri Sándu nuágu, ladúga anúadaja láadina lun níchuguni ugánu buíti joun gudémetiña, oúnaja láadina lun námaliyaniña ja nidíjeribaña tídan janígi, lun náfuridagüdüniña adaürütiña, lun níchugun aríjini joun maríjintiña, lun neséfuruniña ja ouserúabaña wuríba,

¹⁹ lun nadímurejan luágu dan le fuleíseijabu lan Búngiu joun güriáa.

²⁰ Ába ladárunun Jesúsu líburu, ába líchugunun lun ídejati tánina ligílisi, ába lañúurun. Queíti jasígirun sun ja ñíbaña aríaguei, ²¹ ába lagúmeserun adímureja, laríñaga.

—Ugúñe guánarü gúnfulijali cátei le jigíbugiñe.

²² Adímurejatiña sun jagía buíti luágu Jesúsu, weírititi janígi luágu lubuídun buri dimúrei le laríñagubei. Jálügüdagua buríti jámagua.

—¿Mámasan le liraú José le?

²³ Ába laríñagun Jesúsu joun.

—Subúsi nun luágu jaríñagubei lan cátei le nun. “Surúsia, agáraniguabá búngua”, jaríñaguba giñe nun. “Agáambaadiwa luágu buri cátei le adúga báalibeí Capernaúm, adúgabeí giñe ya bageíra.”

²⁴ Ába lasígirun adímureja, laríñaga.

—Nináriün jáu luágu úa lan ni ában proféta erésibirúati buídu lageíra.

²⁵ Choúru numúti luágu añájein lán meja sarágu würiña ja jiláguañábaña jámarigu jádan Israelítagu lídan meja lidáani proféta Elías, dan le májuyun lubeí júya luágu úrüwa irúmu dimí, ába ñi lan sarágu ilámaü fulásurugu, ²⁶ áni moúnajan lumúti Búngiu Elías túmoun ni ában jádaangiñe würiña jiláguaña jámarigu jagía ja aganoúbaña Israél, loúnajei túmoun ában to aganoúboun Sarépta, yaráfa lun ubúrugü Sidón. ²⁷ Níñanu meja giñe sarágu gawágutiña gumeín luágu jára ñi Israél lídan lidáani proféta Eliséo, úati ni ában jádaangiñe areídawaguagüdüti lueídügüya Naamán le Síriana.

²⁸ Dan le jagáambunbalin sun ja ñíbaña ligílisirugu cátei le, ába jagáñidun sarágu. ²⁹ Ába jásaarun, ába jaságaruni Jesúsu bougudín lueí fulásu, ába janúgüni lábulugun wúbü le gagíbuagubalin fulásu lun jájuchuruni ñígiñe.

³⁰ Ába lásügürün Jesúsu jamídaanguágiñe jámagua, ába lídin.

Ában wügüri gawáguti espíritu wuríbati

(Mr. 1.21-28)

³¹ Ábati lídin Jesúsu Capernaúm, ában fulásu le lídaanbei Galiléa, ába larúfudajan joun güriáa ñi lídan wéyu le eméraaguagülei. ³² Weírititi janígi láu ligáburi larúfudajan, ladúga láu ubáfu ladímureja.

³³ Níñeinti ában wügüri ligílisirugu, gawáguti espíritu wuríbati, ába lagúaragun ítara.

34—Ígira báwa, ¿ca uágu bemétera wámoun, Jesúsu le Nazarétna? ¿Biábiña agúnrinchaguawa? Subúdi numútibu, áni subúdi numúti luágu amúrü lan Liraú Búngiu le sándubei.

35Ába ladeínjan Jesúsu lun espíritu wuríbati ligía, ába laríñagun lun.

—¡Maníba, furíba lídaangiñe gürígia le!

Ábati lájuchuruni espíritu wuríbati wügúri ligía múarugun jagíbugiñe súngubei, ába láfuridun lídaangiñe, mabúleiseirunga. 36Ába laweíridun janígi súngubei, ába jaríñagun jámagua.

—¿Cáteisán buri dimúrei le? ¡Adímurejati wügúri le láu gumádi lúma ubáfu joun espíritugu wuríbatiña, ába jáfuridun!

37Adímurejoátiti buri luágu Jesúsu lídan sun fulásu geyégua.

Lareídagugüdünun Jesúsu límenidi Pédro

(Mt. 8.14-15, Mr. 1.29-31)

38Ábati láfuridun Jesúsu tídaangiñe jalígílisin juríu, ába lídan lúbiñoun Simón. Sándiñounti límenidi Simón, tabíruajaña, ába jayúmuragun lun Jesúsu lun lareídagugüdünun. 39Ába lélemuchun Jesúsu tuágun, ába ladeínjan lun abíruaü, ába lagídarun abíruaü tueí. Lídan méme óra ligía ába tásaarun, ába tagúmeserun eténira joun.

Lareídagugüdün Jesúsu sarágu sánditiña

(Mt. 8.16-17, Mr. 1.32-34)

40Sun ja añájeinbaña sánditiña jábiñe, dan le láfuachun wéyu ába janúgüniña lun Jesúsu, ába líchuguni lújabu jawágu cáda ában jádaangiñe, ába lareídagun furúmieguarügü sándi le jawáguti. 41Sarágu jaña gíñe ja gawágutiña espíritugu wuríbatiña, ába jagídarúniwa jaweí, ába buri jagúaragun ítara.

—Amúrü le Liraúbei Búngiu.

Ába ladeínjan Jesúsu joun espíritugu wuríbatiña, mígirun lumútiña lun jadímurejan, ladúga subúdi jamúti luágu ligía lan Crístubei.

Lapúrichijan Jesúsu Galiléa

(Mr. 1.35-39)

42Dan le larúgadunbei, ába láfuridun Jesúsu bougudín lueí ubúrugun lídoun ában fulásu mageírawati. Ába jáluajani gürígia, ába jachúlürün le ñjín lubeí, buséntiña yebe jeréderuni lueí lídin, 43ába laríñagun joun.

—Gásu gíñe níchuguni ugánu le luáguti larúeijan Búngiu joun lílana líbiri fulásu, ladúga lun líra nouñajoúa.

44Ítara líña lídin apúrichijeina tídan buri jalígílisin juríu, Galiléa.

Esénijani le láubei miláguru*(Mt. 4.18-22, Mr. 1.16-20)*

5 ¹Luágu ában dan, ñínein Jesúsu láru dúna le Genesarét, ábati jayábingua sarágu güriquia darí lun jámurudaguni, ladúga busén jamá jagáambuni lerérun Búngiu. ²Ába laríjin Jesúsu bián ugúnein málatu dúnarugu yaráfa lun láru béya, raríguaaña esénijatiña tídaangiñe, jachíbuñounti jasénin. ³Ábati ládinun Jesúsu tídoun ában tídaangiñe ugúnein tugúya to lugúneboun Simón, ába laríñagun lun lun ladísedun murúsun lueí láru béya. Ábati lañúurun Jesúsu tídan ugúnein, ába lagúmeserun arúfudaja joun güriquia ñígiñe. ⁴Dan le lásurunbei ladímurejan, ába laríñagun lun Simón.

—Jeíba méme anágün, ábame jágurun ñi.

⁵Laríñaga Simón lun.

—Maésturu, ñadímeinjadiwa sun árieibu, mañúguntiwa ni cáta, quei amúrü lubeí aríñagubalin, wágura.

⁶Ába jágurun, dan le jiñúragunbárun séni, ñíñanu sarágu úduraü tídan darí yebe lun tajeíridagun. ⁷Ábati jadúgün seíni joun jíbirigu ja tídaanbaña to ában ugúnein lun jayábin íderaguaña. Ába jayábin, ába jabuínchagüdünun biángubei ugúnein darí yebe lun tadíbiragun. ⁸Dan le laríjini Simón Pédro cátei le, ába lájuduragun ligíbugiñe Jesúsu, ába laríñagun lun.

—Ígira bána, Nabúreme, ladúga ában wügúri gafígounti nugúya.

⁹Laríñagubaalin Simón líra ladúga laweíridun lanígi, jáu sun ja úarabaña lúma, luágu añúguni le jadúgübei. ¹⁰Weíriti gíñe janígi Jacóbo lúma Juan, ja lirájüñü Zebedéo, ja lúmabaña Simón. Ába laríñagun Jesúsu lun Simón.

—Manúfudebá, lúmagiñe guetó buwádigimarida adíaja güriquia nun.

¹¹Lárigiñeti játürün, ába jígiruni sun cátei, ába jóúdin lúma Jesúsu lun láni jamá disípulugu.

Lareídagugüdün Jesúsu ában gawáguti gumeínluágu sun lúra*(Mt. 8.1-4, Mr. 1.40-45)*

¹²Luágu ában dan, lídaañein ában fulásu Jesúsu, le ñí lubei ában wügúri gawáguti gumeín luágu sun lúra. Dan le laríjinalin wügúri ligía Jesúsu, ába lájuduragun dagá ligíbu múarugun, ába layúmuragun lun ítara.

—Nabúreme, ánjabu busén, gayáraati bareídagugüdünina.

¹³Ábati lagúruruni Jesúsu láu lújabu, ába laríñagun.

—Buséntina, areídaguabá.

Quei laríñagun ítara, ába lagídarun gumeín lueí wügúri ligía, ¹⁴ábati laríñagun Jesúsu lun lun mabájüdagun láani cátei le ni ca un. Laríñaga lun.

—Ñüdünrügübá, arúfudagua búngua lun fádiri, rubeíme edéweejani le uágubei laríñaga lilúrudun Moisés luágu barúmadun, aríja jamámugei güriquia luágu areídaguaadibu lan.

¹⁵Eíbu dan, eíbu labúruchaguntima luágu Jesúsu, sarágu jañátija güirigia oúndaragutiña lun jagáambuni lúma lun lareídaguagüdüni jasándi. ¹⁶Ábaja lídin Jesúsu le ñíjin lumúti úa jamá güirigia lun layúmuragun lun Búngiu.

Lareídaguagüdüni Jesúsu ában fadáguaaali

(Mt. 9.1-8, Mr. 2.1-12)

¹⁷Luágu ában wéyu, ñíñein Jesúsu arúfudaja, ñíñanuti fariséogu jáma arúfudajatiña lilúrudun Moisés, ñúbintiña lídaangiñe lirájüñü buri fulásu le láni Galiléa, Judéa lúma Jerusalén. Nijánti lubáfu Búngiu arijúa luágu Jesúsu láu lareídaguagüdüniña sánditiña. ¹⁸Ábati jayábin fiú wügüriña barúina ában wügüri fadáguaaali tídan ában ubárari, jálugati jebélaagüdüni le ñíjin lubei Jesúsu lun laríjini. ¹⁹Madáritiña jalíagiñeba lan jebélura ladúga jíbe güirigia, ábati jaweírun tábulugun muna, ába jagídarun murúsun lueígiñe louígiñe le ñí lubei Jesúsu, ába jarárigüdüni sánditi tídan lubárari ligíbugiñoun. ²⁰Dan le laríjinalin Jesúsu afíñeni le jawágubei, ába laríñagun lun sánditi ligía.

—Wügüri, ferúdunawaali bifígoun.

²¹Ábati jaríñagun arúfudajatiña lilúrudun Moisés jáma fariséogu jóunguarügü.

—¿Cáteisan güirigia le, le minébenejabubei lun Búngiu láu ligáburi ladímurejan? Uati ámu gayáraati ferúduna lan figoú lueídügüya Búngiu.

²²Subúdi lumúti Jesúsu ca lan jasáminabei, ába laríñagun joun.

—¿Ca uágu jasáminara ítara? ²³¿Cátima méreengúnbei laríñawagun. “Ferúdunawaali bifígoun”, ódi “Sarába, beíbuga”? ²⁴Narúfudaaliti jun luágu gayára lan ferúduna nan figoú, áu le Wügüri Garaúwarügüti.

Ábati laríñagun lun le sándibei.

—Sarába, barúboun bubárari, beíba búbiñoun.

²⁵Lídan óra ligía, ába lásaarun sánditi ligía jagíbugiñe, ába labúdunun lubárari tó buga ídaanboun laroúnra, ába lídin lúbiñoun adímurejeina luágu luweírigun Búngiu. ²⁶Ába laweíridun janígi súngubei, ába jadímurejan luágu luweírigun Búngiu, ába jaríñagun láu luweírin janígi.

—Aríjaadiwa cátei weíriguti ugúñe.

Lagúarun Jesúsu lun Leví lun lánime disípulu

(Mt. 9.9-13, Mr. 2.13-17)

²⁷Lárigiñe cátei le, ába láfuridun Jesúsu lídaangiñe fulásu ligía, ába laríjin ában agúburajati liseínsuna gumádi, gíríti Leví, ñun líña lídan fulásu le ñí lubei lagúburaja, ába laríñagun Jesúsu lun.

—Falábana, queímoun núma queísi nání disípulu.

²⁸Ába lásaarun Leví, ába lígiruni sun cátei lánina binádu libágari, ába lídin lúma Jesúsu queísi láni disípulu lúmagiñe óra ligía.

²⁹Lárigiñe, ába ladúgiin Leví ában oúnwenbun fédu lun Jesúsu, lúbiñe, ñíñanuti sarágu agúburajatiña liseínsuna gumádi jámaya ámu güirigia ñun

luágu dábula jáma. ³⁰Ába jagúmeserun fariséogu jáma arúfudajatiña lilúrudun Moisés adímureja luágu Jesúsu jáma láni disípulugu, ába jaríñagun joun.

—¿Cásan uágu jeíginbei jáma agúburajatiña liseínsuna gumádi lúma jáma ámu gaffigountiña?

³¹Laríñaga Jesúsu joun.

—Ja magádiebaña, memégeirúntiña surúsia, aná ja sándibaña.

³²Máma niábiña áluaja magádietina ligíbugiñe Búngiu, niábiña áluaja gaffigountiña lun lasáansirún jóuserun.

Jálügüdüni Jesúsu luágu ayúnaruni

(Mt. 9.14-17, Mr. 2.18-22)

³³Ábati jaríñagun lun Jesúsu.

—¿Ída liñásan ayúnara jabeí lánigu Juan jáma fariséogu, ayúmuragua jagía sarágu lun Búngiu, ánjaña báni disípulugu, jóútiña, gurá jagía súnwandan?

³⁴Ába laríñagun Jesúsu joun.

—¿Gayáraati funági jayúnaragüdüniña gürígia ja jamísurajan lídoun ában maríei sun niján lan adári jáma ñi? ³⁵Lachülürüba dan lun lídin adári, ligíameti jayúnarun.

³⁶Rúti gíñe Jesúsu ában jémpulu joun luágu iséri larúfudajan lúma binádu, laríñaga.

—Úati íbuguti murúsun gamísa tueígiñe ában anáanguni isérigiru lun láfadajan ában anáanguni ñulújaru, ánjein ladúga ítara, lagádeiruboun to isérigiruboun, áni merédebei gíñe murúsun gamísa iséri ligía buídu tuágu anáanguni ñulújaru tugúya. ³⁷Michugúntu gíñe diweín iséri lídoun guéru ñulújali, ánjein adügúwa ítara, tajeíridagubei diweín iséri guéru ñulújali, féridiméti diweín, féridi guéru. ³⁸Ligía lúnti lubeí tichugún diweín iséri lídoun guéru iséri, ítara lúba lesériwidun guéru, seríwi diweín. ³⁹Úati gíñe átuti diweín to binádu lun labúseerunun to iséri lárigiñe, laríñaguba. “Buítimaatu to binádu.”

Jabúdajan disípulugu türígu lídan wéyu le eméraaguagülei

(Mt. 12.1-8, Mr. 2.23-28)

6 ¹Luágu ában wéyu le eméraaguagülei, eíbugeina líña Jesúsu labádinagua nádü jáma láni disípulugu, átüjeina jagfati disípulugu lin türígu, ába jéferejani láu jájabu, ába jeígini líla. ²Ábati jaríñagun jádaangiñe fariséogu joun.

—¿Cásan uágu jadúga wadágimanu le moún lumuti ladügún lídan wéyu le eméraaguagülei?

³Laríñaga Jesúsu joun.

—¿Malíjangidün luágu le ladügübei Davíd luágu ában dan, dan le lálámachunbei jáu sun ja úarabaña lúma? ⁴Ába lebélorun tídoun lúban Búngiu, ába lanúgün tídaangiñe fein to sagraúboun, jou ligía tídaangiñe, ru ligía joun ja úarabaña lúma, láu sun fádirigu rügüñanu lán yebe

lúnbaña jeígin tídaangiñe fein tugúya, según lilúrudun Moisés, áni máma figoú le ladügübei David ligíbugiñe Búngiu.

⁵Aríñagati gíñe joun.

—Gabáfutina, áu le Wügúri Garaúwarügüti, lun naríñagun cába lan gayára ladügúniwa wéyu le eméraaguagülei.

Wügúri le jiláalibei újabu

(Mt. 12.9-14, Mr. 3.1-6)

⁶Lídaanya ában wéyu le eméraaguagülei, ába lebélorun Jesúsu tídoun jalígílisin jurú, ába lagúmeserun arúfudaja. Níñein ában wügúri jiláali lújabu le loúnwenren, ⁷añájati arúfudajatiña lilúrudun Moisés jáma fariséogu aríaa jei Jesúsu ánjein lagáranijaba lubei lun lídan wéyu le eméraaguagülei, lun jadárirun lidúnrun. ⁸Subúdi lumúti ca lan jarítagubei, ába laríñagun lun wügúri le jiláalibei újabu.

—Sarába, ráramabá wagíbugiñe.

Ába lásaarun, ába laráramun ñi. ⁹Ábati laríñagun Jesúsu joun jíbiri.

—Nálügüdaadün ában cátei. ¿Ca cátei gayáraabei ladügún lídan wéyu le eméraaguagülei, buídu ódi wuríbani, lasálbarun ibágari ódi lagídarún?

¹⁰Ábati laríaguniña Jesúsu sun ja geyégubaña láu, ába laríñagun lun wügúri ligía.

—Tulébei bújabu.

Ába látuleruni, ába lareídagun. ¹¹Ja jíbiri, ába jagáñidun sarágu, ába jagúmeserun álügüdagua jámagua ída lúba lan gayára lan jagúmunchun láu Jesúsu.

Lanúadajaniña Jesúsu dúusu apóstolugu

(Mt. 10.1-4, Mr. 3.13-19)

¹²Lídoun dan ligía, ába lídin Jesúsu luágun ában wúbü ayúmuragua lun Búngiu. ¹³Dan le larúgadunbei, ába lagúarun joun láni disípulugu, ába lanúadajan dúusu jádaangiñe, ja únbaña lagúara apóstolugu. ¹⁴Niján jíribei. Simón, le méme líchubei Pédro, Andrés, le lamúlen Simón, Jacóbo lúma Juan, Felípe lúma Bartolomé, ¹⁵Matéo lúma Tomás, Jacóbo, le liraú Alféo, Simón, le áfaaguti lun jawáanserun jurú, ¹⁶Júdas, le lamúlen Jacóbo, lúma Júdas Iscarióte, le alúgurubalin Jesúsu.

Larúfudajan Jesúsu joun sarágu güri-gia

(Mt. 4.23-25)

¹⁷Ába larárirun Jesúsu jáu lueígiñe wúbü, ába leréderagun jáu láni disípulugu lídan ában fulásu le ñí lumuti sagádi wásati, ñíñanu gíñe sarágu güri-gia ñúbintiña loúbawagugiñe Judéa, Jerusalén, lúma lárurugugiñe Tíro lúma Sidón. Sun güri-gia ja, jayábiña lun jagáambuni lapúrichijan Jesúsu lúma lun lareídaguagüdüni jasándi. ¹⁸Já buri asúfurirubaña jáu espíritugu wuríbatiña, areídaguátiña gíñe. ¹⁹Álugatiña sun güri-gia jagúrurun luágu Jesúsu, ladúga areídaguagüda lumútiña sún-gubei láu lubáfu.

Fuleíseiwatiña jáma fugiábugu*(Mt. 5.1-12)*

20 Ábati laríjin Jesúsu jawágun láni disípulugu, ába laríñagun joun.

—Fuleíseiwatün, jugúya le mégeibei, ladúga ménreengúnbei jun lun jebélurun lídoun larúeijan Búngiu.

21 ‘Fuleíseiwatün, jugúya le áfaagubei ilámaü guetó, ladúga jaquímuleduba.

‘Fuleíseiwatün, jugúya le ayájubei guetó, jéjerajaba lárigiñe.

22 ‘Fuleíseiwatün dan le iyéreegu jumá joun gürígia nueígiñe, dan le jabúgagunün jawáriu, dan le janábagunün, dan le janúgüni jíri queí ni cáta, quei cátei wuríbati, nueígiñe, áu le Wügúri Garaúwarügüti.

23 Gúnda jumá sarágu, buin jumá láu ugúndani lídan wéyu ligía, ladúga jibíjuba ában oúnwenbun afáyeiruajaü siélu, ítara méme líña meja jadúga binádu jagúbürigu gürígia ja joun profétagu.

24 ‘Fugiábugu jugúya, jugúya le rísibei, ladúga ibíja jumáali sun ugúndani le lúnbei jibíjini.

25 ‘Fugiábugu jugúya, jugúya le químulebei, ladúga jalámachuba.

‘Fugiábugu jugúya le éjerajabei guetó, ladúga jayájuajaba láu íruni.

26 ‘Fugiábugu jugúya dan le sun jamá gürígia adímureja buíti juágu, ítara líña meja jadímurejan binádu jagúbürigu buíti jawágu profétagu yéetiña.

Jínsiñe jamá jáganiñu jun*(Mt. 5.38-48, 7.12)*

27 ‘Niján nerérun jun, Jugúya le agáambubalina. Jínsiñe jamá jáganiñu jun, adúga jumá buíti joun ja iyéreejabúbaña jun, 28 biní jumaña ja íñaragutün, ayúmuragua jumá jawágu ja anábagutün. 29 Ánjabu láfara ában gürígia luágu ában louba bigíbu, rúbei gíñe le ában louba lun, le anúgütu babíte bueí, rúboun gíñe bisímisin lun. 30 Furúmieguarügü le amúriajati búma, rúba lun, le anúgüti bumégen, máluajabei lúma. 31 Le cátei le babúseerubei ladúgün bun, ligialá badúga joun ámu.

32 ‘Ánjein já rügúñanu lubeí jínsiñejabúbaña jun jínsiñe jun, ¿ca buíti jadúgübei láu líra? Ásta gafígountiña, ítara líña jadúga. 33 O ánjaün lan adúga buíti joúnrügi ja adúgübaña buíti jun, ¿ca buíti jadúgübei láu líra? Ítara líña gíñe jadúgün gafígountiña. 34 Ánjaün afúredeija joúnrügi ja úmaginebaña jarítagua jibíjin som cátei, ¿ca buíti jadúgübei láu líra? Afúredeijatiña gíñe ja wuríbabaña joun wuríbatiña jáledi, agúrabañu jagía gíñe jabíjin som cátei jámagine. 35 Ánjein jugúya, lúnti jínsiñe jamá jáganiñu jun, adúga jugúyame buíti, afúredeija jugúyame, magúrabajaanga ni cáta lewéñegua. Ítara lúba weíri lan jafáyeiruaja lúmagiñe Búngiu le íñugubei, áni lirájüñübadün gíñe le tímatimaati, ladúga ligía, fuleíseijabúti gíñe joun ja meteíngiradibaña lúma joun ja wuríbabaña. 36 Gudémejabu jumá, quei gudémejabu lan júguchi Búngiu.

Madímureja jumá wuríba jawágu ámu

(Mt. 7.1-5)

37 ‘Madímureja jumá wuríba jawágu ámu, ábame gíñe maríñagun lan Búngiu luágu wuríba lan jigáburí. Míchiga jumá jadúnrun ámu, míchun lámuga gíñe Búngiu jidúnrun. Ferúduna jumá, ferúduna lámugaün gíñe Búngiu. 38 Rújuma joun ámu, ru lámuga gíñe Búngiu jun. Líchuguba Búngiu sarágu jun, ladúgüba jun queígubeirügü jadúga joun ámu.

39 Rúlumuti Jesúsu jémpulu le joun.

—¿Gayáraati funági ladúndejan ában maríjinti ában maríjinti líledi? ¿Ma jeíguaduba biángubei lídoun ában meme júyu? 40 Úati ni ában disípulu weíriguti lueí lumáesturun, íbini ánjein lagúmucha latúriajan, chílúrügübei quei lumáesturun.

41 ‘Ída líña gayára bubálin liraúraü ífei le lídaanbei lágu bíbugaña aríja, áni masándi bumúti durúsu le lídaanbei bágu? 42 ‘Ída líña gayára lubeí baríñagun lun bíbugaña. “Sagánei liraúraü ífei le bágurugubei”, áni masándi bumúti durúsu le bágurugubei? ¡Biánguañein bigíbu! Sagábei durúsu le bágurugubei furúmiñe, gayára lámuga baríjini liraúraü ífei le lágurugubei bíbugaña buídu lun baságaruni.

Luágu lin tídibu wéwe tasúbudirúa

(Mt. 7.17-20, 12.34-35)

43 ‘Úati tídibu wéwe buíti lun wuríba lan lin, úati gíñe tídibu wéwe wuríbati lun buídu lan lin. 44 Sun tídibu wéwe subúdiwati luágu lin, mátüjountu ígo lueígiñe jýyu, ni beíbei lueígiñe guríbiyuwa. 45 Gürígia le buídubei, cátei buíti laríñagubei ladúga cátei lan buíti tídaanbei lanígi, gürígia le wuríbati, cátei wuríbati laríñagubei ladúga cátei lan wuríbati tídaanbei lanígi. Luágu le laríñagubei gürígia lasúbudirúa ca lan tídaanbei lanígi.

Bián ébuu

(Mt. 7.24-27)

46 ‘¿Ca uágu jaríñaga luágu áu lan Jabúremebei áni madúgün jumúti le nubeíbei? 47 Naríñagaali jun ída líña lan le ñúbinbei nun áni adúgaleí le nubeíbei. 48 Ítara líña quei ában wügúri le ábunagubei ában múna, achíajati julíli furúmiñe, ába lábununi wagábu labádinagua dúbü derébuguti. Dan le liñúrunbei dúna, ába liábin fulúdu láu érei tuágun múna tugúya, siñá lumutu ánjingicha ladúga luáguñoun lan ébuu derébuguti. 49 Ánjeinti le agáambubalina áni madúgün lumúti le nubeíbei, ítara líña quei ában wügúri le ábunagubei lúban ligíbuagu ságoun, mawágaburiga, dánti le liñúrunbei dúna, ába liábin fulúdu láu érei tuágun, ába teíguadun, ába tagúnrinchagun le gumúti.

Lareidaguagüdüni Jesúsu lumúsun ában gumándan Rómana
(Mt. 8.5-13)

7 ¹Dan le lásurunbei ladímurejan Jesúsu joun güirigia, ába lídin Capernaúm. ²Nĩnein ában gumándan Rómana ñi, láu ában lumúsun jĩnsiñeti lun sarágu, sándiñein músu ligía, yaráfa lun loúnwen. ³Dan le lagáambunbei gumándan ligía luágu Jesúsu, ába loúnajan fiú jádaangiñe wügürĩña weirigutiña lídan jaffĩnen jurfú lun jayúmuragun lun Jesúsu lun lídin areidaguagüdei lumúsun. ⁴Ába jóudin lúmoun Jesúsu, ába jagúmeserun ayúmuragua lun táu sun janígi, jaríñaga lun.

—Buíti lun bíderaguni gumándan le, ⁵ladúga jĩnsiñetiwa wagía jurfú lun, ligía guánarügü ábunaguagüdübarun walígílisin.

⁶Ábati lídin Jesúsu jáma, dan le yaráfaaña tun lúban gumándan ligía, ába loúnajan gumándan jádaangiñe lumádagu aríñaga lun Jesúsu.

—Nabúreme, ítara líña gumándan lun manúgĩn ban bubéresegun nũdĩn lúbiñe, luágu nege madúina lan lun bebélurun lúbiñoun, ⁷ligía nege mídin lubeí lúngua álugabu. Rúrügübeí dimúrei, ábame lareidagun lumúsun. ⁸Ladúga ligía nege gíne lábugiñeñein gumádi ĩnutimaati, áni añájein gíne súdaara lábugiñe lagúmadijan. Dan lé nege laríñagun lun ában jádaangiñe lun lídin, nũdĩnti, dan le laríñagun lun le ában lun liábin, nũbinti, áni dan le loúnajani lumúsun adúga som cátei, adúga lumúti. Ítara lúba nege, luágu berérun mósu lídin sándi lueí lumúsun.

⁹Dan le lagáambunbalin Jesúsu cátei le, weíriti lanígi láu wügürí ligía, ába laríjin jawágun güirigia ja afálarubalin, ába laríñagun joun.

—Nináriin jáu, ni íbini jádan Israelítagu madárigidina affĩneni weíriti quei laffĩnen wügürí le.

¹⁰Dánti le jachúlürünbei wügürĩña ja nũdünbaña álugei Jesúsu járigoún lúbiñoun gumándan, areidaguaali lumúsun.

Láguuyuguagüdüni Jesúsu tiraú ában jiláali túmari

¹¹Lárigiñe cátei le, lídiña Jesúsu lídoun ában ubúrugü gíriti Naín, úareina jáña láni dispúlugu lúma, jáma sarágu güirigia. ¹²Dan le lachúlürünbei yaráfa lun lubéneri ubúrugü ligía, ába laríjin jóudin ábunaja ában jiláali le ligíarügüti tiraú lúguchu to jiláali túmari. Sarágu jáña lílana fulásu nũdĩn ábunaja túma. ¹³Dan le laríjinbarun Wabúreme Jesúsu, ába tagúdemedagun lun, ába laríñagun tun.

—Mayájuabá.

¹⁴Ába layárafadun, ába lagúrurunun gánjoun, ába jaráramagun ja anúgübaña. Ába laríñagun lun jiláali.

—Irájü, ĩnaríñaguña bun lun básaarun!

¹⁵Ábati lásaarun lé buga jiláalibei, ába lagúmeserun adímureja. Ába ledéregeruni Jesúsu tun lúguchu. ¹⁶Dan le jaríjinbalin güirigia cátei le, ába laweíridun janígi, ába jagúmeserun adímureja buíti luágu Búngiu, jaríñaga.

—Chülúgua ában proféta weiriguti wádoun.

Aríñagatiña gíne.

—Ñúbinja Búngiu íderaguawa, wagía le lumútuniña.

¹⁷Ába lagaambúniwa cátei le ladúgübei Jesúsu lídan sun Judéa lúma geyégua láu.

Loúnagülegu Juan le abásteragüdjabei

(Mt. 11.2-19)

¹⁸Agáambati Juan luágu sun cátei le, abájüdagua jamúti lánigu lun. Ábati lagúarun joun biáma jádaangiñe, ¹⁹ába loúnajaniña álügüdei Wabúreme Jesúsu ánjein ligía lubeí Crístubei le lúnbei liábin, o ánjein jagúrabajaba lubeí ámu. ²⁰Dan le jachúlürünbei le ñí lubei Jesúsu, ába jayárafadun, ába jaríñagun lun.

—Loúnajañadiwa Juan le abásteragüdjabei álügüdabu ánjein amúrü lubeí Crístubei le lúnbei liábin, o ánjein lun lubeí wagúrabun ámu.

²¹Lídan méme óra ligía, areídaguagüdati Jesúsu sarágu gürígia lídaangiñe jasándi lúma jasúfurirun, lúma jádaangiñe espíritugu wuríbatíña, aríjagüda ligía gíñe sarágu maríjintiña. ²²Ába lubeíti laríñagun joun.

—Jeíba, jaríñageime le jaríjubei lúma le jagáambubei lun Juan. Jabájüdaguáme lun luágu jaríjin maríjintiña, jeíbugun meíbuguntiña, jareídagun láutiña gumeín luágu jára, jagáambun magáambaditiña, jáguyugun jiláaña, lúma luágu líchugún ugánu luáguti asálbaruni joun gudémetiña. ²³Gúndaati gíñe gürígia le meféridirun lumúti lafíñen nuágu.

²⁴Lárigiñe jóúdin já buga loúnajabaña Juan, ába lagúmeserun Jesúsu adímureja luágu Juan joun gürígia, laríñaga.

—¿Cásan jídinbei aríja lídan fulásu mageírawati? ¿Ában mabúru le lánjinjan garábali? ²⁵Ánjein máma lubeí ítara líña, ¿cáti jídinbei aríja? ¿Ában wügüri táu anáanguni wéndegutu? Máma ligía, subúdi jumúti luágu ja lan wéndegubaña adáüragun, agánawa jagía buídu, tídaañanu jában urúeigu. ²⁶Lídan linárün cátei, ¿ca jídinbei aríja? ¿Ába proféta? Ánja, inárüni, áni ában weíriguti sügú láu proféta. ²⁷Juan, ligía oúnagülei le uágubei taríñaga Lerérun Búngiu.

Noúnajañein noúnagüle bubáragiñe

lun laráansejani úma bubá.

²⁸Quei naríñaguni jun, jádan sun gürígia, úgali proféta weíriguti lueí Juan, áni láu sun líra, weíriguti le únabutimaabei lídan larúeijan Búngiu sügú láu le anúgarügübalin ugánu luágu arúejani ligía.

²⁹Dan le jagáambunbalin sun gürígia, ásta ja agúburajabaña liseínsuna gumádi, cátei le, ába jaríñagun luágu richá lan Búngiu láu laríñagun liyúmulugugiñe Juan luágu lúnti lan jasáansiraguni jagáburi. Gürígia jagía, resíbi jamáli meja labásteragüdjagan Juan, ³⁰ánjañati jíbe-ágei fariséogu jáma arúfudajatiña lilúrudun Moisés, májatiña meja lun jadúgüni le lubeíbei Juan, merésibirun jamúti lé yebe labúseerubei Búngiu ladúgün luágu jafúleisein. ³¹Ába laríñagun Jesúsu.

—¿Ída liñásan jagáburi gürígia lánina dan le? ¿Cásan lenégebei? ³²Ítara jáña quei irájüñü ja añúurubaña mágidirugu ájurera, ába jagúaragun joun jíbegu. “Íñaajatiwa fídu jun, mabínajantün, erémujatiwa urému jíruti jun, mayájuntün.” ³³Ladúga ñúbinti Juan le abásteragüdajabei, lé meja meíginbei fein, mátun ligía diweín, aríñagatün luágu gawágu lan espíritu wuríbatí. ³⁴Lárigiñe, ába niábin, áu le Wügúri Garaúwarügüti, jóútina áni gurá áu. Jaríñaga luágu geígadina, gátadi, jamáda áu nege gafígountiña jáma agúburajatiña liseínsuna gumádi. ³⁵Wel, ja chúbaña áu, subúdi jamúti luágu buídu lan le ladügübei Búngiu láu lichú láu.

Jesúsu lúbiñe Simón le fariséo

³⁶Ába lamísurajani ában jádaangiñe fariséogu Jesúsu lun lídin eíga lúbiñe, ába lídin Jesúsu lúbiñe fariséo ligía, ába lañúurun eíga luágu lidábulan. ³⁷Ñíñounti ában wúri wuríbatí témeri lídan ubúrugú ligía, dan le tagáambunbei luágu lídin Jesúsu eíga lúbiñe fariséo ligía, ába tídin láu ában lágei ibíñei jémeti. ³⁸Ába taráramun lanágangiñe Jesúsu, lubádu lugúdi, ába tadúdúragüdüni lugúdi láu táguira. Nuján ayájuaja, nuján arágajei láu tídíburi, nuján achújei lugúdi, ába téseruni ibíñei luágún. ³⁹Dan le laríjinbalin fariséo le amísurajabalin Jesúsu cátei le, laríñaga lúnguarügü. “Lun jamúga inárüni lan luágu proféta lan wügúri le, lasúbudiruñein jamúga ca lan to agúruruboun luágu lúma ca lan tuwúyeri gürígia tugúya, luágu wuríba lan témeri.” ⁴⁰Ábati laríñagun Jesúsu lun fariséo ligía.

—Simón, níjein ában cátei lun naríñaguni bun.

Laríñaga fariséo.

—Aríñagabeí nun, maésturu.

⁴¹Laríñaga Jesúsu lun.

—Níñanu bían wügúriña dúweitiña seínsu lun ában afúredeijati. Ában jádaangiñe, dúweiti seíngü-san denáriu, le ában, dimí-san. ⁴²Quefti siñá lubei jafáyeiruni, ába ferúduna láani afúredeijati ligía jadúweijan biángubei. Aríñagabefti nun. ¿cábago jádaangiñe jínsiñejabutima lun afúredeijati ligía?

⁴³Laríñaga Simón lun.

—Lídan narítangun, le gíbetimaabei adúweijan.

Laríñaga Jesúsu lun.

—Richátibu.

⁴⁴Ába laríjin Jesúsu tuágún wúri tugúya, ába laríñagun lun Simón.

—¿Aríagu bíña tun wúri to? Belútina búbiñoun, míchutibu dúna nun lun nachíbuni nugúdi, ánjounti wúri to, ágawagüda tumúti nugúdi láu táguira, ába tamábeidagüdüni láu tídíburi. ⁴⁵Machú bumútina, ánjoun tugúya, lúmagiñe nebélorun, merédegili tachújani nugúdi. ⁴⁶Míchutibu aílí nábulugu, ánjoun tugúya, túguatu ibíñei jémeti luágu nugúdi.

⁴⁷Ligía naríñagunbei bun luágu aráfuda láani luweírín tínsiñejabu luágu

ferúdunawa lan líbe tiffígoun, ánjeinti gürígia le míbeti ferúdunawa lan, míbeti ínsiñeni larúfudun.

⁴⁸Ábati laríñagun Jesúsu tun wúri tugúya.

—Ferúdunawaali bifígoun.

⁴⁹Ábati jagúmeserun amísurajóutiña ja ñúnbaña lúma ñi aríñaga jámagua.

—¿Cáteisan wügúri le, ferúduna lubeí gíñe figoú?

⁵⁰Ába laríñagun Jesúsu tun wúri tugúya.

—Sálbawádibu lídaangiñe bifígoun ladúga baffíñerun nuágu, befba darángilañu.

Würíña já buri meja íderaguti Jesúsu

8 ¹Lárigiñe cátei le, ñúdünti Jesúsu lídoun sarágu ubúругu lúma buri lirájüñul fulásu íchigei ugánu buíti luágu larúeijan Búngiu.

²Ñúdütiña dúusu apóstolugu lúma jáma würíña ja lareídaguagüdübaña jádaangiñe espíritugu wuríbatiña lúma sándi. Ñíñoun María to gíriboun Magdaléna jádan, to ídaangiñeboun jáfurida sédü espíritugu wuríbatiña,

³ñíñoun gíñe Juána, to lúmari Chúza, le oúnigirubarun lúban Heródes, ñíñoun Susána, jámaya sarágu ámu ja íderagubálin láu le jámati.

Jémpulu luáguti ábunaguti

(Mt. 13.1-9, Mr. 4.1-9)

⁴Sarágu jáña gürígia ñúbinburitiña lídaangiñe sarágu fulásu lun jaríjini Jesúsu, dánti le oúndaraguaaña, ába ladímurejan Jesúsu joun láu jémpulu. Laríñaga joun.

⁵—Furíti ában ábunaguti ábunagua líla nádü, dan le afúrujeina láani, ába láburujan lídaangiñe luágun úma, ába jadúgüraguni ásügürütiña, ába jeígini dunúru. ⁶Líbiri, ába láburujan labádinaguoún dúbü, dánti le laboúchun, ába lásaurün ladúga lumábei fulásu. ⁷Ába láburujan líbiri labádinaguoún jíyu, ába láfaruni jíyu le ájüchübei úara lúma. ⁸Ñíñein gíñe lídaangiñe, áburujati lídoun múa buíti, dan le laweínamudun, gin ligía, buíti lalúbajoún, cáda ílaü rúti san águu.

Lárigiñe laríñaguni Jesúsu cátei le, ába laríñagun joun láu umálali jéreti.

—Jugúya le garígeirugubei lun jagáambun, agáamba jumána.

Le lébubei ladímurejan Jesúsu láu jémpulu

(Mt. 13.10-17, Mr. 4.10-12)

⁹Ábati jálügüdüni láni disípulugu ca lan lílabei jémpulu le. ¹⁰Laríñaga joun.

—Jugúya, subúdigüda láali Búngiu cátei arámudaguati le luágutibei larúeijan jun, ánjaña ja mebéresenbaña láu lerérun, láu jémpulu laríñawagúa cátei luáguti larúeijan joun lun ibídiñebeí lan líla cátei le jaríjibei joun, lun gíñe úa lan gunfaráanda jamáni cátei le jagáambubei.

Lafúnraanguagüdüni Jesúsu jémpulu luáguti ábunaguti
(Mt. 13.18-23, Mr. 4.13-20)

¹¹Ába laríñagun Jesúsu joun.

—Niján líla jémpulu ligía. Líla nádü, ligía lerérün Búngiu, ¹²úma le ñíjin lubeí láburuja lídaangiñe líla nádü, jagía gürígia ja agáambubalin lerérün Búngiu, ába liábin Máfia, ába lagídaruni tídaangiñe janígi lun mafíñerun jamá, masálbarun jagíame. ¹³Dúbü le ñíjin lubeí láburuja líbiri líla nádü, jagía gürígia ja agáambubalin lerérün Búngiu, ába jerésibiruni láu ugúndani, áni mártügüdünti jádan buídu, affínetiña luágu murúsun dan, áni dan le jóuchawagún, mawándun jamúti, ába jeféridiruni jaffínen luágu Búngiu. ¹⁴Jíyu le ñíjin lubeí láburuja líbiri líla nádü, jagía gürígia ja agáambubalin lerérün Búngiu, ába jasígiruni binádu jagáburi, ába jasígirun arítagua luágu írisini lúma ugúndani le lánina uboú le, úati fulásu jarítagurugun lun lerérün Búngiu, siñátiti laságarún cátei buíti jádaangiñe. ¹⁵Ánjeinti múa buíti le ñíjin lubeí láburuja líbiri líla nádü, jagía gürígia ja agáambubalin lerérün Búngiu táu anígi buítu, adúga jagía gásu láu lerérün, eíbuga jagía quei lubúdubu, sagáwati cátei buíti jádaangiñe.

Jémpulu luáguti lámpu
(Mr. 4.21-25)

¹⁶Ába laríñagun Jesúsu.

—Úati gürígia ébeduti lámpu, ába ladáuragun láu láu som cátei o líchuguni lan tábugiñe gabána, íñu líchigei lun larúgoungadágüdüni múnada, lun gayára lan jaríjin ja ebélurubaña jabárua. ¹⁷Úati lubeíti ni cáta arámudaguati lun mafúnraangudun lan, úa ni cáta le ibídiñewati lun machúlürün lan dan lun lasúbudirúniwa lúma lun lafúnraangudun.

¹⁸Gagáambadi jumá lubeíti buídu lun lerérün Búngiu, le gámati lerérün Búngiu tídan lanígi, libíjuba lánwoun le lúmabei, ánjeinti le úabei ni cáta lídaangiñe lerérün Búngiu tídan lanígi, íbini le uágubei larítagua luágu níjein lan lúma, lagídarúaba lueí.

Lúguchu Jesúsu jáma lamúlenu
(Mt. 12.46-50, Mr. 3.31-35)

¹⁹Ábati tachúlürün lúguchu Jesúsu jáma lamúlenu le ñíjin lubeí Jesúsu, siñátí jayárafadun lun ladúga jíbe gürígia. ²⁰Ába laríñawagún lun.

—Nujántia búnguchu jáma bamúlenu boúgudi áni buséntiña jaríjinibu.

²¹Ába laríñagun joun.

—Ja agáambubalin lerérün Búngiu, úara jagía lúma, jagía nóguchubaña jáma namúlenu.

Lagálumaduni Jesúsu lérouga

(Mt. 8.23-27, Mr. 4.35-41)

²²Luágu ában wéyu, ába ladinun Jesúsu tídoun ában ugúnein jáu láni disípulugu, ába laríñagun joun.

—Queímoun loubáfurugun lagúnu.

Ába jóúdin. ²³Dan le añája lan ánjiñuragua, ába larúmugun Jesúsu. Ába láfurun ában garábali jéreti jáu, lagúnurugu, ába lagúmeserun dúna ebéluja tídoun jagúne yaráfa lun jadíbiragun. ²⁴Ábati jóúdin agágudajei Jesúsu, ába jaríñagun lun.

—¡Maésturu! ¡Maésturu! ¡Wadíbiragua!

Ábati lásaarun Jesúsu, ába ladeínjan lun garábali lúma lugúdi barána, ába lagálumougadun, ába darángila lan sun cátei. ²⁵Ábati laríñagun joun disípulugu.

—¿Ca susérebei lun jaffínen?

Ába jálügüdagun jámagua láu anúfudei lúma luweírín anígi, jaríñaga.

—¿Cátei funásan wügúri le, gumádi lubáli garábali lúma lugúdi barána áni agáamba jameí?

Wügúri Gadárana le gawágubei espíritugu wuríbatíña

(Mt. 8.28-34, Mr. 5.1-20)

²⁶Ába jachúlürün loubawagun Gadára, le loubáfurugubei lagúnu, ligíbugíne Galiléa. ²⁷Dan le larárirunbei Jesúsu, ába liábin ában wügúri lílana fulásu ligía lubádun. Lújali wügúri ligía gawágu espíritugu wuríbatíña. Madáüti anáanguni, maganoún ligía tídan múna, lídan buri jabára jiláaña le achigíti luágu dúbü lagánawa. ²⁸Dan le laríjinbalin wügúri ligía Jesúsu, ába lájuduragun ligíbugíne, ába lagúaragun.

—¿Ca uágu bemétera númoun, Jesúsu Liraú Búngiu le Íñugutimaabei? Ayúmuraguatina bun lun masúfuriragüdün bánina.

²⁹Laríñagunbei ítara ladúga lagúmadiruñein lan Jesúsu espíritu ligía lun láfuridun lídaangiñe. Saráguja weíyaasu lárügüdüni espíritu wuríbatí ligía, ábaja jagúraguni gürígia lújabu lúma lugúdi láu güríngüri lun ledéraguagüdün, ábaja látumuraguni, ába lanúragüdüni espíritu lídoun fulásu le mageírawati. ³⁰Ába laríñagun Jesúsu lun.

—¿Ca bíri?

Ába laríñagun.

—Lejión níribei.

Laríñagunbei luágu ligía lan líribei ladúga gíbeeña espíritugu wuríbatíña ja ebélurubaña lídoun. ³¹Ába jamúriajan espíritugu jagía lúma Jesúsu lun moúnajan lániña máfiougatin. ³²Queíti nínanu jamá sarágu büüruju eíga luágu ában wúbü yaráfa, ába jayúmuragun espíritugu jagía lun lun loúnajaniña jádoun büüruju jagía, ába lánjarun Jesúsu. ³³Ábati jáfuridun espíritugu wuríbatíña jagía lueí wügúri ligía, ába jebélurun jádoun büüruju, ábati jáguragun büüruju jagía jóungua lueígiñe ában gudúungu, ába jáburujan lídoun lagúnu, ába jañáradagun.

³⁴Dan le jaríjnbalin ja oúnigirubaliña búuruju cátei le asúseredubei, ába janúfudedagun, ába jeíbaagun abájüdagui ubúru gu lúma áraabu. ³⁵Ábati jóúdingua güri gía aríjei cátei le asúseredubei. Dan le jachúlürünbei le ní lubei Jesúsu, ába jadáriruni wügüri le ídaangiñebei jáfurida espíritugu wuríbatíña ñun lubádu lugúdi Jesúsu, táu lanáangun, areídagu aali, ába janúfudedagun. ³⁶Játi buga aríjubalin, ába jabájüdaguni luáguti lareídagun wügüri lé buga gawágubei espíritugu wuríbatíña joun, ³⁷ába jayúmuragun lílana fulásu ligía lun Jesúsu lun lídin nígiñe, ladúga janúfude. Ábati ládinun Jesúsu tídown ugúnein lun lídin, ³⁸ába layúmuragun wügüri le ídaangiñebei jáfurida espíritugu lun lun lídin lúma, ába laríñagun Jesúsu lun lun leréderun, laríñaga lun.

³⁹—Girí bubá búbiñoun, ábame babájüdaguni sun le ladúgübei Búngiu bun. Ába lídin, ába labájüdaguni le ladúgübei Jesúsu lun lídan sun fulásu ligía.

Liraú Jáiro túma wúri to agúrurubarun lanáangun Jesúsu
(Mt. 9.18-26, Mr. 5.21-43)

⁴⁰Dan le lagíribudunbei Jesúsu loubáfurugun lagúnu, ába jerésibiruni güri gía láu ugúndani ladúga sun jagía agúrabañu jáñein. ⁴¹Ábati liábin ában wügüri giríti Jáiro, le ábanbei jádaangiñe tábutigu jalígílisin juríu, ába lájuduragun lubádu lugúdi Jesúsu, ába layúmuragun lun lun lídin lúbiñe, ⁴²ladúga ában rügúñoun liraú, queí buri dúusu irúmu táu, touwe. Dan le lídinbei Jesúsu, ába jafálaruni sarágu güri gía darí lun jámurudaguni.

⁴³Níñounti ában wúri jádan, dúusu irúmu táu láu lésejan jítaü tídaangiñe. Gásta táali sun tiseínsun jawágu surúsiagu, siñá jamutu areídaguagüda. ⁴⁴Ába tayárafadun lun Jesúsu lanáangangiñe, ába tagúruruni táru lanáangun, lídan méme óra ligía ába tareídagun.

⁴⁵Ábati laríñagun Jesúsu.

—¿Ca agúrurubei nuágu?

Quei sun lan jagía aríñaga luágu magúrurúnwa lan luágu, ába laríñagun Pédro jáma líbirigu.

—Maésturu, murúgu wañátia ya lurúma jíbe güri gía, ¿álügüda jagidibu ca lan agúrurubei buágu?

⁴⁶Ába laríñagun Jesúsu.

—Gurúwaali nuágu, ladúga sandí numuti luágu areídaguagüdaadina lan güri gía láu nubáfu.

⁴⁷Dan le tasúbudiruni wúri tugúya luágu subúdiwaali lan, aba tiábin adádagareina, ába tájuduragun lubádu lugúdi Jesúsu, ába tagúf eserun lun jagíbugiñe sun güri gía ca lan lébubei tagúrurun luágu áni ába lan tareídagun lídan méme óra ligía. ⁴⁸Ábati laríñagun Jesúsu tun.

—Niraú, areídagu aadibu ladúga bafíñerun nuágu. Beíba darángilañu.

⁴⁹Nígili Jesúsu adímureja, ligía lachúlürün ában lúbiñegiñe Jáiro, ába laríñagun lun Jáiro.

—Jilá biraú, mebérésejadügüiyabá lun Maésturu.

⁵⁰Dan le lagáambunbalin Jesúsu le, ába larínagun lun.

—Manúfudedabá, afíñerügübá, ábame tareídagun biraú.

⁵¹Dan le lachúlürünbei Jesúsu lúbiñoun Jáiro, mígirunti lun jebélurun ámu lúma lueídügüya Pédro, Jacóbo lúma Juan jáma tagúbürigu irájü tugüya. ⁵²Jayájuña sun ja ñíbaña tárigi, ába larínagun Jesúsu joun.

—Mayájua jumá, moúnwentu, tarúmugarügüña.

⁵³Ába jéjerajan láu ladúga subúdi jamáni luágu jilá tan. ⁵⁴Ábati lárügüdüni Jesúsu tújabu, ába larínagun láu umálali jéreti.

—Írájü, sarába.

⁵⁵Ába táguuyugun, ába tásaarun lídan méme óra ligía, ába larínagun Jesúsu lun jíchugun eígini tun. ⁵⁶Weíriti janígi tagúbürigu, ába larínagun Jesúsu joun lun mabájüdagun jamáni le asúseredubei ni ca un.

Loúnajaniña Jesúsu dúusu apóstolugu apúrichija

(Mt. 10.5-15, Mr. 6.7-13)

9 ¹Ába loúndaruniña Jesúsu dúusu láni apóstolugu, ába líchugun ubáfu joun lun jaságarun sun jawúyeri espíritugu wuríbatíña lúma lun jareídagugüdüni sánditiña. ²Ába loúnajaniña apúrichijeí ugánu luáguti larúeijan Búngiu lúma areídagugüdaña sánditiña. ³Larínaga joun.

—Manúga jumá ni cáta júmagua luágu juweíyasun—ni bádun, ni ságü, ni fein, ni seínsu. Ábanrügütá símisi janúgiin. ⁴Furúmieguaugü múna to ñíjin lumúti jachúlúra, reídei jumá ñi darí jídin lídaangiñe fulásu ligía. ⁵Le ñí lumuti merésibirúniwa jumá, dánme le jáfuridun lídaangiñe fulásu ligía, ábame jáfuruduni calíqui lueígiñe jugúdi, arúfuda jumámugei luágu magúndan jumá láu jagáburi lílana fulásu ligía, ígira jumáña quei jadáriragun jóungua.

⁶Ábati jáfuridun apóstolugu jagía, ába jeíbuguni sun lirájüñü fulásu apúrichijeinei ugánu luáguti asálbaruni, areídagugüdeina jagía sánditiña lídan sun fulásu le ñí lumuti jóúdin.

Loúnwen Juan le abásteragüdjabeí

(Mt. 14.1-12, Mr. 6.14-29)

⁷Ába lagáambun gumádimati Heródes luágu sun cátei le ladúgübei Jesúsu, ibídiñetiti lun cába lan larítagua, ladúga ñíñanu arínagutiña luágu saráali lan Juan lídaangiñe ouweni, ⁸jíbiri arínaga luágu proféta Elías lan achúlaagubei, jíbiri arínaga luágu ában lan jádaangiñe jíbiri binádu profétagu le ásaaruti lídaangiñe ouweni. ⁹Ába larínagun Heródes.

—Áu guánarügü óunajabeí adúrürei lichúgü Juan. ¿Cátei funáti le, le uágubei nagáamba labájüdawagún sarágu cátei?

Ábati loúchun Heródes laríjini Jesúsu.

Leígagüdün Jesúsu seíngü mílu wügúriña
(Mt. 14.13-21, Mr. 6.30-44, Jn. 6.1-14)

¹⁰Dan le jagíribudun apóstolugu, ába jabájüdagun lun Jesúsu luágu sun le jadúgübei. Ábati lanúgüniña lídoun fulásu mageírawati yaráfa lun Betsáida. ¹¹Dan le jasúbudirunbalin gürígia, ába jafálaruni, ába lerésibiruniña Jesúsu, ába ladímurejan joun luágu larúeijan Búngiu, areídaguagüda láña sánditiña.

¹²Dan le lagúmeserunbei adárüda, ába jayábin láni Jesúsu dúusu apóstolugu lúmoun, ába jaríñagun lun.

—Oúnaja báña gürígia ja, ñüdün jamámuga áluga jabára lun jeméraagun, áluaja jagíame eígini lídan buri lirájüñü aúdü lúma lídan buri fulásu yaráfati, ladúga úati ni cáta ya.

¹³Laríñaga Jesúsu joun.

—Rújuma eígini joun.

Jaríñaga lun.

—Seíngü rügüñoun fein wáma jáma bián úduraü, ánjawa gubeírügü ñüdün agáñija eígini joun sun gürígia ja.

¹⁴Yaráfañanu joún seíngü mílu wügúriña ñi, mabájüdunga würiña jáma irájüñü. Ába laríñagun Jesúsu joun láni disípulugu.

—Ñurúgüda jumáña dimí dimí-san.

¹⁵Ába jadúgüni ítara, ába jañúurun súngubei. ¹⁶Ábati lanúgünun Jesúsu seíngü fein lújaburugu jáma bián úduraü, ába laríjin siélun, ába líchuguni etefingiruni lun Búngiu. Lárigiñe lagúbachagunun fein lúma úwi, ába líchuguni joun láni disípulugu lun jafánreinjani jádan gürígia. ¹⁷Joútiña súngubei quimúle, dan le jabúdajanun ígiragutu, buíngüdatiña dúusu faníñe láu.

Laríñaguni Pédro luágu Jesúsu lan Crístubei
(Mt. 16.13-19, Mr. 8.27-29)

¹⁸Luágu ában wéyu dan le layúmuraguña lan Jesúsu lábugua, ññnanu láni disípulugu díseraü lueí, ába laríñagun joun.

—¿Ída liñasan jaríttagun gürígia nuágu? ¿Cátanasan, según jagía?

¹⁹Ába jaríñagun lun.

—Añájein, aríñagutiña luágu Juan lan le abásteragüdajabei amúrü, jíbiri, aríñaga Elías, añájeingua aríñagutiña luágu ában lan jádaangiñe binádu profétagu ásaaruti lídaangiñe oúweni amúrü.

²⁰Ábati laríñagun joun.

—Ángi jugúya, ¿cátanagi lídan jaríttagun?

Laríñaga Pédro lun.

—Crístu, le loúnajabei Búngiu lun lasálbaruniña gürígia, amúrü.

Ladímurejan Jesúsu luágu loínwen
(Mt. 16.20-28, Mr. 8.30-9.1)

²¹Ába laríñagun Jesúsu joun láu éregu lun maríñagun jamáni cátei le ni ca un. ²²Ába laríñagun joun.

—Nasúfuriruba sarágu, áu le Wügúri Garaúwarügüti. Janúgübadina wügúriña weírigutiña lídan jafíñen juríu, jábutigu fádirigu, jáma arúfudajatiña lilúrudun Moisés, quei ni cáta. Nafarúaba jilágubei, ábame násaarun lídaangiñe ouweni luágu lúriwan wéyu lúnya nabágaridun.

²³Lárigiñe, ába laríñagun joun súnigubei.

—Le busénti nánigu lan, bulíleleí cáteíñein lan, awándaleí sun luwúyeri asúfuriruni le lúnbei liábin lun, nueígiñe, queísi lanúgüni ában wügúri lugúruwan, falálana. ²⁴Ladúga le abúseeruti leséfuragun lúngua ya ubouágu leféridirubei ibágari le magúmuchaditi, ánjein le ánjabai leféridiruni libágari ya ubouágu nueígiñe, libíjubei ibágari le magúmuchaditi siélu. ²⁵¿Cági ju lan lun gürígia lagáñeiruni sun le lánina ubouí, leféridireime lubára siélu o lagúnrinchaguba lan lúngua? ²⁶Le anúgüti busíganu nuágu lúma luágu nerérun, áu le Wügúri Garaúwarügüti, nibúsigaribadina gíñe láu dánme le niábin quei urúei láu luweírigun Núguchi jáma ánjeligu ja sándubaña. ²⁷Ninárün naríñaguni jun luágu añájein lan jádaangiñe ja yábaña guetó, moúnwenbaña maríjinga jameí larúeijan Búngiu.

Lámuñedagun larijín Jesúsu
(Mt. 17.1-8, Mr. 9.2-8)

²⁸Queíburi wídü wéyu lárigiñe laríñaguni Jesúsu cátei le, ába laweínrun luágun ában wúbü ayúmuragua lun Búngiu, barú lumútiña Pédro, Jacóbo, lúma Juan lúmagua. ²⁹Dan le niján lan Jesúsu ayúmuragua, ába lámuñedagun ligíbu, ába tájarudun lanáangun, ába támiridun.

³⁰Ábati jasálriragun Moisés lúma Elías ayánuja lúma, ³¹geyégu líña ában larúgounga weíríti jáu, jayánujaña libúgürü ouweni le lúnbei lasúfuriruni Jesúsu, Jerusalén. ³²Láu sun luweírín lidábu lágu Pédro jáma líbirigu, marúmuguntiña, aríja jamúti luweírigun Jesúsu jáma bián wügúriña ja lúmabaña. ³³Dan le adísedeinaña bián wügúriña jagía lueí Jesúsu, ába laríñagun Pédro lun.

—Maésturu, ¡lídan dan awánja lan ya! Adúga wamá úriüwa dibásein ya—ában bun, ában lun Moisés, túma ában lun Elías.

Ibídiñeti lun Pédro ca lan laríñagubei. ³⁴Súnti niján lan adímureja, ába liábin ában juánriñu ouburaguaña, ába janúfudedagun ladúga jadáriragun jóungua lurágeirugu juánriñu ligía. ³⁵Ábati jagáambun ában umálali aríñaguti lídaangiñe juánriñu ligía.

—Niráú le jínsiñebei nun le, agáamba jumeí le lubeíbei.

³⁶Lárigiñe ladímurejan umálali ligía, ába jaríjin disípulugu luágu lábugua rügáali lan Jesúsu. Reídeitiña maníñu, maríñagun jamúti cátei le jaríjubei lun ni ában lídan dan ligía.

Lareídaguagüdün Jesúsu ában irájü gawáguti espíritu wuríbatí
(Mt. 17.14-21, Mr. 9.14-29)

³⁷Larúgan, dan le jarárirunbei lueígiñe wúbü, sarágu jáña gürígia ñúdüntiña lubároun Jesúsu. ³⁸Ábati lagúaragun ában wügúri jádaangiñe láu umálali jéreti, laríñaga.

—Maésturu, fuleíseijabubá nun, arijabeí niraú le ligía rügúñeibeí, ³⁹níjein ában espíritu wuríbatí luágu, dan le lárügüdüni, ába lagúaraguagüdüni, ába louwejan, ába láfurijan jacútaü liyúmulugugiñe. Añáwuriya lumúti, májati lígiruni. ⁴⁰Ayúmuraguadina joun báni disípulugu lun jaságaruni espíritu wuríbatí le lueí, siñá jamuti.

⁴¹Ába louñabun Jesúsu, laríñaga.

—¡Jugúya gürígia mafíñeraditiña, wuríbatíña! ¿Átiribeísan dan lun neréderuni júma lubá gayára lan jafíñerun nuágu? ¿Ídame lagúmucha mafíñeni le jídaanbei? Barúbei biraú ñájoun.

⁴²Dán yebe le lídin irájü ligía lun, ába lájuchuruni espíritu wuríbatí múarugún, ába louwejugüdüni, ába ladeínjan Jesúsu lun espíritu wuríbatí ligía, ába lareídaguagüdüni irájü, ába ledéregeruni lun lúguchi. ⁴³Ába laweíridun janígi súngebui láu luweírigun Búngiu.

Ladímurejaanya Jesúsu luágu louñwen
(Mt. 17.22-23, Mr. 9.30-32)

Sun añája lan láu luweírin janígi láu le ladúgübei Jesúsu, ába laríñagun joun láni disípulugu.

⁴⁴—Agáamba jumeí cátei le buídu. nedéregerúaba, áu le Wügúri Garaúwarügüti, jájaburugun náganiñu.

⁴⁵Úati gunfaráanda jamáni disípulugu le laríñagubei, ladúga darúñu líña jasáminan lun cátei le, áni janúfudetiñati lun jaríñagun lun lun lafúnraanguagüdüni le laríñagubei, joun.

¿Ca weírigutimaabei?
(Mt. 18.1-5, Mr. 9.33-37)

⁴⁶Ábati jagúmeserun disípulugu asígeneja jámagua luágu ca lan weírigutimaabei jádan, ⁴⁷quei lasúbudiruni Jesúsu jasáminan, ába lanúgün ában irájü lubáduagun, ⁴⁸ába laríñagun joun.

—Le erésibiruti ában irájü queísi irájü le lídan níri, resíbi lumútina, le erésibirutina, resíbi lumúti gíñe le oúnajabalina. Le lubeíti únabugutimaabei jídan, ligía weírigutimaabei.

Le mámabei wágani, wámagiñeñein

(Mr. 9.38-40)

⁴⁹Ábati laríñagun Juan lun Jesúsu.

—Maésturu, aríjatiwa ában wügúri aságajati espíritugu wuríbatíña lídan bíri, ába wewéridiruni ladúga máma lan ában wádaangiñe.

⁵⁰Laríñaga Jesúsu lun.

—Mewéridira jumeí, ladúga le mámabei wágani, wámagiñeñein.

Ladeíñjan Jesúsu lun Jacóbo lúma Juan

⁵¹Dan le layárafadun dan lun lanügúniwa Jesúsu siélun, ába ladúgüni luweíyasun Jerusaléoun láu anígi. ⁵²Ába loúnajan loúnagülegu lubá, ába jóudin lídoun ában liraúraü fulásu lání Samária lun jáluajan múna lubá, ⁵³májatiña Samariána jerésibiruni ladúga jaríjin luágu leíbuga lan Jerusaléoun. ⁵⁴Dan le jaríjinbalin Jacóbo lúma Juan luágu mája jamá Samariána jerésibiruni, ába jaríñagun lun.

—Wabúreme, ¿buséntibu lun wamúriajan lun larárirun wátu geméti siélugiñe lun lagúmunchun jáu queí meja ladúgüni proféta Elías?

⁵⁵Ábati ladígiragun Jesúsu jawágun, ába ladeíñjan joun, laríñaga.

—Ibidiñeti jun luágu wuríba lan cátei le jayúmajabei. ⁵⁶Máma niábiña, áu le Wügúri Garaúwarügüti, agúnrinchaguei jabágari gürígia, niábiña asálbarei. Ábati jóudin lídoun ámu liraúraü fulásu.

Já yebe busénbaña jafálaruni Jesúsu

(Mt. 8.19-22)

⁵⁷Dan le luágu jamá úma, ába laríñagun ában wügúri lun Jesúsu.

—Nabúreme, buséntina nafálarunibu le ñíjin lumúti bídin.

⁵⁸Laríñaga Jesúsu lun.

—Darítiña gasígamu júyu lun jaganoún ñi, gádibu jagía dunúru, ánjein áu le Wügúri Garaúwarügüti, úati ni jalíaba lan nabálachagüdei nichügü.

⁵⁹Laríñagaya Jesúsu lun ában.

—Falábana.

Laríñaga lun.

—Nabúreme, lárigiñeme loúnwen nóguchi, buná neíme, ábame neíbugun búma.

⁶⁰Ába loúnabuni Jesúsu.

—Falábana guetó, ígira báña ja jiláñubaña lun cátei le lánina larúeijan Búngiu lun jábununiña jegéburi, ánjein bugúya, beíba apúrichijei ugánu luáguti larúeijan Búngiu.

⁶¹Ábayati laríñagun ában lun.

—Nabúreme, buséntina nafálarunibu, neíba yebe ayoúragua joun ja wábiñebaña.

⁶²Laríñaga Jesúsu lun.

—Le íchuguti lújabu luágu awoújagülei, lárigiñe ába laríjin lárigoún, mabuídunti lun lílaname larúeijan Búngiu.

Loúnajaniña Jesúsu úrüwa-wein-díisi disípulugu apúrichija

10 ¹Lárigiñe cátei le, ába lanúadajan Jesúsu úrüwa-wein-díisi jádaangiñe lánigu, ába loúnajaniña lubá, bián bián, lídoun sun ageíraü lúma fulásu le lúnbei lídin ñi. ²Laríñaga joun.

—Inárüni, gíbetiña gürígia ja aráanseñabaña lun jagáambuni ugánu luáguti asálbaruni, jagía, ítara jáña queísi nádü le lúnbei lalúbajoúniwa, áni loúguatiña ñadágimeintiña. Ligía lúnti lubeí jamúriajan lúma Búngiu lun loúnajan ñadágimeintiña jagánaguóun. ³Jeíba, noúnajañadün quei mudún jádoun anímaalu gáñitiña. ⁴Manúga jumá ságü júmagua, ni seínsu, ni geídi, meréderagun jugúyame ayánuja ni ca úma luágu úma. ⁵Dánme le jebélurun tídoun ában múna, busújuma furúmiñe, jaríñagame. “Darángilaü joun tílana múna to.” ⁶Ánjein añájein lubeí gürígia jínsiñejabutiña lun darángilaü tídan múna tugúya, jerésibirubadün láu ugúndani, joúnbei abúsuruni lánina darángilaü. Ánjein úa jabeí gürígia jínsiñejabutiña lun darángilaü tídan múna tugúya, giríbugüda jumeí abúsuruni. ⁷Reídei jumá tídan múna tugúya to ñí lubei jerésibirúa, jou jumeíme, gurá le íchugúti jun úouga busíganu, ladúga garíchatí ñadágimeinti lun lafáyeirua. Masáansija jumá múna. ⁸Dánme le jachúlürün lídoun ában ageíraü le ñí lumuti jerésibirúa, joújumei le íchugúti jun, ⁹areídaguagüda jumáña sánditiña ja ñítiña, jaríñagame joun lílana fulásu ligía. “Subúdigüdáwaali luáguti larúeijan Búngiu jun.” ¹⁰Ánjaün achúlüra lídoun ában ageíraü le ñí lumuti merésibirúniwa jumá, furíjuma lídoun buri úma, jaríñagame. ¹¹“Ásta licáliquin jageíra le luágubei wagúdi furú wamuti lun warúfuduni jun luágu magúndan wamá láu jigáburi, áni subúdi jumeí luágu subúdigüdáwaali lan luáguti larúeijan Búngiu jun.” ¹²Naríñajare jun luágu lídan lánme luwéyuri lagúseragüdüniña Búngiu gafígountiña, janárimetimaabei jabeichúniwa lílana fulásu le merésibirunbadün sügú láu jabeichún lílana ubúругu le Sodóma.

Lílana ageíraü buri magáambaditiña

(Mt. 11.20-24)

¹³¡Fugiábu jugúya lílana Corazín! ¡Fugiábu jugúya lílana Betsáida! Ladúga lun jamúga ubúругu lan Tíro o Sidón ladügúwa buri miláguru le adügúbei lídan jubúrugute, binárü jamúga lasáansiragua jagáburi lílana, ába jamúga jarúfuduni láu jadáüragun lúdu lúma balígi. ¹⁴Ánjein jugúya, lídaanme luwéyuri agúseruni, weíritimaabei jabeichúniwa sügú jáu gürígia Tírona jáma Sidónna. ¹⁵Amúrüti, ubúругu le Capernaúm, ¿jarítaguatibu luágu liñurúaba lan bíri queísi líñun siélu? Larárirawagüdüwaba bíri únabun queísi lúnabun máfiougati.

¹⁶Ába laríñagun Jesúsu joun úrüwa-wein-díisi disípulugu ja loúnajañabaña apúrichija luágu larúeijan Búngiu.

—Le agáambutün, agáamba lumútina, le májati lagáambunün, májati gíñe lagáambunina, áni le májati lagáambunina, májati gíñe lagáambuni Nóguchi le oúnajabalina.

Jagíribudun úrüwa-wein-díisi disípulugu

¹⁷Ába jagíribudun úrüwa-wein-díisi disípulugu jagía lídaangiñe jawéiyasun láu ugúndani, aríñageina jagía.

—Wabúreme, ásta espíritugu wuríbatíña agáamba jamútiwa dan le waságaruniña lídan bíri.

¹⁸Laríñaga Jesúsu joun.

—Ánja, aríja numúti ligáburi leíguadun Máfia siélugiñe quei ában labírijanouga. ¹⁹Rújadina ubáfu jun lun jadúgüragun jéwe jáma águru, masúfurirunga ni cáta, luma lun jére lan jubáfu lueí lubáfu Máfia. ²⁰Láu sun líra, magúndaara jumá luágu jagáambunün espíritugu, gúnda jumá luágu níjein lan jírí bürúwañu tídan lilíburun Búngiu siélu.

Lagúndaarun Jesúsu (Mt. 11.25-27, 13.16-17)

²¹Lídan óra ligía, ába labuínchagüdüni Sífiri Sándu Jesúsu láu ugúndani, ába laríñagun.

—Nóguchi, le Labúremebei siélu luma múa, inúragüda numúti bíri, ladúga arámuda báali cátei luáguti barúeijan jaweí chútiña áu jáma furéndeitiña, ába bafúraanguagüdüni joun ja louguabaña ufúrendeí queísi irájüñü. Ánja, Nóguchi, ladúga ítara líña babúseeruni.

²²Derége láali Nóguchi sun cátei nun. Úati ni ában subúdíjabuti cáтана lan lueídügüya Nóguchi, úati gíñe ni ában subúdíjabuti cáteiñein lan Nóguchi nueídügüya jáma ja úntiña nabúseera nasúbudiragüdüni.

²³Ábati ladígiragun adímureja joúnrügü láni disípulugu, laríñaga.

—Fuleíseiwatiña ja aríjubalin cátei le jaríjubei jugúya, ²⁴ladúga naríñajare jun luágu sarágu jáña urúeigu jáma profétagu abúseerutiña yebe meja jaríjini le jaríjubei jugúya guetó, maríjin jamúti, busén jagía yebé meja jagáambuni le jagáambubei guetó, magáambun jamúti.

Jémpulu luáguti Samariána le buídubei

²⁵Lídan ában guríriguaü, ñíñein ában arúfudajati lilúrudun Moisés, abúseeruti louchaguni Jesúsu, ába lásaarun, ába laríñagun lun.

—Maésturu, ¿cábasan nadúga lun gayára lan nibíjini ibágari magúmuchaditi?

²⁶Laríñaga Jesúsu lun.

—¿Cáteigi bürúwañubei lídan lilúrudun Moisés? ¿Ída liñágia balíijan ñi?

²⁷Ába loúnabun, laríñaga.

—Jínsiñelá Babúreme Búngiu bun táu sun banígi, táu sun buwáni, láu sun bére, lúma láu sun bisáminan, jínsiñe jagíame bíbirigu bun quei bínsiñegua búngua.

²⁸Ábati laríñagun Jesúsu lun.

—Oúnabaadibu buídu, ánjein badúga ítara, bibíjubei ibágari magúmuchaditi.

²⁹Queíti busén lan arúfudajati ligía larúfuduni luágu buídu lan lálügüdajan, ába laríñagun lun Jesúsu.

—¿Cátañagi níbirigubaña?

³⁰Ábati loúnabuni Jesúsu, laríñaga lun.

—Ñínein ában wügúri arágachuti Jerusaléngiñe lun ubúrugun Jericó, luágu luweíyasun ába járügüdüni jíwerutiña, ába jíwerujani sun le lúmabei ásta lanáangun, buleísei jameí, ába jígiruni jílá mémeeli. ³¹Ába lásügürün ában jafádirin juríu lídaangiñe méme úma ligía, dan le laríjinbalin wügúri ligía, mebéresenti láu, ába lasígiruni leíbugun loubáfurugugiñe úma. ³²Sügü ligía ában jádaangiñe ladúgawagun Leví nígiñe, dan gíñe le laríjini wügúri buleíseiwaali ligía, ába gíñe lasígiruni leíbugun loubáfurugugiñe úma, mebéresenga gíñe láu. ³³Ábati lásügürün ában wügúri Samariána aweíyasujati lídaangiñe úma ligía, dan le laríjinbalin, ába lagúdemedagun lun. ³⁴Ába liábin, ába lagáranijan lun bíti buri le luágubei láu aílí túma diweín, ába lagúraguni. Ába laweínragüdüni luágu lilügün burígü, ába lanügüni tídoun jában chülüdügütiña, ába ladügüni le liyáraati lun. ³⁵Larúgan, dan le leíbuga lan Samariána ligía, ába láluguchun bián seínsu le denáriu, ába líchuguni lun tabúreme múna, laríñaga lun. “Tóunigibeí wügúri le, ánjabu agástara ámu lueí le níchugubei bun luágu, nafáyeirubei bun dánme le nagíribudun.”

³⁶Ábati lálügüdüni Jesúsu arúfudajati ligía.

—¿Cáteiti jádaangiñe úrüwa wügúriña ja líbiribeí le ueíbei líwerujoúa, lídan barítangun?

³⁷Laríñaga lun.

—Le gudémejabubei lun.

Laríñagati Jesúsu lun.

—Ítaralá gíñe badúga.

Jesúsu jábiñe Márta túma María

³⁸Ába lasígirun Jesúsu luágu luweíyasun jáma lánigu, ába lachúlürün lídoun ában liraúraü fulásu le ní lubei terésibirei ában wúri gíritu Márta, túbiñe. ³⁹Ñínoun ában tamúlelua Márta gíritu María, ába tañúurun lubádu lugúdi Jesúsu lun tagáambuni le laríñagubei, ⁴⁰ánjounti Márta, weíríti teténirun lun tubéresegun. Ába taríñagun Márta lun Jesúsu.

—Nabúreme, ¿mebéresentibusan láu tígirunina namúlelua adúgei sun berésegu nábugua? Aríñagabá tun lun tíderagunina.

⁴¹Ába loúnabunun Jesúsu, laríñaga tun.

—Márta, bafúuduña luágu sarágu cátei, ⁴²buídurügüti murúsun lun weígin. Anúadaja táali María lubuídun-ágei cátei le lúnbei ladügúniwa, áni úabei ni ában lun lagídaruni tueí.

Larúfudajani Jesúsu ayúmuraguni lun Búngiu

(Mt. 6.9-15, 7.7-11)

11 ¹Luágu ában wéyu, layúmuraguña Jesúsu lun Búngiu lídan ában fulásu, dan le lásurun, ába laríñagun ában jádaangiñe láni disípulugu lun.

—Nabúreme, arúfudajabá ayúmuraguni woun quei larúfudajan Juan joun láni disípulugu.

²Laríñaga Jesúsu lun.

—Dánme le jayúmuragun lun Búngiu, jaríñagame itara.

Wáguchi Búngiu le siélubei,
inébewalá bíri.

Núbinlá bidáani lun barúeijan ya uboúagu,
adügúwalá bugúndan uboúagu quei ladügún bugúndan siélu.

³Rúboun fein buídurügütu woun lun wéyu le ugúñbeí.

⁴Ferúdunabeí wuríbati le adúga wamáalibeí quei ferúduna wamániña ja adügübaña wuríbati woun.

Mígira báwa lun wáburujan lídoun wuríbani,
dísegüdarügü báwa lueí.

⁵Aríñagati gíñe Jesúsu joun.

—Niján ában jémpulu jun. lídin jamúga ában jádaangiñe lúbiñe ában lumáda amídi árieibu, ába laríñagun lun. “Numáda, furédeibá úrúwa fein nun, ⁶ladúga sun líña lachúlürün ában numáda núbiñoun áni úati ni cáta núma lun níchugun lun.” ⁷Ába jamúgati loúnabun le ában múnadagiñe, laríñaga jamúga. “Mebéreseja bána, darúnaali nubéneri, áni roúnjadina jáu sun nisáanigu, siñáti násaarun íchiga ni cáta bun.” ⁸Naríñaguña jun luágu íbini lan jamúga másaarun lan íchigoun lun ladúga lumáda lan, lásaaruña jamúga íchigoun lun lueí lasígirun ebéreseja lun. ⁹Aríñagatina lubeíti jun. Jamúriaja, ábame líchugun Búngiu jun, jáluaja, ábame jadárirun, jadaúnja luágu béna, ábame lánjunrenchúniwa jun. ¹⁰Ladúga sun le amúriajati, ibíjati, le áluajati, daríti, le adaúnjati luágu béna, junrénwati lun.

¹¹¿Gayáraabei funági líchugun ában úguchili jádaangiñe dúbü lun liraú dan le lamúriajan fein luma? ¿o líchugun lan ában jéwe lun dan le lamúriajan úduraü? ¹²¿o líchugun lan ában águru lun dan le lamúriajan gañeín? ¹³Gíchigadijadün ligía cátei buíti joun jirájüñü láu sun juríban, ¡gúbumeti líchigei Júguchi Búngiu le siélubei Sífiri Sándu joun ja amúriajati!

Laríñawagún luágu níjein lan lubáfu Máfia lúma Jesúsu
(Mt. 12.22-30, Mr. 3.19-27)

¹⁴Níñein Jesúsu aságara ában espíritu wuríbati lueí ában wügúri le madímuregüdün láalibei yebe espíritu ligía, dánti le láfuridunbei espíritu wuríbati ligía, ába gayára lan ladímurejan meréngaditi ligía. Ába laweíridun janígi gürígia láu cátei le. ¹⁵Níñanu gíñe, aríñagutiña.

—Láu lubáfu Beelzebú, le Máfia, le jábuti máfianu, laságaja wügúri le espíritugu wuríbatiña.

¹⁶Jíbiri, lun jóuchaguni, ába jamúriajan miláguru lúma lun larúfuduni luágu lúmagiñe lan Búngiu liábin lubáfu. ¹⁷Queíti subúdi láani le jarítagubei, ába laríñagun joun.

—Furúmieguaugü arúejani le afánreinraguti lun jageíndagun jámagua, lagúnrinchaguba, ában gíñe família fánreinguatiña ladúga wuríbu, jagúnrinchaguba gíñe. ¹⁸Ánjein gíñe níjein lubeí fánreinguau jádan Máfia jáma lánigu, ¿ída lubági ladúrarun lubáfu? Naríñagunbalin le, ladúga jaríñagun luágu láu lan lubáfu Máfia naságaja espíritugu wuríbatiña ja ebélagüdübaña Máfia guánarügü jádoun gürígia, ¹⁹áni ánjein ítara líña lubeí, ¿cági íchugubei ubáfu joun ja jánigu jugúya lun jaságajan espíritugu wuríbatiña, Máfia ódi Búngiu? Láu líra, jagía guánarügü arúfuda jamúti luágu bulfeigua jumá. ²⁰Le inárünibei, láu lubáfu Búngiu naságaja espíritugu wuríbatiña, áni arúfuda lumúti líra luágu chülújali lan larúejan Búngiu lídoun fulásu le.

²¹Ába wügúri jéreti, dan le aráanseñu lan, toúnigi lúban buídu, sun le lúbiñebei choúruti. ²²Ánjein núbín ában jéretimaati lueí ába lásiiraguni, lagídaruboun sun lárumate to uáguboun leménigida lueí, ábame lanúgüni le labúseerun, ába lafánreinraguni jáma lumádagu.

²³Le mámabei númagiñe, náганиñein, le míderagun lumútina, güríngua lumúti le nadúgübei.

Espíritu wuríbati le agíribudúbei
(Mt. 12.43-45)

²⁴Ába laríñagun Jesúsu.

—Dan le láfuridun ában espíritu wuríbati lídaangiñe ában gürígia, eíbugañajádügü líña lídan buri fulásu mábeiti áluaja leméraagun, dánti le madári láani, ába laríñagun lúnguarügü. “Nagíribudayá tídoun núban to nígíñe lubeí náfurida.” ²⁵Dánti le lagíribudun, ába ladáriruni gürígia buga ligía quei ában múná to buídawaru, aráanserúa. ²⁶Ábati lídin, ába liábin jáu sédü espíritugu wuríbatimaatiña lueí, ába jebélurun agánawa lídan gürígia ligía, wuríbatimaajaliti le gádaanbalin wügúri ligía lueí buga furúmiñe.

Ugúndani le tímatimaati

²⁷Dan le niján lubeí Jesúsu aríñagei cátei le, ába tagúaragun ában wúri jádaangiñe gürígia, taríñaga.

—¡Fuleíseiwatu jiñáru to agúriajabalibu, fuleíseiwatu to átagüdübalibu!

²⁸Ába laríñagun Jesúsu.

—¡Fuleíseiwatimaatiña ja agáambubalin le lubeíbei Búngiu áni abájüda jameí!

Amúriajatiña gürígia wuríbatíña miláguru lúma Jesúsu

(Mt. 12.38-42, Mr. 8.12)

²⁹Añája méme gürígia oúndaragua geyégu láu Jesúsu, ába lagúmeserun adímureja, laríñaga.

—Wuríbatíña gürígia ja lánina dan le, áni jamúriaja miláguru núma lun narúfuduni luágu Búngiu lan oúnajabalina, wel, míchugúnbei ámu seíni joun lueí le luáguti meja proféta Jonás. ³⁰Ítara queí meja le asúseredubei lun Jonás ában seíni joun ja aganoúbaña Nínive luágu Búngiu lan oúnajabalin, ítara lúba gíñe le lúnbei lasúseredun nun, áu le Wügúri Garaúwarügüti, ligíaba ában seíni joun gürígia ja lánina dan le luágu Búngiu lan oúnajabalina. ³¹Dánme le lidáani agúseruni, dánme le lagúseragüdüniña Búngiu gürígia ja lánina dan le, ábame tásaarun lurúeite Súru lun tasíadiruniña, ladúga tugúya, núbintu lídaangiñe lidíse-ágei uboú lun tagáambuni lichú láu Salomón, áu, weírigutimaatina sügú láu Salomón áni májatün jagáambunina. ³²Lídan mémeme agúseruni ligía, ábame gíñe jásaarun já meja aganoúbaña ubúru Nínive, ábame jasíadiruniña ja lánina dan le, ladúga sáansiguati jagáburi Nínivena lárigiñe lapúrichijani Jonás ugánu le lání Búngiu joun, áni áu ában le weíriguti sügú láu Jonás, áni májatün lun jagáambunina.

Lilámpun úgubu

(Mt. 5.15, 6.22-23)

Ába lasígirun Jesúsu aríñaga.

³³—Úati ébeduti ában lámpu líchigei lídan fulásu arámudaguati, ni tábugiñe ában gáfu, íñuba líchigei lun larúgoundadun joun ja ebélurutiña. ³⁴Ítara líña águu queí ában lámpu lun úgubu, ánjein buídu lubeí bágu, aríja ligía luágun cátei lánina Búngiu, camá jamuga jarúgoundabei gíñe láu sun búgubu, áni buídubei gíñe sun bigáburi. Ánjein sándi lubeí bágu, aríja ligía luágun cátei lánina uboú, camá jamuga lídaanbei lubúriga sun búgubu, wuríbabei gíñe bigáburi. ³⁵Toúnigibá lun mabúrigadun lan bilámpun. ³⁶Ánjein jarúgounda lubeí láu sun búgubu, úaga ni murúsun lubúriga, baríjubei sun cátei furáangu queí dan le durúngu líña lan lámpu báu.

Líchugun Jesúsu jadúnrun fariséogu jáma arúfudajatiña lilúrudun Moisés
(Mt. 23.1-36, Mr. 12.38-40, Lc. 20.45-47)

³⁷Dan le lagúmunchunbei ladímurejan Jesúsu, ába lamísurajani ában fariséo eíga lúbiñe. Ába lebélorun Jesúsu, ába lañúurun luágu dábula. ³⁸Ába laweíridun lanígi fariséo ligía láu magúnfulirun lan Jesúsu láu igáburi le lánina lachibún újabu lubá eígini. ³⁹Ába laríñagun Wabúreme Jesúsu lun.

—Jugúya fariséogu ragá jumuti wéru lúma asiedu boúgudigiñe libíti, múnadagiñe jibíti, wíyetün, buin jíña láu luweínamu águu lúma sarágu luwúyeri wuríbani. ⁴⁰¡Deré tagáambun jugúya le! ¿Ibídiñeti jun luágu le lan adúgübalin le boúgudigiñebei, ligía lan gíñe adúgübalin le múnadagiñebei? ⁴¹Jarúma jumá múnadagiñe jibíti láu jíchugun joun gudémetiña, ítara lúba jarúma jumá gíñe boúgudigiñe jibíti.

⁴²¡Fugiábugu jugúya fariséogu! Adúgatün dísi fánreinti láu jíduru le ménta, rúda, lúma ámu luwúyeri nádü lun jíchugun ában fánreinti lun Búngiu, áni madúgüntün gásu láu ísuruni lúma línsiñejabu Búngiu. Ligía lúnbei jadúgüni, mígirunga jumeíme jadúgüni le ában.

⁴³¡Fugiábugu jugúya fariséogu! Buséntün járügüdüni ubáraü le jabára ja weírigutimaabaña tídan jilígílisin, busén jugúya lun labúsurún jun láu sarágu inébesei úmada.

⁴⁴¡Fugiábugu jugúya fariséogu, biángua tigíbu!, ladúga ítara jíña quei umúajau le marijinti, sügü jagía gürígia ligíbuagugiñe ibídiñoun joun.

⁴⁵Ábati lounabun ában jádaangiñe arúfudajatiña lilúrudun Moisés, laríñaga.

—Maésturu, banábaguñadiwa gíñetia dan le baríñaguni le.

⁴⁶Ába laríñagun Jesúsu.

—¡Fugiábugu gíñe jugúya, arúfudajatiña lilúrudun Moisés! Jíchigei lilúrudun Búngiu queísi ában anúgüni júrüti joun ámu, áni jugúya, májatün janúgün ni murúsun lídaangiñe.

⁴⁷¡Fugiábugu jugúya!, ladúga rújumuti dúbü arítaguagüleime luágu jamúaja profétagu já meja jáfaragubaña binádu jagúbürigu. ⁴⁸Láu líra, arúfuda jumúti luágu gúnda jumá láu le jadúgübei binádu jagúbürigu, jagía áfaragubaliña, jugúya wéndegüda jumúti jamúaja.

⁴⁹Ligía laríñagunbei meja Búngiu láu lichú láu. “Noúnajaba profétagu jáma apóstolugu joun, ábame jáfaraguniña jíbiri jilágubei, eíbaaja jamáñame jíbiri.” ⁵⁰Ligía lagúseragüdübaña lubeí Búngiu gürígia ja lánina dan le luágu játa profétagu ja áfarawagübaña lúmagiñe ladügün ubou, ⁵¹lúmagiñe líta Abél lúmoun líta Zacarías le jáfarubei labádinagua latárü túma témpulu. Ligía naríñagunbei jun luágu lagúseragüdübaña lan Búngiu gürígia ja lánina dan le luágu joúwegun profétagu.

⁵²¡Fugiábugu jugúya arúfudajatiña lilúrudun Moisés!, ladúga ragú jumaali ligélen lubéneri subúdi, mebélorun jíña, mígirun jugúya lun jebélurun ja busénbaña jebélurun.

⁵³Dan le laríñagunbalin Jesúsu cátei lé buri joun arúfudajatiña lilúrudun Moisés jáma fariséogu, ába jagáñidun lúma, lárigiñe láfuridun lúbiñegiñe fariséo ligía, ába jagúmeserun ebéresejei láu sarágu buri álügüdajani ⁵⁴lun jaríjin ánjaña adárira lidúnrun.

Larúfudajan Jesúsu luágu mabuídun lan biángua lan igíbu

12 ¹Ába joúndaragun sarágu mílu gürígia, gíbetiña darí lun jachúinragun joúngua. Ába lagúmeserun Jesúsu aríñaga joúntima láni disípulugu.

—Toúnigi jumátia jaweí fariséogu, ítara líña jagáburi quei ísi—biánguañein jagíbu. ²Úati ni cáta lábugiñeti lubúriga lun mafúnraangudunbei lan, úa ni cáta arámudaguati lun masúbudirínwabei lan. ³Ítara líña lubeíti, sun le jaríñagubei lábugiñe lubúriga, lagaambúaba lídan larúgounga, le jaríñagubei lanágangiñe béna, lagúarajoúba tábulugugiñe múna.

Ca lan ueí lúnbei janúfudewa lan

(Mt. 10.28-31)

⁴Naríñajare jun, numádagu, moún lumuti janúfudedun jaweí gürígia ja gabáfubaña lun jáfarunün jilágubei, lárigiñe líra siñá jadúgün ámu cátei jun. ⁵Naríñagaali jun ca lan ueí lúnbei janúfudedun. Janúfude jumá lueí Búngiu le gabáfugilibei lun loúnajanun juwáni máfiougatin lárigiñe lagídaruni jibágari. Lueílá janúfueda.

⁶¿Ma alúgurúatiña seíngü dunúru luágu bián gáwanün? Láu sun mebégi jamá sarágu, mabúlieidunti Búngiu ni ában jádaangiñe. ⁷Ánjeinti jugúya, íbini ídiburi le jábulugubei abájüda láali Búngiu ában ában. Manúfude jumá lubeíti, gebégitiün sügü jáu sarágu dunúru ligíbugiñe Búngiu, áni loúnigirunáádün.

Ja meyéedagunbaña luágu Jesúsu jagíbugiñe gürígia

(Mt. 10.32-33, 12.32, 10.19-20)

⁸Naríñajare jun luágu sun lan ja aríñagubaña jagíbugiñe gürígia luágu nánigu jamá, naríñaguba gíñe luágu nánigu jamá jagíbugiñe láni Búngiu ánjeligu. ⁹Ánjaña ja aríñagubaña jagíbugiñe gürígia luágu máma jamá nánigu, naríñaguba gíñe jagíbugiñe láni Búngiu ánjeligu luágu máma jamá nánigu.

¹⁰Furúmieguaügü le aríñaguti cátei wuríbatí nuágu, áu le Wügüri Garaúwarügüti, gayáraati ferúdunawa lan, ánjein le anábaguti Sífiri Sándu, siñáti ferúdunawa lan.

¹¹Dánme le janügún ligíbugiñoun lúrudu lun jagúserun, o jagíbugiñoun lan tábutigu jalígilisin juríu, madíjerida jumá luágu cába lan joúnaba o cába lan jaríñaga, ¹²dánme le lachúlürün óra lun jadímurejan, larúfudubei Sífiri Sándu le lúnbei jaríñaguni jun.

Ewéridijani lueí leténirún sarágu lun irísini

¹³Ába lariñagun ában jádaangiñe gürígia jagía lun Jesúsu.

—Maésturu, aríñagabá lun níbugaña lun líchuguni nufánran nun lídaangiñe alágan.

¹⁴Lariñaga Jesúsu lun.

—¿Cági íchubalina quei agúseragüdüti o quei afánreinjati jídan?

¹⁵Aríñagati gíñe ítara.

—Toúnigigua jumá júngua lueí luweínamu águu, ladúga máma lueígiñe líbe lúmati gürígia labágarida sarágu dan.

¹⁶Ábati líchuguni jémpulu le joun, lariñaga.

—Ñíñein méja ában wügüri rísiti, ába líchugun lichári alúbajoúni buíti.

¹⁷Ábati lariñagun rísiti le lúnguarügü. “¿Cábasán funa nadúga? Ibídiñeti nun jalíaba lan nareídei sun le nalúbajabei.” ¹⁸Ába lasáminarun, ába lariñagun. “Subúdi náali cába lan nadúga, nagúnrinchaguaru sun nání lágei líla nádü, ábame nadúgün ámu weínamutimaatu, ábame nareíduni nalúbajan lúma sun le númabei tídan. ¹⁹Ábameti nariñagun núniwagua. Buíti dan bun, níñein sarágu cátei areídañu búma lun sarágu dan, eméraaguabá, jóuba, gurába, gúndaabá.” ²⁰Lariñaga Búngiu lun. “Wügüri deré tagáambun, bouwe áriebe le, sun le búmabei areídañu, ¿cábasan un lerédera?” ²¹Ítara líña lasúseredun lun gürígia le adámuridaguagüdüti irísini lánina uboú le lúngua, ába leréderun gudémeñu lídan cátei le luáguti Búngiu, líña Jesúsu.

Toúnigi lumútiña Búngiu lirájüñü

(Mt. 6.25-34)

²²Ába lariñagun Jesúsu joun láni disípulugu.

—Aríñagatina lubeíti jun. Madíjerida jumá luágu cába lan le lúnbei jeígini lun jawínwandun, ni tuágu anáanguni to lúnboun jadáürünun.

²³Gebégitimaati ibágari sügú láu eígini, gebégi úgubu sügú táu anáanguni. ²⁴Aríja jumá joun dunúru. mábunaguntiña, malúbajan, mágei ligía jeígin, láu sun líra, jóügüda lumútiña Búngiu. ¡Gebégitimaatün sügú jáu dunúru! ²⁵Úati ni ában jádaangiñe gayáraati líchugun lánwoun libágari láu sun luweírin lidíjeri luágu. ²⁶Áñjein lubeíti siñá lubei jadúgüni le míbebei, ¿ca uágu jadíjerida luágu buri líbiri cátei?

²⁷Aríja jumá ída líña lan laboúchun buri fulúri. mawádigimariti, májúchagun ligía lanáangun, áni láu sun líra, quei nariñaguni jun, ni urúei Salomón láu sun luwéndegun, mawéndedunti quei ában fulúri. ²⁸Ánjeinti ítara líña lubeí ladáüraguagüdüni Búngiu jíduru, le níñeinbei ugúñe, jarúga lagudúña, ¡ladáüraguagüdatimabadün, loúgua taffíñen jugúya le! ²⁹Madíjerida jumá lubeíti luágu ni cáta, ni luágu cába lan jeíga, ni luágu cába lan játa. ³⁰Ladúga lirájüñü uboú le, lárígíñanu buri cátei le, ánjein jugúya,

níjein ában Jóguchi le subúdíjabúbei lun sun jemégeirun. ³¹Áluaja jumá lun jesériwidun lun furúmiñe, ábame líchuguni sun le jemégeirubei jun.

Irisini siélu
(Mt. 6.19-21)

³²‘Manúfude jumá, nirájüñü, láu sun mibe jumá, gúndaati Búngiu lun líchugun ában ubáraü jun lídan larúeijan. ³³Alúgura jumeí le júmati, jíchigeime lebégi joun gudémetiña, láu líra, jadügüñoun lágei seínsu to mawefyadaditu, irisini siélu le magúmuchaditi, le ní lubei siñá lan jebélorun jíwerutiña anúgei jirisin, úa jagía jamútiri ñi lun jeígini. ³⁴Naríñagubalin le jun ladúga le ní lumuti jirisin, níñoun gíñe janígi.

Aráanseñu jumá, agúrabaja

³⁵‘Aráanseñu jumá lubá nagíribudun siélugiñe, durúngu jilámpun. ³⁶Ítara jumá quei músu ja agúrabañubaña liábin jayúbudiri lídaangiñe ában maríei lun jadáraruni béna lubá, óra lagúarun. ³⁷Buídubei dan joun músu ja ladárirubaña jayúbudiri agágudúañu dan le lachúlürün, ninárün jáu, iyúbudiri meme ligía laráanseruba, ábame lañúuragüdüniña luágu dábula, ábame lesériwiduni jeígin joun. ³⁸Íbini amídi áriebe lan lachúlüra o lubá lan larúgan, ánjaña ladáira agágudúañu, buídubei dan joun músu jagía. ³⁹Subúdi jumeí luágu lun lan jamúga subúdi láni tabúreme muna cába lan óra lachúlüra jíweruti íweruja, leréderuña jamúga agágudúañu, mígirunti jamúga lun tadárarún lúban lun líwerujoún lumégegün. ⁴⁰Jugúya, aráanseñu jumá gíñe, ladúga lídaanme magáradajan jumá ligíame nagíribudun, áu le Wügüri Garaúwarügüti, ubouágun.

Músu le úarabei, lúma le múaraanbei
(Mt. 24.45-51)

⁴¹Ábati lálügüdüni Pédro Jesúsu, laríñaga lun.

—Nabúreme, ¿woúnrügi bíchigei jémpulu le ódi joun súngubei?

⁴²Laríñaga Wabúreme Jesúsu lun.

—Lun furúmieguarügü oúnigiruti úarati, gunfaráanda ligía, le lígirubei liyúbudiri lun laríjin jáu tílana lúban, lun leígagüdüniña lídan dan. ⁴³Buídubei dan lun músu le ladárirubei liyúbudiri agúnfulira láu luwádigimari dan le lachúlürün. ⁴⁴Ninárün jáu, luágu líchugubei lan liyúbudiri lun ligía lan aríja láu sun le libíjubei. ⁴⁵Ánjein arítagua músu ligía luágu lúgili lan liábin liyúbudiri, ábame lagúmeserun ouseraña jíbiri músu ja lábugiñebaña laríajaan wuríba, leréderame ega, áta, abácharuada, ⁴⁶ligíame liábin liyúbudiri lídan magáradajan lan, lídan ában óra le ibídiñeti lun. Ábame líchuguni luweírin-ágei abeíchuni luágu, lasíadireime lun lasúfuriruni le jasúfurirubei ja múaraanbaña, máfiougati.

⁴⁷‘Músu le subúdíjabúbei lun ca lan labúseerubei liyúbudiri áni maráanserunti, mabájüdünleí, labeichúba sarágu. ⁴⁸Ánjeinti músu le

ibídiñeti lun, ába ladúgün cátei lé buri lúnti labeichún lueígiñe, maweíribei labeichún. Le únti líchugúa gíbeti, gíbebei amúriajouíti lúmagiñe, le gíbeti ígrúti lábugiñe laríajaan, gíbetimaabei amúriajouíti lúmagiñe.

Jesúsu lébunabei fánreinguaü

(Mt. 10.34-36)

⁴⁹‘Láu niábin ubouágun, ñíbei fánreinguaü ubouágu queísi wátu geméti. ¡Busénjadina jamúga durúnguaali lan wátu ligía!
⁵⁰Lúnti nasúfurirun le gumúti, ¡meménija nanígi lagúmuhun!
⁵¹¿Jarítaguatúnsan luágu barú nán meja darángilau númagua dan le niábinbei ubouágun? Manúgütina darángilau, fánreinguaü nanúgübei. Jafánreinraguba ja mafíñebaña nuágu jáma ja afíñebaña nuágu,
⁵²lúmagiñe guetó, seíngügua tidan ában múna, jafánreinraguba úrüwa jaweí biáma, biáma jaweí úrüwa, nueígiñe. ⁵³Lagáraguba úguchili luágun liraú, isáani luágun úguchili, úguchuru tuágun tiraú, isáani tuágun túguchu, ímenidi tuágun ágürü, ágürü tuágun ímenidi.

Liseíni buri dan

(Mt. 16.1-4, Mr. 8.11-13)

⁵⁴Aríñagati gíñe Jesúsu joun gürígia ítara.

—Dan le jaríjin labúrigadun siélu, ába jaríñagun luágu lájuya lan júya, áni ligía asúsereda. ⁵⁵Dánti le láfurun garábali lueígiñe suédi, ába jaríñagun luágu lárougada lan, áni ligía asúsereda. ⁵⁶¡Biángua tigíbu jugúya le! Subúdi jumúti luáguti ligáburi lasáansiragun dan siélu luma múarugu, ¿ca uágu ibídiñe lubeí luáguti ligáburi dan le gádaanbalün jun?

Jóucha jumá lun lídan jumá dan jáma jáganiñu

(Mt. 5.25-26)

⁵⁷¿Ca uágu siñá lubei jasúbudiruni cátei le úraguabei júngua? ⁵⁸Ánjein agúaragüda ában gürígia buágu, ába bídin luma ligíbugiñe lúruu, jóuchabá baráanseragun búngua luma luágu úma lubáragiñe jachúlürün, manúgün lámugabu ligíbugiñoun agúseragüdüti, lueí ledéregerunibu agúseragüdüti lun polisía, ábame ládarunibu furísunrugun. ⁵⁹Naríñajare bun luágu máfuridunbadibu lan ñígiñe darí bafáyeiruni lagúmujoún bigáwanün.

Ca lan uágu lúnti lubeí lasáansirun igáburi

13 ¹Lídoun méja dan ligía, ába jayábin gürígia abájüdagua lun Jesúsu jawágu wügüríña Galiléana ja láfaragubaña Piláto úara jáma anímaalu ja áfarawagúbaña lun adágaragüdüni lun Búngiu. ²Ába laríñagun Jesúsu joun.

—¿Jarítaguatúnsan luágu ladúga lan luweírin jafígoun Galiléana jagía sügú jáu ja jíbiri lílana jageíra lasúseredunbei le joun? ³Máma lueígiñe líra, láu sun líra, naríñajare jun luágu ánjein lan masáansirun jumá jigáburi, jóüweguba gíñe

sun jugúya. ⁴Ángi díisi-wídü jagúra ja ouwegubaña dan le láburujanbei wáyelesi le Siloébei jawágun— ¿jarítaguatün luágu weíritima lan jadúnrun sügü jáu ja jíbiri ja aganoúbaña Jerusalén? ⁵Máma líña gíñe, láu sun líra, nariñajare jun luágu ánjein lan masáansirun jumá jigáburi, jóuweguba gíñe sun jugúya.

Jémpulu tuáguti tídi bu ígo to mীনboun

⁶Ábati labájüdaguni Jesúsu jémpulu le joun, laríñaga.

—Níñein ában wügúri, ganádiriti ában tídi bu wéwe to ígo, ába lídin aríja ánjein gín tubei, madáriti ni cáta tuágu. ⁷Ábati laríñagun lun le oúnigirubalin ichári. “Aríjabásan, úruwaali irúmu gabúgürügua niábin áluaja ígo tuágu ídi bu to, madáritina. Chaúnboun, ¿cába uágu terédere ñi luágu ni cáta?” ⁸Ába loúnabuni le oúnigirubalin ichári, ába laríñagun. “Niyúbudiri, ígirayaboún irúmu le, nañúludagüdali múa táu, awoúja áume táu. ⁹Fágua tagíindun ítara, ánjoun magíindun, ábame tánychugún.”

Lareidaguagüdünnun Jesúsu ában wúri sebúti tanágan lídan wéyu le eméraguagülei

¹⁰Luágu ában wéyu le eméraguagülei, níñein Jesúsu arúfudaja tídan jalígílin juríu, ¹¹ñíñounti ában wúri, díisi-wídü irúmu táu láu ában espíritu wuríbatu tuágu, ígira láaru espíritu ligía lemúñu, siñá tásururun ni murúsun. ¹²Dan le laríjinbarun Jesúsu, ába lagúarun tun, ába laríñaga tun.

—Wúri, areidaguadibu.

¹³Ábati líchuguni lújabu tuágu, lídan óra ligía ába tásururun, ába tagúmeserun adímureja buíti luágu Búngiu. ¹⁴Ábati lagáñidun tábuti ligílisi ladúga lareidaguagüdünnun Jesúsu lídan wéyu le eméraguagülei, ába laríñagun joun gürígia ja níbaña.

—Níjein sísi wéyu lídan dimáasu lun gayára lan luwádigimaríniwa, lídan sísi wéyu ligía lun jíabin lun lagáranijóun jun, máma lídan wéyu le eméraguagülei.

¹⁵Ába laríñagun Wabúreme Jesúsu lun.

—¿Biángua tigíbu jugúya le!, ¿ma farára jumúti sun jugúya jilúgün bágasu o jilúgün lan burígü lun janúgün áta dúna lídan wéyu le eméraguagülei? ¹⁶Wúri to, linébaanfan Abrahám, ragúlaaru Máfia láu sándi, díisi-wídü irúmu táu láu, ¿moún lumuti funági yebe lun tareidawaguagüdünnun lídan wéyu le eméraguagülei?

¹⁷Dan le laríñagunbalin Jesúsu cátei le, ába nibúsigarigua jamá sun láganiñu, ánjaña sun jíbiri gürígia, gúndaatiña láu cátei lé buri weíriguti le ladúgübei Jesúsu.

Jémpulu luáguti tíla mostása (Mt. 13.31-32, Mr. 4.30-32)

¹⁸Ábati laríñagun Jesúsu.

—¿Ída líña ligáburi larúeijan Búngiu? ¿ca cátei úmounbei gayára lan níchuguni? ¹⁹Ítara líña quei ában liraúrai tíla mostása le lábunubei ában

wügüri lichárirugu, ába laboúchun, ába laweíridun darí lun liábin lun ábanme lan tídibu wéwe weíriti, darí lun jadúgün dunúru jádibu luágu tuburébu.

Jémpulu luáguti ísi

(Mt. 13.33)

²⁰Ábaya larínagun Jesúsu.

—¿Ca cátei úmounbei gayára lan níchuguni larúeijan Búngiu? ²¹Ítara líña quei ísi le tíchugubei ában wúri tídoun úrúwa líburu fulúaarú, ába terésirun súngubei.

Béna le бүрүрәүbei

(Mt. 7.13-14, 21-23)

²²Ába lasígiruni Jesúsu luweíyasun Jerusaléoun, arúfudajeina ligía lídan buri sun aúdú lúma lirájüñü fulásu le ídaangiñebei lásügüra. ²³Ába larínagun ában wügüri lun Jesúsu.

—Nabúreme, míbetiñásan ja lúnbaña jasálbarun?

Ába loúnabun Jesúsu, ába larínagun.

²⁴—Bürüraüti lubéneri siélu, jóücha jumá lun gayáraabei lan jebélurun lídaangiñe, ladúga quei narínaguni jun, sarágujaba busúentiña jebélurun, siñábei. ²⁵Lárigiñe ladáuruni tabúreme múna lubéneri, jugúya le boúgudibei jadaúnjaba luágu béna, jarínagame. “Wabúreme, darába béna wabá.” Ábame loúnabunün, larínagame jun. “Tbídiñetün nun, ibídiñe gíñe nun jalána jumá.” ²⁶Ábameti jagúmeserun arínaga. “Jóujúadiwa, gurá wagía búma, arúfudaja amúrtü woun úmadarugu.” ²⁷Ábameti loúnabunün, larínagame. “Arínaga náali jun luágu ibídiñe jumá nun, ibídiñe nun jalána jumá. Díse jumá nueí, sun jugúya le adúgübei wuríbani.” ²⁸Ligíaba jayájuajan, acúnrijame jári dánme jaríjini Abrahám, Isáac, lúma Jacób, jáma jíbiri profétagu lídan larúeijan Búngiu, jugúyame aságarúa boúgudin. ²⁹Jayábiba gürígia lueígiñe oúbaü le nígiñe lubéi láfuara wéyu lúma lueígiñe le nígiñe lubéi lálüda, lueígiñe núru lúma lueígiñe suédi lun jañúurun eíga lídan larúeijan Búngiu. ³⁰Níbañati jádaangiñe ja agúmujoúnibaña guetó, jagíaba furúmiñetiña, jámeti furúmiñetiña guetó, jagíaba agúmujoúni.

Layájun Jesúsu jawágu lílana Jerusalén

(Mt. 23.37-39)

³¹Lídan méme wéyu ligía, ába jayábin fariséogu, ába jarínagun lun Jesúsu.

—Beíba yágiñe, ladúga busénti Heródes láfarunibu jilágubei.

³²Ába larínagun joun.

—Jeíba, jarínagame lun wügüri bíbuti ligía. “Ugúñe lúma jarúga naságajan espíritugu wuríbatiña jádaangiñe gürígia, areídaguagüda áu sánditiña, lárigiñe jarúga, lásurun nuwádigimari. ³³Lúnti nasígiruni nuweíyasun ugúñe, jarúga, lúma lárigiñe jarúga, ladúga máma lúnti lafarúniwa ában proféta jilágubei boúgudi lueí Jerusalén.

³⁴Ába layájun Jesúsu jawágu lílana Jerusalén ítara.

—¡O jugúya Jerusalénna! Afaragua jumáaña profétagu, chúgua jugúya dúbü jawágun ja louñajabaña Búngiu láu ugánu buíti jun! ¡Sarágu wefyaaasu nálugun natoúnigirunün quei tatoúnigiruniña gáyu tirájüñü lábugiñe tarúna, májatün! ³⁵Ígira láadün Búngiu, áni naríñajare jun luágu maríjindügüya jumáadina lan daríme lachúlürün dan lun jaríñagun. “Biníwati le ñübinbei lídan líri Wabúreme.”

Lareidaguagüdün Jesúsu ában wügüri lújali larúna luma liyáda

14 ¹Luágu ában wéyu le eméraaguagülei, ába lídin Jesúsu eíga lúbiñe ában fariséo weíriguti, sun ja níbaña, jaríaguñein Jesúsu. ²Níñein gíñe ában wügüri láu sándi le ílu, ³ábati lálügüdüniña Jesúsu arúfudajatiña lilúrudun Moisés jáma fariséogu, laríñaga joun.

—¿Gayáraati lareidawaguagüdün ában wügüri lídan wéyu le eméraaguagülei ódi siñáti?

⁴Ába jeréderun maníñu. Ábati lanúgüni Jesúsu sánditi ligía, ába lareidaguagüdüni, ába laríñagun lun lun lídin. ⁵Ába laríñagun joun fariséogu.

—Furúmieguaugü jídaangiñe, ánjein eíguada lilúgün bágasu o lilúgün lan burígü lídoun ában wélu lídan wéyu le eméraaguagülei, laságarubei nígiñe furése.

⁶Maríñagun jáña ni cáta.

Ja amísurajoúbaña lídoun maríei

⁷Dan le laríjini Jesúsu janúadajani amísurajoútiña ubáraü buri le joúnbei ja weírigubaña, ába laríñagun joun.

⁸—Dánme le bamísurajoún lídoun ában fédu lánina maríei, máluajabei lubuídun-ágei ubáraü, ñübin líñeín ábanya amísurajoúti weírigutimáati buetí, ⁹ábame liábin le amísurajabalün, laríñagame bun. “Rúbei bubára lun wügüri le.” Ábamei bídin láu busíganu añúura lídan lúnabun-ágei ubáraü. ¹⁰Dánme le bamísurajoún lídoun ában fédu, ñurúba lídan lúnabun-ágei ubáraü, lun dánme lan le liábin le amísurajabalibu, laríñagame bun. “Numáda, sügüba lídoun ában ubáraü weírigutimaati.” Ítara lúba berésibirun inébesi jagíbugiñe sun ja ñúnbaña luágu dábula. ¹¹Le anáanguti lúngua weíri, lúnabudúba, le únabuti lanáangun lúngua, weíribei lanügün.

¹²Aríñagati gíñe lun wügüri le amísurajabalin.

—Dánme le bíchugun ában adíneruni o fédu, mamísuraja báña bumádagu, ni bamúlenu, ni bíbugañanu, ni jíbiri bidújeñu, ni bubésinanigu ja rísitiña, ladúga jamísurajabadibu gíñe, bibíjubati bafáyeiruaja. ¹³Dánme le badügün fédu, amísuraja báña gudémetiña, siñaguatiña úngua, danímaatiña, maríjintiña. ¹⁴Ábame gúnda ban, ladúga siñáti jafáyeirunibu, bibíjubeiti bafáyeiruaja lídaanme le jásaarun ja richáguabaña ligíbugiñe Búngiu lídaangiñe ouweni.

Jémpulu luáguti oúnwenbun adíneruni

¹⁵Dan le lagáambunbalin ában jádaangiñe ja ñúnbaña luágu dábula cátei le, ába laríñagun lun Jesúsu.

—Gúndaabaña gürígia ja eígibaña lídan larúeijan Búngiu.

¹⁶Ábati laríñagun Jesúsu lun.

—Ñíñein ában wügúri, íchuguti ában oúnwenbun adíneruni, ába loúnajan amísuraja sarágu gürígia. ¹⁷Óra lun adíneruni, aba loúnajani lumúsun aríñaga joun amísurajoútiña. “Queímoun, aráanseeli sun cátei.” ¹⁸Súngubei, ába jaríñagun luágu siñá lan jóudin. Laríñaga furúmiñeti. “Sun líña nagáñijan ában fulásu, mósu nídin aríjei, ferúduna bána, siñáti nídin.” ¹⁹Laríñaga ában. “Agáñijaadina seíngü féru bágasu lánina wadágimanu, neíbuga oúchaña, adúgabá fuleísei nun, ferúduna bána, siñáti nídin.” ²⁰Laríñagaya ában. “Sun líña namárieidun, ligía siñá lubei nídin.” ²¹Dan le lagríbudun músu, ába labájüdaguni sun cátei le lun liyúbudiri. Ábati lagáñidun liyúbudiri, ába laríñagun lun músu. “Beíba lídan sun úma le ubúrugubei, banúgañame gudémetiña, siñáguatiña úngua, danímaatiña, jáma maríjintiña.” ²²Lárigiñe ladúgüni, ába laríñagun músu lun liyúbudiri. “Nabúreme, adúga náali le bubeíbei nun, níjein mémegua ubáraü.” ²³Ábati laríñagun iyúbudiri lun músu ligía. “Beíba lídan sun úma boúgudin lueí ubúругu, lúma sun fulásu geyégua láu, ábame bafósuruniña sun ja badárirun lun jayábin lídoun nufédun, buin támuga núban. ²⁴Ladúga naríñajare jun luágu úabei lan ni ában jádaangiñe ja namísurajabaña eígiti lídan nadíneragüdün.”

Lúnti lígirúniwa sun cátei lun lánibei lan Crístu

²⁵Sarágu jáña gürígia afálaruti Jesúsu, ába lagáraragun, ába laríñagun joun.

²⁶—Siñáti nánigubei lan le jínsiñejabutimaati lun lúguchi, o lúguchu, o lúmari, o lisáanigu, o líbugaňanu jáma lamúleni, o lítunu, o libágari guánarügü, sügü náu. ²⁷Le giñe májabei lasúfurirun nueígiñe queísigubeirügü jamúga ában wügúri le anúgüti lugúruwan, siñáti náni lan disípulu. ²⁸Ánjein arítagua ában jádaangiñe ladúgün ában wáyelesi, ¿ma funági lañúuruba furúmiñe asáminara átiribei lan lagástarun lun laríjini ánjein gabáfu lubeí lun lagúmuchuni? ²⁹Ladúga ánjein líchiga ébuu, lárigiñeme lásiñerei wadágimanu agúmucha, jéjerajaba ja aríjubalin láu, ³⁰jaríñagame. “Gumésesti wügúri le ában wadágimanu, siñá lumuti agúmucha.” ³¹Ánjein lawúribuja lubeí ában urúei lúma ámu urúei, ¿ma funági ñurúti furúmiñe lun lasáminarun ánjein gayáraabei lubeí lageíndagun jáu díisi mílu súaara lúma le jáubei wein mílu? ³²Ánjeinti arítagua luágu siñábei lan, dánme le dísegili le ában urúei, ábame loúnajan aríñaga lun lun mawúribujan jamá, lun jebélurun lídoun idíli. ³³Ítara líña lubeíti, furúmieguarügü jádaangiñe le mígirunti sun le lúmabei lun lafálarunina, siñáti nánibei lan disípulu.

Dan le leféridiruni sálu lubásuan

(Mt. 5.13, Mr. 9.50)

³⁴Buíti sálu, ánjein leféridira lubásuan, ¿cábago un ju lan?
³⁵Mabuídunjali ni lun lábunawagún nádü lídan, ni lun lidérebugu múa, fiwarügaalime. Agáamba jumána, jugúya le garígeirugubei lun jagáambun.

Jémpulu tuáguti mudún to eféridiruboun

(Mt. 18.10-14)

15 ¹Luágu ában wéyu, ába jayárafadun sarágu agúburajatiña liseínsuna gumádi jáma gafígountiña lun Jesúsu lun jagáambuni.
²Ába jadímurejan fariséogu jáma arúfudajatiña lilúrudun Moisés luágu Jesúsu lueígiñe cátei le, jaríñaga.

—Wügúri le, resíbi lumútiña gafígountiña, jou ligía jáma.

³Ábati líchuguni Jesúsu jémpulu le joun, laríñaga.

⁴—¿Ca jídaangiñe, lun jamúga galúgüniña lan san mudún, leféridira ában jídaangiñe, mígirun lubáña gádürü-wein-dísi-néfu ñi, lubárua, lun lídin áluajoun mudún to eféridiruboun? ⁵Dan le ladárirunun, ába lanúgünun légewagu láu ugúndani. ⁶Dan le lachúlürün lúbiñoun, ába loúndaruniña lumádagu jáma lubésinanigu, laríñaga joun. “Gúnda jumá úara núma, ladúga darína nilügün mudún tó yebe eféridiruboun nueí.” ⁷Naríñajare jun luágu ítara méme líña weíritima lan ugúndani síelu luágu ában gafígounti le asáansiruti luríban ligáburi lun lafálaruni Búngiu, sügü láu jawágu gádürü-wein-dísi-néfu gürigia richágutiña ligíbugiñe Búngiu ja memégeirunbaña jasáansiruni jagáburi.

Jémpulu luáguti seínsu le eféridirubei

⁸¿Ca wúri to njeinti jamúga dísi murúsun seínsu túma, leféridira ában lídaangiñe tueí, lun mébedun tan lámpu, ába tabuídajanun múna áluajei buídu darí lun tadáriruni? ⁹Dan le tadáriruni, ába toúndaruniña tumádagu jáma tubésinanigu, taríñaga joun. “Gúnda jumá núma, ladúga darína seínsu lé yebe neféridirubei.” ¹⁰Naríñajare jun luágu ítara líña lan gíne ugúndani jádan láni Búngiu ánjeligu luágu ában gafígounti le asáansiraguti luríban ligáburi lun lafálaruni Búngiu.

Jémpulu luáguti irájü le acháragadubei

¹¹Rúlumuti gíne Jesúsu jémpulu le joun, laríñaga.

—Ñíñein méja ában wügúri jáu bián lirájüñü. ¹²Ába laríñagun le amúleñein lun lúguchi. “Núguchi, rubei alágan le yúbei nun nun guetó.” Ába lafánreinjani úguchili alágan jádan biángubei. ¹³Málüti lueígiñe, ába loúndaruni amúleñein sun lumégegún, ába lídin díse lídoun ámu fulásu, ába lagástaruni liseínsun ñi lídan ában ibágari mabuídunti. ¹⁴Dan le gumújali sun liseínsun, ába ladágarun

ában lemégeirun eíginí lídan fulásu ligía, ába ladáiragun lúngua lídan ában oúnwenbun mégei. ¹⁵Ábati lídin áluaja wadágimanu lúma ában lílana fulásu ligía, ába loúnajani wígúri ligía oúnigiraña lílúgüniña búuruju. ¹⁶Weíríti líláma darí lun lawámadun lun lun leígini jeígin búuruju, míchugúnwati lun. ¹⁷Ábati lasáminarun, laríñaga lúnguarügü. “¡Sarágu ñadágimeintiña lúbiñe nóguchi ígiraguati eíginí joun, áu ya, óuwe niláma! ¹⁸Nagíríbuda le ñíjin lubeí nóguchi, naríñagame lun. Nóguchi, afígounjaadina ligíbugiñe Búngiu lúma bigíbugiñe. ¹⁹Madúnaali lun nanáangun núngua quei biraú, barúbana quei ában jádaangiñe ñadágimeintiña búma.” ²⁰Ába lárügüdün úma lun lagíríbudun lúbiñoun lúguchi.

‘Dísegi líña, ába laríjini úguchili irájü le, ába lagúdemedun lun. Ába leíbaagun lubároun, ába loúburuni, ába lachúuruní. ²¹Ábati laríñagun isáani lun. “Nóguchi, afígounjaadina ligíbugiñe Búngiu lúma bigíbugiñe, madúnaali lun nanáangun núngua quei biraú.” ²²Ába laríñagun úguchili joun lumúsuniña. “Sagájumoun tubúidun-ágei anáanguni furése, daúguagüda jumeí. Daújuma giñe ában bágü luágu lújabu túma geídi luágu lugúdi. ²³Áfara jumeí liraúraü bágasu le dibúnetimaabei. ¡Weíga, eféduja wagiame!, ²⁴ladúga niraú le, rúnaali yebe quei jiláali áni chülúguaya, féridijalí yebe áni daríwama.” Ába jagúmeserun eféduja.

²⁵‘Súnti buga dan le, níjeinti buga íbugañaü áraabu. Dánti le lagíríbudun, dan le lachúlürün tubádun múna, ába lagáambuni áfaruni lúma abínajani. ²⁶Ábati lagúarun lun ában jádaangiñe músu, ába lálügüduni ca lan susérebei. ²⁷Ába laríñagun lun. “Chülújali bamúlen, áfaragüdalá bóguchi liraúraü bágasu le dibúnetimaabei, ladúga lachúlürün láu magádiei.” ²⁸Ába lagáñidun íbugañaü, májaali lebéurun. Ába láfuridun lúguchi, ába layúmuragun lun lun lebéurun. ²⁹Ába laríñagun lun lúguchi. “Subúdi bumúti luágu seríwíjadina lan bun sarágu dan, madúraagunganef le bubeíbei ní ában weíyaasu, míchugidibu ní ában liraúraü gábara nun lun nefédujan jáma numádagu. ³⁰Guetóti, láu liábin biraú le, le achágarubalin biseínsun jáma würiña wuríbatiña, jáfaragüdabá bágasu le dibúnetimaabei!” ³¹Ábati laríñagun úguchili lun. “Niraú, amúrü númañadibu súnwandan, sun le náni, báni. ³²Ánjin guetó, lúnti wadúgün fédu lúma lun wagúndaarun ladúga bamúlen le yebe rúwamaalíbei quei jiláali, chülúguaya, féridijalí yebe, áni daríwama.”

Jémpulu luáguti oúnigiruti le múaraanbei

16 ¹Aríñagati giñe Jesúsu joun láni disípulugu. —Níñein méja ában iyúbudiri rísiti, níñein giñe ában loúniri lumégegún, ába jayábin aríñaga lun luágu lachágaruñein lan oúnigiruti ligía lírisin. ²Ábati lagúarun iyúbudiri lun, ába laríñagun lun. “Ída líñasan cátei le, le aríñawagúbei nun buágu? Rúba fe nun luágu buwádigimari, ladúga masgíjadibu oúnigirei nílagu.” ³Ábati leréderun oúnigiruti ligía asáminara, laríñaga lúnguarügü. “¿Cábatí nadúga guetó lárigiñe gidála lan niyúbudiri wadágimanu nueí? Méretina lun nadúgün wadágimanu júrúti, áni nibúsigaritina

lun namúriajan. ⁴Subúdi náali cába lan nadúga lun ñí jama erésibirutina jábiñe dánme mawádigimarijadina.” ⁵Ába loúnajan jawágu ja adúweirubalin liyúbudiri lun jayábin lun ában ában. Ába lálügüdüni le furúmiñeti, laríñaga lun. “¿Átiri badúweiruni niyúbudiri?” ⁶Ába laríñagun lun. “Dúwei numúti san barín agúlei.” Ábati laríñagun oúnigiruti ligía lun. “Nuján bigáradan, ñurúba furése, badúgame ában luágurügü dimí-san.” ⁷Lárigiñe, ábaya lálügüdün ában, laríñaga lun. “Ángi amúrü, ¿átiri badúweijan?” Laríñaga lun. “San ságü türígu.” Laríñagati lun. “Nuján bigáradan, adúgabá ában luágurügü gádürü-wein.” ⁸Ába lasúbudiruni iyúbudiri luágu chu lan láu oúnigiruti ligía lídan ligáburi ladúgüni cátei.

Ligía laríñagun Jesúsu.

—Gürígia wuríbatina ja lánina uboú le, chúti jáu lídan jáni jáma ámu sügú jáu ja lánina larúgounga, ja lirájüñü Búngiu. ⁹Siñáti leménigidün luágu irisini lánina uboú le, aríñagatina lubeíti jun lun jayúsurun jirísín lun jadúgün buíti, lun dánme lan le lagúmunchun jibágari, jerésibirúba tídan múna to magúmuchaditu, yágüta siélu.

¹⁰Le adúgüti buíti láu le murúsunrügüti, ladúgüba gíñe buíti láu le gíbeti, le madúgünti buíti láu le murúsunrügüti, madúgünbei gíñe buíti láu le gíbeti. ¹¹Ánjaün lubeíti madúgün buíti láu buri irisini le lání uboú le, le uágubei siñá lan leménigidün, ¿cábaga affínera juágu lun ledéregerun irisini inárüniti lábugiñe jaríaaan? ¹²Ánjaünti madúgün buíti láu jemégen ámu, ¿cábaga íchigei le jáni guánarügü jun?

¹³Siñáti lesériwidun ában gürígia joun bián iyúbudirigu, ladúga liyéreeguduba ában lun, línsiñedame le ában lun, o úarabei lan lun ában, lanúgeime le ában quei ni cáta. Siñáti lesériwidúniwa lun Búngiu lúma lun seínsu.

¹⁴Agáambagu jáña fariséogu lun sun cátei le, ába jéjerajan láu Jesúsu, ladúga jínsiñe lan seínsu joun. ¹⁵Ábati laríñagun Jesúsu joun.

—Jugúya gürígia ja arúfudagubaña jóungua quei buítiña jagíbugiñe gürígia, ánjeinti Búngiu, subúdi lumútu janígi luágu wuríba tan. Le cátei le janúgübei gürígia quei weíríti cátei, iyéreeguti lun Búngiu.

Lúruđu lúma larúeijan Búngiu

¹⁶Níjein meja lilúrudun Moisés lúma jarúfudajan profétagu dari lúmoun lidáani Juan. Lúmagiñe dan ligía, lapúrichijoún ugánu buíti le luáguti larúeijan Búngiu, sun gürígia jóuchatiña lun jebélurun lídoun.

¹⁷Méreenguntimaati lun lagúmuchagun siélu lúma uboú, máma lun magúnfulirun lan liñúraü-ágei dimúrei lídaangiñe lilúrudun Búngiu.

Larúfudajan Jesúsu luágu ígiraguni

(Mt. 19.1-12, Mr. 10.1-12)

¹⁸Ánjoun lígira ában wügúri lúmari, lagámarida ámu, ladúgüñein figoú le gíribei adultériu, le gíñe agámariduti ában wúri to ígiraguaaru, ladúgüña gíñe adultériu.

Wügüri le rísibei, lúma Lázaro

¹⁹Aríñagati gíñe Jesúsu.

—Ñíñein méja ában wügüri rísiti, anáanguni finutu to wéndegutu ladáuraguboun, ságüja wéyu ladáagun fédu láu sarágu wéndegu. ²⁰Ñíñein gíñe ában gudémeti gíríti Lázaro, sun lúra láu gumeín, ²¹lañúurati buri múarugu tubéneri lúban rísiti ligía áluga leígini lífe eígini le eíguaduti lueígiñe lidábulan rísiti. Weíríti lasúfurirun darí lun lawánduni jayábin oúnli éjelujei lugúmeín. ²²Luágu ában wéyu, ába loúnwen fugiábu ligía, ába janúgüni ánjeligu lúmoun Abrahám, le ñjín jabeí jiláaña buítíña, ába gíñe loúnwen rísiti, ába lábunajoún. ²³Dan le lasúfuriruña lan rísiti ligía lídan fulásu le ñjín jabeí jiláaña wuríbatíña, ába liñúruni laríjin, ában laríjini Abrahám dísegiñe, láu Lázaro lúma. ²⁴Ábati lagúaragun, laríñaga. “¡Núguchi Abrahám, gudémená bun! Oúnajabeí Lázaro lun ladúdüragüdüni ligíbu lújabu láu dúna, ñúbin lámuga éderei tuágu niñéñe, ladúga nasúfuriruña sarágu lídan wátu geméti le.” ²⁵Ába laríñagun Abrahám lun. “Niráú, jarítaguabá luágu buídu lán meja dan bun lídan bibágari, áñjein lun Lázaro, wuríbatí meja dan. Guetó, buíti dan lun ya, bugúya asúfurira. ²⁶Boúgudigiñe lueí sun le, njein ában baráangu afánreinraguáwa júma, ja jamúga buséntíña jóúdin yágiñe lun ñjín, siñáti, ni ja ñíbaña, siñáti jayábin ñájoun.” ²⁷Ábati laríñagun rísiti. “Amúriajatina búma, Núguchi Abrahám, lun boúnajani Lázaro lúbiñe núguchi, ²⁸añájein seíngü namúleni ñi, lun ladímurejan joun, mayábin jamámuga gíñe lídoun fulásu lánina asúfuriruni le.” ²⁹Ába laríñagun Abrahám lun. “Njein le labúriñjabeí Moisés jáma profétagu jáma ñi, jadúga jamá gásu láu!” ³⁰Ába loúnabun rísiti, ába laríñagun. “Binártün, núguchi Abrahám, láu sun líra, áñjein ñúdiün ában jádaangiñe jiláaña adímureja joun, lasáansiraguba jagáburi.” ³¹Laríñaga Abrahám lun. “Áñjein mája jabeí jadúgün gásu láu le laríñagubei Moisés jáma profétagu, mafíñebañá gíñe láu sun lásaarun ában jádaangiñe jiláaña lun lídin adímureja joun.”

Luríban laffigoungüdúniwa ában gürígia

(Mt. 18.6-7, 21-22, Mr. 9.42)

17 ¹Ába laríñagun Jesúsu joun láni disípulugu.

—Súnwandan njeinbei lán buri cátei affigougüdüti gürígia, ¡áni fugiábu gürígia le affigougüdüti ámu! ²Buítimaati jamúga lun lun lagurún baránajoun láu ában dúbü le lamúlíja awási güráñu luágu ligíña sügü láu laffigoungüdün ában jádaangiñe ja ñúbürigiñabaña lídan jafíñen nuágu. ³Ítara líña lubeíti toúnigi jumá.

‘Áñjein adúga bamúlen o bíbugaña wuríbani bun, wéridibei, áñjein asáansiragua ligáburi, ferúdunabeí, ⁴áñjein adúga wuríbani bun sédü weíyaasu lídan ában wéyu, sédü weíyaasu liábin aríñaga bun luágu madúgündügüya láali lan, lúnti ferúduna báni.

Lubáfu afíñeni

⁵Ába jaríñagun apóstolugu lun Jesúsu.

—Wabúreme, rúba lánwoun wafíñen.

⁶Ábati laríñagun Wabúreme Jesúsu joun.

—Lun jamúga nǐjein lan murúsuraü afíñeni jídan—gayáraati jamúga ñúraíraü lan queísi ában tíla mostása—gayáraati jamúga jaríñagun tun tídibu wéwe to. “Gidába yágiñe láu sun bílagüle, beíba ájúcha baránaja”, áni lasúsereduña jamúga.

Wesériwidun lun Búngiu máma ában cátei lun lateíngiruníwa luágu

⁷Ánjein nǐjein lubeí lumúsun ában jídaangiñe, dan le lagíribudun áraabugiñe lárigiñe lawoújan o loúnigirun lan anímaalu, ¿laríñaguba funági lun músu ligía. “Belúba, ñurúba eíga”? ⁸Uá, aríñagarügübei lun. “Aráansebeí neígin, aráanseñu amúrúme lun beténirun nun sun anája lan eíga lúma áta, lárigiñeme, gayáraajalíme beígin lúma bátun.” ⁹¿Teínqui lumúti funági iyúbudiri músu luágu ladúgüni le lubeíbei lun? Uá. ¹⁰Jugúya giñéti, dánme lásurun jadúgüni le uágubei laríñaga Búngiu jun lun jadúgüni, lúnti jaríñagun. “Músu moúntiña wagía, ladúga lé rügúñein lúnbei wadúgüni wadúga.”

Lareídaguagüdün Jesúsu díisi gawágutiña gumeín

¹¹Lídan lasígiruni Jesúsu luweíyasun Jerusaléoun, ába lásügürün labádinaguagiñe Samária lúma Galiléa. ¹²Dan le lachúlürünbei lídan ában liraúraü fulásu, ába jayábin díisi wügúriña gawágutiña gumeín, lubároun. Ába jeréderun díse lueí, ¹³ába jagúaragun lun ítara.

—¿Jesúsu, Maésturu, gudéme wamá bun!

¹⁴Dan le laríjinbaliña Jesúsu, ába laríñagun joun.

—Jeíba arúfudagua júngua joun fádirigu.

Dánti le ídirina jamá, ába jareídagun. ¹⁵Ñíñeinti ában jádaangiñe, dan le laríjinbei luágu areídaguaali lan, ába lagíribudun le ñíjin lubeí Jesúsu, adímurejeina buíti luágu Búngiu láu umálali jéreti. ¹⁶Ába lájuduragun dagá ligíbu múarugu lun líchuguni eteíngiruni lun. Áni Samariána wügúri ligía. ¹⁷Ábati laríñagun Jesúsu.

—¿Ma díisiñanu areídagutiña? ¿Jagáñagi ja jíbiri néfu? ¹⁸¿Niján gubeírügü teréncha le agíribuda eteíngirei Búngiu?

¹⁹Ábati laríñagun lun wügúri ligía.

—Sarába, beíba, areídaguaadibu ladúga bafíñen.

Ída lúba lan ligáburi liábin larúeijan Búngiu

(Mt. 24.23-28, 36-41)

²⁰Ába jálügüdüni fariséogu Jesúsu ídaba lan lagúmesera larúeijan Búngiu, ába laríñagun joun.

—Dánme le lagúmeserun larúeijan Búngiu, marijínbei,
²¹ mariñawagúnbei. “Niján”, o “Níngitan”, ladúga lídan linárün cátei,
 níjeinjali larúeijan Búngiu jagánagua.

²² Ábati laríñagun joun lání disípulugu.

—Lachúlürüba dan lun meménija lánme janígi lun júmabadina lan, íbini
 luágurügü ában wéyu, masúseredunbei lídan dan ligía. ²³ Laríñawagúba
 jun. “Niján Crístu ya”, o “Níngitan yágüta.” Iyéenibei, mídin jumá jarígi,
 mafálarun jumáñame. ²⁴ Ladúga ítara quei larijín ában labírijaníga
 lueígiñe ában louba siélu lun luágun le ában, ítara lúba dánme le
 nagríbudun ubouágun, áu le Wügúri Garaúwarügüti. ²⁵ Lúnti nasúfurirun
 sarágu furúmiñe, mebéresen jagíame gürígia ja lánina dan le náu. ²⁶ Queí
 meja lasúseredun lídan lidáani Noé, ítara lúba gíñe lasúseredun lídan
 búrime wéyu le niábingüile, áu le Wügúri Garaúwarügüti. ²⁷ Dán meja
 ligía, jerédera meja gürígia eíga, áta, agámarida, íchaajaña jarájüñü lun
 jamárieidun darí wéyu le lebélurun Noé tídown ugúnein to árca. Ába liábin
 gúnran, ába jañáradagun súnigubei. ²⁸ Ítara lúba gíñe quei lasúseredun
 lídan lidáani Lot. jerédera gürígia eíga, áta, agáñija, alúguraja, ábunagua,
 adáagua muna. ²⁹ Dan le láfuridunbei Lot ubúrugugiñe Sodóma, ába
 láburujan wátu geméti luma sáfuru siélugiñe, ába láfaraguniña súnigubei.
³⁰ Ítara lúba dánme le niábin, áu le Wügúri Garaúwarügüti.

³¹ Lídaanme wéyu ligía, le gürígia le bougudíbei tueí lúban, ánjein
 níjein lubeí lumégegún múnada, mebéluralá aságarei. Le gürígia le
 áraabubei lídan óra ligía, magríbudalá lúbiñoun. ³² Jarítagua jumá
 luágu le asúseredubei tun lúmari Lot. ³³ Le áluguti leséfuruni libágari
 ya ubouágu, lefériidirubei ibágari magúmuchaditi, le ánjabei lefériidiruni
 libágari ya ubouágu, nueígiñe, libíjuba ibágari magúmuchaditi.

³⁴ Naríñajare jun luágu áriebe lánme ligía, ñíbaña biáma gürígia
 arúmuga tídan ában meme gabána, lanügúba ában jádaangiñe, ígirúame
 le ában según jafíñen nuágu. ³⁵ Ñíbaña biáma würiña amúlija lídan ában,
 tanügúba ában jádaangiñe, ígirúame to ában. ³⁶ Ñíbaña biáma wügúriña
 áraabu, lanügúba ában jádaangiñe, ígirúame le ában.

³⁷ Dan le jagáambunbalin cátei le, ába jálügüdüni, jaríñaga lun.

—¿Jalíabasan lasúsereda buri cátei le, Wabúreme?

Laríñaga joun.

—Le ñí lumuti lúgubu jiláali, ñíba jóundaragua wadúbi.

Jémpulu tuáguti wúri to jiláali túmari, luma agúseragüdüti

18 ¹ Ába labájüdagun Jesúsu ában jémpulu joun, lun larífudajan
 joun luágu lúnti lan jayúmuragun lun Búngiu súnwandan, láu
 gurásu. ² Laríñaga joun.

—Ñíñein meja ában agúseragüdüti lídan ában fulásu, minébe líña Búngiu
 lun, mebéresen ligía láu ni ában gürígia. ³ Ñíñoun gíñe ában wúri lídan fulásu

ligía, jilá meja túmari, ságü wéyu tídin lúmoun agúseragüdüti le lun líchuguni tirícha tun luágu ában tuwúribun lúma tágani. ⁴Luágu sarágu dan, májati yebe leténirun tun, lárigiñe, ába laríñagun lúnguarügü. “Láu sun minében lan Búngiu nun, mebéresen áu láu ni ában, ⁵quei nuján méme lan wúri to ásüdagüda nichügü, neséfuraaru, jebé lámuga tiábin, gumú líñein nugúraasun.”

⁶Ába laríñagun Jesúsu.

—Niján laríñagubei agúseragüdüti le wurfbabei, ⁷gúbumeti leséfuraña Búngiu lánigu ja ayúmuragutiña lun wéyuagu, áriebe. ¿Lúbei lubá líderaguniña? ⁸Uá, madárasanbei. Láu sun le, dánme le nagíribudun, áu le Wügúri Garaúwarügüti, ubóuagun, ¿nadáriruba funásan afíneni jádan gürígia ja yábaña, nuágu?

Jémpulu luáguti fariséo lúma agúburajati liseínsuna gumádi

⁹Rúyati Jesúsu ában jémpulu joun ja jarítaguabaña luágu richágua jamá ligíbugiñe Búngiu, janúgaña ámu gürígia quei ni cáta. Laríñaga.

¹⁰—Núdütiña bián wügúriña témpulurugu ayúmuragua lun Búngiu, ában fariséo, ában agúburajati liseínsuna gumádi. ¹¹Le fariséo, rára líña layúmuragun, laríñaga. “Búngiu, teínqui numútibu luágu mítaran nan quei jíbiri gürígia—jíwerutiña, wurfbatiña, salúfuritiña, mítaraantina gíñe quei agúburajati liseínsuna gumádi le. ¹²Ayúnaratina bián weíyaasu lídan dimáasu lun nagúnfulirun búma, rúnumuti gíñe dísi gáwanün lídaangiñe ságü fiádiürü le ebélurubei nun, bun.” ¹³Ánjeinti agúburajati liseínsuna gumádi, ába leréderun díse, mabúseerunti ni lun liñúruni laríjin siélun, le luweírin lúnabun lanáangun lúngua. Aboújarügülef laníguagu láu igárigu, laríñaga. “¡Búngiu, gudémená bun, nugúya le gaffigounti!” ¹⁴Naríñajare jun luágu giríbu lan agúburajati ligía lúbiñoun, resbíñulef Búngiu, máma fariséo ligía. Ladúga le anáanguti lúngua weíri, ñúraübei lanügün, ánjein le ñúraübei lanáangun lúngua, weíribei lanügün.

Labíniruniña Jesúsu irájüñü

(Mt. 19.13-15, Mr. 10. 13-16)

¹⁵Anaajouatiña gíñe irájüñü lun Jesúsu lun lagúrunun jawágu, dan le jaríjnbalin díspulugu cátei le, ába jadeínjan joun ja anáajabaliña irájüñü. ¹⁶Ába laríñagun Jesúsu joun lun jasígirun anáajaña jarájüñü lun, ába laríñagun joun lánigu.

—Ígira jumá lun jayábin irájüñü nun, mewéridija jumá luef, ladúga ja ítarabaña quei jagía, jagía lílanabaña larúeijan Búngiu. ¹⁷Ninárün jáu luágu le lan merésibirun lumúti larúeijan Búngiu láu afíneni jarúmati líbe jafínen irájüñü, mebélubei lídoun.

Layánujan ában wügúri risiti lúma Jesúsu

(Mt. 19.16-30, Mr. 10.17-31)

¹⁸Ába lálügüdüni ában jádaangiñe ábutigu Jesúsu, laríñaga lun.

—Maésturu buíti, ¿ca lúnbei nadügüni lun gayára lan nibíjini ibágari le magúmuchaditi?

¹⁹Larínaga Jesúsu lun.

—¿Ca uágu barínaga nun “buíti”? Ában rügüñein buíti, Búngiu.

²⁰Subúdi bumúti gumádi. Maganoúabá túma wúri gámaritu, máfarajabá, míwerujabá, mayéejabá luágu ni ában, inébe jamá bagúbürigu bun.

²¹Larínaga wügúri ligía lun.

—Gúnfulitina láu sun le lúmagiñe núraügidina.

²²Lídan le lagáambunbalin Jesúsu cátei le, ába larínagun lun.

—Mégeigili ában cátei lun badügüni. alúgurabeí sun le búmabei, ábame bíchuguni lebégi joun gudémetiña, ábame garisin ban siélu. Ábame bagíríbudun, ábame bafálarunina.

²³Dan le lagáambunbalin wügúri ligía cátei le, ába lírudagun, ladúga rísiti buídu. ²⁴Dan le laríjini Jesúsu lírudagun, ába larínagun.

—¡Jénreenguti lun jebélurun rísitiña lídoun larúeijan Búngiu!

²⁵Méreenguntimaati lun lásügürün ában caméyu lídaangiñe lujúyun ában agúsa sügú láu lebélorun ában rísiti lídoun larúeijan Búngiu.

²⁶Ába jarínagun ja agáambubalin.

—¿Cáteiti gayáraabei lasálbarun?

²⁷Larínaga Jesúsu joun.

—Le jásiñerubei gürígia adúga, gayára lumúti Búngiu, ladúga úati ni cáta siñáti lun Búngiu.

²⁸Larínaga Pédro lun.

—Wabúreme, wagía, ígira wamáali sun le wámati lun wafálarunibu.

²⁹Ába larínagun Jesúsu joun.

—Nináriün jáu luágu furúmieguarügü lan le ígiruti lúban, o lagúbürigu, o líbugañanu, o lamúlenu, o lúmari, o lirájüñü luágu larúeijan Búngiu, ³⁰libíjubatíma sarágu weíyaasu lougiñe lídan ubou le, ibíjaleíme ibágari magúmuchaditi yágüta siélu.

Ladímurejaanya Jesúsu luágu louñwen

(Mt. 20.17-19, Mr. 10.32-34)

³¹Ába lagúarun Jesúsu joun láni dúusu apóstolugu jábugua, ába larínagun joun.

—Weíbuga Jerusalén guetó, le ñíba lubeí lagúnfulira sun le jabúriujabei profétagu nuágu, áu le Wügúri Garaúwarügüti.

³²Jedéregerubadina joun ja mámabaña juríu, jéjerajaba náu, anába jamáname, suégua. ³³Jabeíchubadina, lárigiñeme, ábame jáfarunina jilágubei, áni násaaruba lídaangiñe ouweni luágu lúrwüwan wéyu lúnya nabágaridun.

³⁴Úati gunfaráanda jamá ni cáta lídaangiñe cátei le, ibídiñegubeíti joun ca lan uágu ladímureja joun, darúguati laníchigu cátei le larínagubei, joun.

Lareidaguagüdün Jesúsu ában Jericóna maríjinti
(Mt. 20.29-34, Mr. 10.46-52)

³⁵Dan le achúlüreinaali Jesúsu ubúrugun Jericó, ñíñein ában maríjinti ñun láru úma amúriaja. ³⁶Dan le lagáambunbei maríjinti ligía jásüüjan sarágu güriquia, ába lálügüdajan ca lan susérebei. ³⁷Ába jaríñagun lun luágu niján lan Jesúsu Nazarétna ásügüra ñígiñe. ³⁸Ábati lagúaragun, laríñaga.

—¡Jesúsu, le ladúgawagun David, gudémená bun!

³⁹Ja lubá lubáabaña, ába jadeínjan lun lun lámanichun, ligiatima lagúaragun.

—¡Ladúgawagun David, gudémená bun!

⁴⁰Ábati laráramagun Jesúsu, ába loúnajan anúgei. Dan le yaráfaali lun, ába laríñagun lun.

⁴¹—¿Ca babúseerubei nadúgün bun?

Ába laríñagun lun.

—Nabúreme, buséntina naríjin.

⁴²Laríñaga Jesúsu lun.

—¡Ibíjabeí baríjin! Areidaguaadibu ladúga bafíñen.

⁴³Lídan meme óra ligía, ába laríjin maríjinti ligía, ába lafálaruni Jesúsu adímurejeina bufti luágu Búngiu. Sun güriquia ja aríjubalin cátei le, ába gíñe jadímurejan bufti luágu Búngiu.

Jesúsu lúma Zaquéo

19 ¹Ábati lebélorun Jesúsu fulásurugun Jericó, ába lásügürün ubúrugugiñe. ²Ñíñein ában wügüri rísiti, gíriti Zaquéo, jábuti agúburajatiña liseínsuna gumádi. ³Buséntiti Zaquéo laríjini Jesúsu lun lasúbudiruni, siñáti laríjini ladúga ñúraüraüti lúgubu, áni gíbetiña güriquia. ⁴Lúnti gayára lan laríjini, ába leíbaagun ubáraü, ába laweínrún tuágún ában tídibu wéwe sicómoro yaráfa lun le ñígiñeba lubeí lásügüra Jesúsu. ⁵Dan le lásügürün Jesúsu ñígiñe, ába laríjin íñun, ába laríñagun lun Zaquéo.

—Zaquéo, raríba furése, ladúga lúnti neréderun búbiñe ugúñe.

⁶Ábati larárirun Zaquéo furése, ába lerésibiruni Jesúsu lúbiñe láu ugúndani. ⁷Dánti le jaríjini jíbiri güriquia cátei le, ába jagúmeserun adímureja luágu lídin Jesúsu erédera lúbiñe ában gafígounti. ⁸Ábati laráramun Zaquéo, ába laríñagun lun Jesúsu.

—Nabúreme, níchiga lamídan le nómabei joun gudémetiña, áni ánjein íwerujaadina lubeí lueí ában güriquia láu eyéeraguni, náguyugüdüba gádürü wéfyaaasu sügü láu lun.

⁹Laríñaga Jesúsu lun.

—Sálbañu jáña tílana muna to ugúñe, ladúgawagun gíñe Abrahám amúrü. ¹⁰Ligía niábinbei ubouágu, áu le Wügüri Garaúwarügüti, lun náluajaniña lúma asálbaraña já yebe féridijañabaña.

Jémpulu luáguti díisi murúsun seínsu

¹¹Dan le añája lubeí gürígia agáambajei laríñaguni buri Jesúsu cátei le, ába labájüdagun ában jémpulu joun, ladúga ayárafadeinaali lan lun Jerusalén áni jarítaguatiñáti luágu lagúmesera lan larúeijan Búngiu dan ligía. ¹²Ábati laríñagun joun.

—Níñein ában wügúri íñugutiña lidújeñu, leíbugati wügúri ligía lídoun ámu fulásu díseti lun líchugúniwa lurúeime lageíra, ábayame lagíribudun. ¹³Lubáragiñe láfuridun, ába loúnajan jawágu díisi jádaangiñe lumúsuniña, ába ledéregerun ában seínsu le gebégiti sarágu lun cáda ában, ába laríñagun joun. “Agárabaja jumeí seínsu le dari nagíribudun.” ¹⁴Queíti liyéreegunbei wügúri ligía joun lílana fulásu, ába jóúnajan lárigi lun jaríñagun lun le lúnbei líchuguni ubáraü lun luágu mabúseerun jamáni lun jarúeime. ¹⁵Láu sun líra, resíbiwati lun urúeime, ába lagíribudun lageíroun. Dan le lachúlürün, ába loúnajan jawágu lumúsuniña já buga únbaña líchigei seínsu lun lasúbudiruni átiriñein lan lagáñirun cáda ában. ¹⁶Ába liábin le furúmiñeti, ába laríñagun. “Nabúreme, gáñeitina díisi weíyaasu ligíbuagun biseínsun.” ¹⁷Laríñaga urúei lun. “Bufti, ában músu bufti bugúya. Quei úara bubeí lídan le murúsunrügüti, níchigaadibu agúmadija lídan díisi fulásu.” ¹⁸Ábaya liábin ában, ába laríñagun. “Nabúreme, gáñeitina seíngü weíyaasu ligíbuagun biseínsun.” ¹⁹Ába gíñe laríñagun lun. “Bagúmadija lídan seíngü fulásu.” ²⁰Ábati liábin ában, ába laríñagun. “Nabúreme, niján biseínsun, areída numúti tídan ában músue ladúga nanúfude bueí, ²¹ladúga ában ban wügúri derégüdati, reídeitibu láu cátei le mawádigimaritibu luágu, alúbaja amúrü le ní lumuti mábunagun ban.” ²²Ábati laríñagun urúei lun. “Músu wuríbati, luágu guánarügü berérun nagúseragüdábu. Quei subúdi bubálin luágu ában nan wügúri derégüdati, luágu reídei nan láu cátei le mawádigimaritina luágu, alúbaja áu le ní lumuti mábunagun nan, ²³¿cáti uágu míchububalin niseínsun báncürugun lun jamúga lagánwoundun dan le nagíribudun?” ²⁴Ába laríñagun joun ja níbaña. “Gidájumei seínsu lueí, rújumei lun le díisibei lúma.” ²⁵Ába jaríñagun lun. “Wabúreme, níjeinga díisi seínsu lúma.” ²⁶Ába laríñagun urúei. “Naríñajare jun luágu sun lan le adúgati bufti láu le lúmabei, libíjuba lánwoun, ánjein le madúgünti ni cáta bufti láu murúsun le lúmabei, lagídarúaba murúsun ligía lueí. ²⁷Játi náganiñu, já yebe mabúseerúnbaña lun urúei nan, barújumaña ñájoun, áfaragua jumáña jilágubei nigíbugiñe.”

Lebélurun Jesúsu Jerusaléoun

(Mt. 21.1-11, Mr. 11.1-11, Jn. 12.12-19)

²⁸Lárigiñe laríñaguni Jesúsu cátei le, ába lasígiruni luweíyasun Jerusaléoun jáu lánigu, ligía jabá jabá. ²⁹Dan le chúlü mémeeli lídoun

buri fulásu le Betfajé lúma Betánia, yaráfa lun wúbü le gíribei Olívos, ³⁰ába laríñagun joun biáma jádaangiñe láni disípulugu.

—Jefba lídan liraíuraü fulásu le wagíbugiñebei, dánme le jachúlürün ñi, jadáriruba ában burígü güráñu le maweinrúngili. Jafáragadeíme, ábame janúgüni ñájoun. ³¹Ánjaün álügüdúwa ca lan uágu jafáragadei, jaríñagame luágu busén láani Jabúreme.

³²Ába jóúdin, ába jadáriruni ítara quei laríñaguni Jesúsu joun. ³³Dánti le añája lubeí afáragadei burígü, ába jálügüdüniña labúriña, jaríñaga joun.

—¿Ca uágu jafáragadei burígü le?

³⁴Ába jóunabuniña.

—Ladüga busén láani Wabúreme.

³⁵Ábati janúgüni lun Jesúsu, ába jíchugunun janáangun lanágawagun burígü, ába jawéinragüdüni Jesúsu luágun. ³⁶Quei awáansereina lan Jesúsu, átulejeina jamóun janáangun luágu úma lubá. ³⁷Dan le jayárafadun lun larárirún wúbü le Olívos, ába jagúmeserun sun lánigu Jesúsu ja afálarubalin agúaraja láu ugúndani lúma adímureja luágu luweírigun Búngiu, luágu buri miláguru le jaríjibei. ³⁸Jaríñaga.

—¡Biníwati urúei le ñúbinbei lídan líri Wabúreme Búngiu! ¡Níjein ñurúguau siélu, lúma uweírigu lun Búngiu!

³⁹Ábati jaríñagun fariséogu ja ñíbaña jádan gürígia lun.

—Maésturu, aríñagabá joun bánigu lun jámanichun.

⁴⁰Laríñaga Jesúsu joun.

—Nináriün jáu luágu ánjaña lan ámanichaja ja, lagúarajaba lán buri dúbü nuágu.

⁴¹Dan le layárafadun lun Jerusalén, dan le laríjini ubúru gu ligía, ába layájuaan jawágu lílana fulásu ligía, laríñaga.

⁴²—¡Lun jamúga gunfaráanda jumáni ugúñe luágu áu lan úmabei lun ñurúguau jun, buíti jamúga! Májatün. ⁴³Ligía lachúlürüba lubeí wéyu buri wuríbati jun, jadúgame jáganiñu ában baríeru geyégua láu jubúrugute lun siñá lan jáfuridun ñígiñe, ábame jageíndagun júma lídaangiñe sun oúbai. ⁴⁴Jagúnrinchagubei jufúlasun le gumúti, mígirunbaña ni ában dúbü ligíbuagu dúbü, jáfarúaba sun jugúya, ladüga mebéresen jumá láu óra le liábinbei Búngiu asálbaraün.

Larúmadagüdünun Jesúsu témpulu

(Mt. 21.12-17, Mr. 11.15-19, Jn. 2.13-22)

⁴⁵Ábati lebélorun Jesúsu témpulurugun, ába laságaruniña ja alúgurajabaña jáma ja agáñijabaña ñi. ⁴⁶Laríñaga joun.

—Laríñajare tídan Lerérun Búngiu. “Núban, fulásu le ñí lubei gayára lan jayúmuragun gürígia nun”, ánjein jugúya, barújumaaru quei jában jíwerutiña.

⁴⁷Ságü buri wéyu larúfudajan Jesúsu témpulurugu, añájati jábutigu jafádirigun juríu jáma arúfudajatiña lilúrudun Moisés, jáma gíñe lábutigu fulásu áluaja ída lúba lan jáfaruni jilágubei, ⁴⁸madáritiña ída lúba lan

jadúgüni ladúga weíri lan jóurabajóuniwa sun güirigia lun jagáambuni lerérün.

Lirícha Jesúsu témpulurugu
(Mt. 21.23-27, Mr. 11.27-33)

20 ¹Luágu ában wéyu, dan le témpuluruguñein lubei Jesúsu arúfudaja joun güirigia, apúrichijeí ugánu luáguti asálbaruni, ligía jayábin jábutigu jafádirigun juríu, jáma arúfudajatiña lilúrudun Moisés, jáma wügúriña weirigutiña lídan jaffínen juríu, ²ába jaríñagun lun.

—Aríñagabeí woun ca lan biríchabei lun badúgüni cátei le. ¿Ca íchugubalin ubáfu le bun?

³Ábati laríñagun Jesúsu joun.

—Nálügüdádün gíñe ában cátei, oúnaba jumána. ⁴¿Ca oúnajabalin Juan abásteragüdaja? ¿Loúnajan Búngiu ódi jóúnajan wügúriña?

⁵Ába jagúmeserun aríñaga jámagua.

—¿Cába waríñaga? Ánjawa aríñaga luágu loúnajan lan Búngiu, laríñagame woun ca lan uágu mafñínerun wabeí lun. ⁶Ánjawa aríñaga luágu jóúnajan lan wügúriña, jachámuraguba güirigia dúbü wawágun, ladúga choúru jamúti luágu proféta lán meja Juan.

⁷Ábati jaríñagun luágu ibídiñe lan joun ca lán meja oúnajabalin Juan abásteragüdaja. ⁸Ábati laríñagun Jesúsu joun.

—Maríñagun nubeí gíñe jun ca lan áu ubáfu nadúgei buri cátei le.

Jémpulu jawáguti ñadágimeintiña wuríbatíña
(Mt. 21.33-44, Mr. 12.1-11)

⁹Ába lagúmeserun Jesúsu adímureja joun güirigia, ába labájüdagun ában úraga le gíbebei laníchigu, joun. Niján úraga ligía.

—Ñíñein meja ában wügúri ábunaguti beíbei lichárirugu, lárigiñe, ába lájayajani lichári joun ñadágimeintiña, ába lídin lídoun ámu fulásu luágu sarágu dan. ¹⁰Dan le lachúlürün lidáani alúbajani, ába loúnajan ában lumúsun anúgei lufánran, ába jabúleiseiruni ñadágimeintiña músu ligía, ába jóúnajani lárigoún, míchugunga ni cáta lun. ¹¹Ábayati loúnajan ábanya músu, ába gíñe janábuni, buléisei jameí, oúnaja jameí, míchugunga ni cáta lun.

¹²Ábaya loúnajan ábanya, ábaya gíñe jabúleiseiruni, ába jabúguni ñígiñe.

¹³Ába laríñagun labúreme íchári lúnguarügü. “¿Cábasán funa nadúga? Noúnajaali niraú le jínsiñebeí nun, dánme le jaríjini, fágua inébebei joun.” Ába loúnajani. ¹⁴Dan le jaríjinalin, ába jaríñagun jámagua. “Niján le lúnbei lerésibiruni alágan, wáfaraali jilágubei, wagía lámuga labúriña sun cátei.” ¹⁵Ábati jaságaruni lídaangiñe fulásu ligía, ába jáfaruni jilágubei.

Ábati lálügüdajan Jesúsu, laríñaga.

—¿Cábatí ladúga labúreme íchári? ¹⁶Liábinme, ábame láfaraguniña ñadágimeintiña jagía jilágubei, ábame líchuguni íchári joun ámu.

Dan le jagáambunbalin cátei le, ába jaríñagun.

—¡Masúsereda lámuga ítara!

¹⁷Ába laríñaguniña Jesúsu, ába laríñagun joun.

—¿Cáti lílabei le bürúñubei tídan Lerérun Búngiu le ní lubei laríñaga.

Lé meja dúbü le mabúseerun jabeí ábunagutiña,
ligíaaali furúmiñeti?

¹⁸Furúmieguaügü le achúgeraguti luágu dúbü ligía lagúnrinchaguba,
léti uágunti láburuja, labúrechagúbei. Au dúbü ligía.

Luáguti liseínsuna gumádi

(Mt. 21.45-46, 22.15-22, Mr. 12.12-17)

¹⁹Lídan meme óra ligía, ába jálugun jábutigu jafádirigun juríu jáma arúfudajatiña lilúrudun Moisés járügüdüni Jesúsu, ladúga jasúbudiruni luágu jawáguti lan jémpulu le laríñagubei, madúgün jamúti ladúga janúfude jawéi gürígia. Ábati jagúrabajan ámu dan. ²⁰Ábati jóúnajan gürígia ja ásügürütiña jóungua camá jamuga jarúmatiña lun jaríaaiani Jesúsu, lun jaríñagagüdüni cátei le gawáguti gayára lan jíchugun lidúnrun lun jedéregeruni lun gumádimati. ²¹Ligía jálügüdünbalin, jaríñaga lun.

—Maésturu, subúdi wamúti luágu richá lan le baríñagubei lúma gíñe le barúfudajabei, manúfudetibu gíñe lueí ni ában, ladúga ni cáta lan luweírigun gürígia bun, áni láu inárüni barúfudajei lémeri Búngiu. ²²Aríñagabá ában cátei woun. ¿bufti lun lafáyeijóun seínsu lun warúeite César ódi mabuídunti?

²³Ába lasúbudiruni Jesúsu luríban jarítagun, ába laríñagun joun.

—¿Ca uágu jabúseera jíchugun sádara nubá? ²⁴Arúfuda jumá ában lídaangiñe seínsu ligía nun. ¿Cá iyáwa lúma íri le bürúñubei luágu?

Jaríñaga lun.

—Láni César.

²⁵Ábati laríñagun joun.

—Le láni César rújumei lun César, le láni Búngiu rújumei lun Búngiu.

²⁶Siñá jamútiti áburugüda tídoun jasáðaran láu lé buri laríñagubei jagíbugiñe gürígia, weírirügüti janígi láu loúnabagüle joun. Ába jámanichun.

Álügüdajani lübúgürü ásaaruni lídaangiñe óuweni

(Mt. 22.23-33, Mr. 12.18-27)

²⁷Lárigiñe, ába jóúdin saduséogu aríjei Jesúsu. Jaríñajare saduséogu luágu másaarunbaña lan jíláaña lídaangiñe óuweni lúnya jabágaridun. Ábati jaríñagun lun Jesúsu.

²⁸—Maésturu, laríñajare Moisés woun tídan lílíburun, luágu ánjein lan óuwe ában wügúri, ába lígírunun lúmari marájüñüga ligía táu, lúnti lan lamárieidun lamúlen túma lun garájüñü lan táu, gadúgawagun lámuga líbugaña le óuwebei. ²⁹Wel, níñanu mejáti sédü wügúriña gamúlenuguátiña, ába lamárieidun le furúmiñeti, ába loúnwen marájüñüga. ³⁰Ába lamárieidun

le jabáman túma buga lúmari íbugañai, ába gíñe loúnwen marájüñüga.

³¹Ábati lamárieidun le júriwan túma, chülú lúmoun le jasédün, jilágu meme jagía, marájüñüga táu. ³²Ába gíñe toúnwen wúri tugúya. ³³Aríñagabá ában cátei woun. dánmeti le jásaarun lídaangiñe oúweni lúnya jabágaridun, çcábatí úmari wúri to jádaangiñe, quei maríei tubeí jáma sédügubei?

³⁴Ába laríñagun Jesúsu joun.

—Lídan uboú le, maríetiña wügüríña jáma wüiríña, ³⁵ánjein lídaanme dan le lúnbei liábin, úabei agámariduni siélu jádan ja garíchabaña lun ásaaruni lídaangiñe oúweni lúma lun jebélurun siélun agánawa ñi lun sun dan. Magámaridubaña ñi, míchaajan jamáñame jarájüñü lun maríei, ³⁶ladúga moúnwendügüyaaña güirígia siélu, ítaraañame quei ánjeligu, lirájüñü jañáme Búngiu ja saráaña lídaangiñe oúweni. ³⁷Moisés guánarügü arúfuda lumúti luágu njein lan ásaaruni lídaangiñe oúweni lídan le labúrrijanbei luágu búbugati geméti. Laríñajare ñi luágu Búngiu lan Lubúngiutebei Abrahám, Isáac lúma Jacób. ³⁸Láu dimúrei ligía, arúfuda lumúti Moisés luágu wínwangiña lan Abrahám, Isáac lúma Jacób, láu sun jilá lan jágubu, ladúga máma Jabúngiute jiláaña Búngiu, Jabúngiute ja wínwangiñabaña. Wínwangiña lanúgüniña Búngiu sun güirígia.

³⁹Ábati jaríñagun arúfudajatiña lilúrudun Moisés.

—Buíti baríñaguni, Maésturu.

⁴⁰Ába málügüdagun jamáali lan.

¿Ladúgawagunsan Davíd Crístu?

(Mt. 22.41-46, Mr. 12.35-37)

⁴¹Ába laríñagun Jesúsu joun.

—¿Ída liñásan jaríñagunbei luágu ladúgawagun lan Davíd Crístu?

⁴²Laríñajare Davíd guánarügü tídan líburu to gíriboun Sálmos.

Aríñagati Búngiu lun Nabúreme. “Ñurúba lueígiñe noúnwenren,

⁴³daríme níchuguniña báganiñu bújaburugun.”

⁴⁴¿Ída lubáti ladúgawagun lan Davíd Crístu, áni aríñagati Davíd guánarügü lun Crístu “Nabúreme”?

Ladárirun Jesúsu jadúnrun arúfudajatiña lilúrudun Moisés

(Mt. 23.1-36, Mr. 12.38-40, Lc. 11.37-54)

⁴⁵Ñíñanu sarágu güirígia agáambajei Jesúsu, ába jagáambun laríñagun joun láni disípulugu.

⁴⁶—Toúnigigua jumá júngua jaweí arúfudajatiña lilúrudun Moisés, ganígitiña jeíbugun táu anáanguni durúrutu, busén jagía lun labúsurún joun láu inébesei úmadarugu, áluaja jameí ubáraü le jabára weírigutiña tídan ligílisi, lúma lubuídun-ágei ubáraü lídan eígini. ⁴⁷Gidá jamutu gíñe jában wüiríña ja jiláaña úmari jaweí, lúnti jadáuragun láu, ába jadúgün furíeigi migínaguti. Weíribei jasúfurirun luágu sun le jadúgubei.

Seínsu le tichugubei ában fugiábu wúri témpulurugu
(Mr. 12.41-44)

21 ¹Ába laríjin Jesúsu jíchaajan rísitiña seínsu tídoun buri gáfu to lágei seínsu témpulurugu, ²aríja lumúti gíne tichugun ában wúri jíláali túmari, gudémetu, bián gáwanün tídoun gáfu. ³Ába laríñagun Jesúsu. —Ninárün jáu luágu gíbetima lan tichugun fugiábu wúri to sùgú jáu sùngubei, ladúga sun jagía, lídaangiñe le ígiragubei jáma jíhiga, ⁴ánjoun tugúya, láu tugúdemegun tichigei sun le túmabei lún yebe tawínwandun.

Laríñagun Jesúsu luágu tagúnrinchawagúba lan témpulu
(Mt. 24.1-2, Mr. 13.1-2)

⁵Jadímurejaña fiú gürígia tuágu témpulu, luágu tubuídunmeraü láu lubuídun buri tidúburi lúma buri cátei le jíchugubei gürígia lun tawéndedun. Ábati laríñagun Jesúsu.

⁶—Lachúlürüba wéyu lun lagúnrinchawagún sun le jaríagubei tuágu témpulu to guetó, merédebei ni ában dúbü ligíbuagu dúbü.

Seíni buri lubá lagúmuchun ubou
(Mt. 24.3-28, Mr. 13.3-23)

⁷Ábati jálügüdüni, jaríñaga lun.

—Maésturu, ¿ídamé san lasúseredá buri cátei le? ¿Cábasan seíni waríja luágu dánjali lan lun lasúseredun?

⁸Ába laríñagun Jesúsu.

—Toúnigi jumá, mayeedúa jumá. Jayábinba sarágu aríñageina luágu áu lan jagía, jaríñagame. “Áu Crístubei”, “Niján dan ligía.” Mafíñera jumá joun, mafálara jumáña. ⁹Dánme le jagáambun ladímurejoún luágu awúribujani lúma jawágu gürígia agárabagua luágun jarúeite, manúfudedagua jumá, lasúsereduba le furúmiñe, mámagilíme lagúmuchun ubou líra.

¹⁰Ába lasígirun aríñaga joun.

—Lageíndaguba ában fulásu lúma ában, awúribuja ligíame ában ageíraü lúma ámu. ¹¹Ñíbei óunwenbun buri jarabaganáli, ilámaü, sándi, lídan ámuñegueinarügü fulásu, larijúba buri cátei janúfunati siélu lúma óunwenbun buri seíni.

¹²Lubáragiñe lasúseredun sun le, jarújouba, eíbaajoua jugúyame. Janügúba agúsera tídan jalígílin juríu, jádarawagúba furísunrugun, barúwa jugúyame jagíbugiñoún urúeigu jáma gumádimatiña, nueígiñe, lun jagúseragüdüün, ¹³ligíame jidáani lun jadímurejan luágu nufúleisein. ¹⁴Aráanse jumeí jarítangun lun madíjeri jumá cába lan jaríñaga jueígiñegua, ¹⁵níchuguba dimúrei lúma lichú áu jun le lásiñerun ni ában jádaangiñe jáganiñu asgenera ni óunaba. ¹⁶Jalúgurubadün jagúbürigu guánarügü, jíbugañanu, jamúlenu, jidújeñu, jumádagu. Jáfarúba jídaangiñe, ¹⁷jiyéreeguduba joun sun gürígia, nueígiñe.

¹⁸Lídaanme sun líra, latoúnigirubadün Búngiu le gumúti, ¹⁹áni ánjaün meme derégüdagua lídan jaffínen nuágu, jibíjibei ibágari magúmuchaditi.

²⁰Dánme jaríjin geyégua jamá lan súaara ubúruugu Jerusalén, subúdi jumeí luágu yaráfaali lan lagúnrinchagun ubúruugu ligía. ²¹Jámeti gürígia ja Judéabaña, lúnti janúrajan luágun buri wúbü, ja ubúrugubaña Jerusalén, lúnti jáfuridun nígiñe, ja áraabubaña, magíribuda jamá ubúrugun. ²²Luwéyuri buríbei jafáyeirun gürígia luágu wuríbati le jadúgübei, dánme le lagúnfulirún sun le bürúwañubei tídan Lerérún Búngiu. ²³jFugiábugume würiña ja dageñnatiña lídan dan ligía, o ja lan garájüñütiña ja gurágiña! Ladúga ñfbei sarágu igárigu uboúagu, larúfudubei Búngiu luweírin ligáñi luágu jafígoun gürígia ja juríu. ²⁴Ñíbaña oúwegutiña wuríburugu, jíbiri janáawaguba adáurawagua lídoun ámu ageíraü, ábame jagúnrinchaguni ja mámabaña juríu ubúruugu Jerusalén daríme lagúmuchun dan le íchugübei joun lun jadúgüni.

Ligáburi ída lúba lan liábin Crístu
(Mt. 24.29-35, 42-44, Mr. 13.24-37)

²⁵Lasáliragubáti buri seíni luágu wéyu, luágu játi lúma jawágu warúguma, ábame laweíridun janígi néchaanigu uboúagu, ábame janúfudedagun luágu lanárime lajúujan lúma laboúnjan lugúdi barána. ²⁶Ladágaruba falálaü jawágu gürígia láu anúfudei, láu jasáminarun luágu cátei le lúnbei lasúseredun, ladúga járugüdüba lan warúguma ámu úma. ²⁷Ábamei larijín niábin, áu le Wügúri Garaúwarügüti, lídan juánriñu láu sun nubáfu lúma oúnwenbun nuweírigun. ²⁸Dánme le lagúmeserún buri cátei le asúsereda, ragújuma dúgüdaguaü, iñúra jumeíme jichügü, ladúga madíseelime jasálbarun.

²⁹Rúlumuti gíñe jémpulu le joun.

—Aríja jumoún tídíbu ígo, o furúmieguarügü tídíbu wéwe. ³⁰Dan le jaríjin laboúchun tubána, subúdi jumúti luágu yaráfaali lan lidáani lubáchouga. ³¹Dánme gíñe le jaríjini lasúseredun buri cátei le, subúdi jumeí luágu madíseeli lan lidáani Búngiu lun larúeijan.

³²Nínárün jáu luágu lagúnrinchawagúba lan sun ubúruugu le Jerusalén lubáragiñe jóúwegun gürígia ja lánina dan le.

³³Lagúmuchaguba siélu lúma uboú, ánjein nerérún, ladúraruba lun sun dan.

³⁴Tóunigi jumá, mígira jumá lun tabuínchun janígi láu cátei málati quei sarágu afúuduni, bacháruaü, lúma buri idíjeri luágu buri cátei lánina ibágari le, márügüdün lámugaün wéyu nagíribudagüle uboúagun lídan magáradajan jumá, ³⁵quei ában sádara to adárurutu. Ladúga ítara lúba liábin wéyu ligía jawágun sun ja aganoúbaña lídan sun fulásu ya uboúagu. ³⁶Aráanseñu jumá lubeíti, ayúmuragua jumá lun Búngiu sun dan, gayára lámuga jibíjin ubáfu lun jawánduni sún buri cátei le lúnbei lasúseredun, lun gíñe gayáraabei lan jarúfudagun júngua nigíbugiñe táu tarúman anígi.

³⁷Ábaja larúfudajan Jesúsu témpulurugu wéyuagua, árieibu, ábaja lídin erédera luágu wúbü le Olívos. ³⁸Ábaja chülúgiñe jamá güriquia témpulurugun ságü bináafin lun jagáambuni.

Jelédegun áganiñu lubá Jesúsu

(Mt. 26.1-5, 14-16, Mr. 14.1-2, 10-11, Jn. 11.45-53)

22 ¹Yaráfaali fédu le lidáani teigíniwa fein to magánatu ísi, fédu le jarítaguagüle juríu luágu meja dan le lástigürünbei lání Búngiu ánjeli áfaraguaña jígirama Ejíptona, máfaragun lumútiña jígirama Israélitagu. ²Ábati jáluajan jafádirigun juríu jáma arúfudajatiña lilúrudun Moisés ída lúba lan jáfaruni Jesúsu jilágubei, ibidiñounga joun güriquia, ladúga janúfude jawei. ³Ábati lagáñeiruni Máfia larítangun Júdas Iscarióte, le ában jádaangiñe lání Jesúsu dúusu apóstolugu, ⁴ába lídin adúga darádu jáma jábutigu jafádiriñegu juríu jáma jábutigu tisúdaarana témpulu lun ledéregeruni Jesúsu joun. ⁵Ába jagúndaaragun, ába jaríñagun lun Júdas luágu jíchuguba lan seínsu lun, ⁶ába lañúurun darádu, ába lagúmeserun áluaja ída lúba lan gayára lan ledéregeruni joun dánme le úa jamá güriquia.

Lagúmujoún leigin Jesúsu jáma lánigu

(Mt. 26.17-29, Mr. 14.12-25, Jn. 13.21-30, 1 Co. 11.23-26)

⁷Ába lachúlürün fédu le ídaanbei teigúa fein magánatu ísi, ñí lubei giñe ladágarawagüdúwa mudún le lánina fédu. ⁸Ába laríñagun Jesúsu lun Pédro lúma Juan.

—Jeíba aráanserei eígini le lánina fédu.

⁹Ába jálügüdüni.

—¿Jalíagi babúseera waráanseruni?

¹⁰Laríñaga joun.

—Dánme le jebélurun ubúrugun, jadúnraguba lúma ában wügüri táu ában dináa láu dúna, jafálareime chülú tídoun muna to ñjín lumúti lebélera.

¹¹Jaríñagame lun tabúreme muna. “Laríñajare Maésturu. ¿Jigóun rúmu to ñí lubei gayára lan neígini eígini le lánina fédu jáu nání disípulugu?” ¹²Ábame larúfudun ában rúmu weírítu jun toúgiñegua muna, aráanseñu tíña, jaráansereime eígini ñí.

¹³Ába joúdin, ába jadáriruni sun cátei quei laríñaguni Jesúsu joun, ába jaráanseruni eígini lánina fédu ñí.

¹⁴Dan le lachúlürünbei óra, ába lañúurun Jesúsu jáu lání disípulugu luágu dábula, ¹⁵ábati laríñagun joun.

—¡Oúnwenbun nabúseerun neígini eígini lánina fédu le júma lubáragiñe nouñwen! ¹⁶Ladúga naríñajare jun luágu meígindügüya náali lan eígini lánina fédu le daríme lagúnfulirún laníchigu lídan larúeijan Búngiu.

¹⁷Ábati lanúgün ában wéru táu diweín lújaburugu, ába leteíngiruni Búngiu, laríñaga.

—Barújumei le, fánreingua jumeí jídaangua, ¹⁸naríñajare jun luágu mátundügyaadina lan diweín daríme liábin larúeijan Búngiu.

¹⁹Lárigiñe, ába lanúgünun fein lújaburugu, ába leteíngiruni Búngiu tuágu, ába lagúbachagunun, ába líchugunun joun, aríñageina.

—Núgubu le, le lúnbei ledéregerún juágu. Lúmagiñe guetó, adúga jumeí le, jarítaguagüleme nuágu.

²⁰Ítara meme gíñe, lárigiñe jeígin, ába lanúgüni wéru táu diweín, ába laríñagun.

—Niján níta le lúnbei láwiyurun lídaangiñe núgubu juágu, lun lañúurun iséri darádu.

²¹‘Niján wügüri le lúnbei ledéregerunina wáma ya luágu dábula,

²²luáguñadina úma le lúnbei nanúgüni, áu le Wügüri Garaúwarügüti, áni ¡fugiábutia wügüri le lúnbei lalúgurunina!

²³Ábati jagúmeserun álügüdagua jídaangua cába lánfuna alúgurei.

Ladímurejoún luágu cába lan weírigutima

²⁴Ába jasígenejan lánigu luágu cába lan jídaangiñe weírigutimá. ²⁵Ába laríñagun Jesúsu joun.

—Lídan arúeijani lánina uboú le, agúmadijatiña já buri lurúeitena fulásu, camá jamuga labúreme jagía, já buri lábutigu fulásu, aríñawagúati jawágu luágu wügüriña jamá ja gadúgatiña fuleísei joun güriá. ²⁶Ánjein lídan narúeijan, mítaraanti, lubáragiñe líra, le weírigutimaabei le tímátimaati jídan kúnti lanáangun lúngua quei le únabutimaabei, le agúmadijabei, kúnti ítara lan quei le esériwijabei. ²⁷¿Cági weírigutimaabei, le añúurubei eíga luágu dábula, ódi le esériwijabei? ¿Ma le añúurubei luágu dábula? Áni áu, ítara níña jídan quei le esériwijabei.

²⁸‘Jugúya úarabañája núma lídan noúchawagun, ²⁹ligía níchugunbadün lun jarúeijan quei líchugunina Núguchi lun narúeijan. ³⁰Jeígiba, gurá jugúyame luágu nidábulan yágüta siélu lídan narúeijan, ñurú jugúyame luágu buri lála urúei lun jagúseragüdüniña jadúgawagun dúusu lirájüñü Isráel.

Laríñaguni Jesúsu luágu leyéedaguba lan Pédro láu

(Mt. 26.31-35, Mr. 14.27-31, Jn. 13.36-38)

³¹Aríñagati gíñe Wabúreme Jesúsu.

—Simón, Simón, amúriajaali Máfia úma lúma Búngiu lun gayáraabei lan louchagunün quei lawánijoún türígu, ³²ibíja lumúti, áni ayúmuraguaadina buágu lun Búngiu lun meféridirun báani bafíñen nuágu lídaanme óra ligía. Áni dánme le bagíribudun nun, rúba dúgüdaguaü joun bíbirigu.

³³Laríñaga Simón lun.

—Nabúreme, aráansetina lun nídin búma furísunrugun, o lun lan nouñwen búma.

³⁴Laríñaga Jesúsu lun.

—Pédro, ugúñe méme, beyéedaguba náu úrüwa weíyaasu lubáragiñe layúgurujaan gáyu, baríñaguba luágu ibídiñe nan bun.

Layárafadun lórate oúchawaguni

³⁵Ábati laríñagun Jesúsu joun.

—Dan le nouñajanbalün maságüteiga, ni láu lágei seínsu, ni geídi, ¿níñein funági jemégeirun?

Ába jaríñagun.

—Uá Maésturu, memégeiruntiwa ni cáta.

³⁶Ábati laríñagun joun.

—Ánjeinti guetó, le gaságüteti, barúloun, barú ligáme lágei seínsu, le mefeínteti, alúguraloún labíte lun lagáñijan lefeínte, ladúga wuríbati dan le. ³⁷Naríñajare jun luágu lagúnfuliruba lan le taríñagubei Lerérun Búngiu nuágu. “Ába jabájüdüni jádan wuríbatíña.” Sun le бүрүүwañubei nuágu lagúnfuliruña guetó.

³⁸Ábati jaríñagun.

—Wabúreme, nuján bián efeín ya.

Ába laríñagun joun.

—Buíti.

Layúmuragun Jesúsu Getsemaní

(Mt. 26.36-46, Mr. 14.32-42)

³⁹Ábati láfuridun Jesúsu, ába lídin luágun wúbü le Olívos quei ligáburiñaja, ába jóúdin láni disípulugu lúma. ⁴⁰Dan le jachúlürün lídan fulásu ligía, ába laríñagun joun.

—Jayúmuragua, meféridirun jumámugei jafíñen nuágu.

⁴¹Ába ladísedun Jesúsu jaweí murúsunraü, ába lájuduragun ayúmuragua lun Búngiu, ⁴²laríñaga.

—Núguchi, áñjabu busén, séfu bána lueí oúnwenbun asúfuriruni le lúnbei nasúfurirun, madügúwalá le nabúseerubei, le la babúseerubei adügúwa.

⁴³Ábati liábin ában áñjeli siélugiñe lun líchugun érei lun. ⁴⁴Dan létima laweíridun ligárigu, ligíatima layúmuragun láu érei, lédedejati lísüga lueí camá jamuga oúnwenbun lédedejan jítaü, múarugun.

⁴⁵Dan le lásaarun lídaangiñe layúmuragun, ába ladáriruniña disípulugu arúmuga, larúmagüdüni íruni. ⁴⁶Ábati laríñagun joun.

—¿Ca uágu jarúmuga? Sarájuma, jayúmuragua, meféridirun jumámugei jafíñen nuágu.

Janúgüni Jesúsu adáüra

(Mt. 26.47-56, Mr. 14.43-50, Jn. 18.2-11)

⁴⁷Ñígili Jesúsu adímureja, ligía jayábin sarágu gürígia, Júdas, le ában jádaangiñe dúusu disípulugu, jabá jabá. Aba layárafadun lun Jesúsu lun lachúuruni. ⁴⁸Ábati laríñagun Jesúsu lun.

—Júdas, ¿láu ában chúuti balúgurana, áu le Wügúri Garaúwarügüti?

49 Játí lúmabaña Jesúsu, dan le jaríjinbalin cába lan asúsereda, ába jaríñagun lun.

—Wabúreme, ¿ageíndagua wamáña táu efeín?

50 Ába lánchuguni ában jádaangiñe lánigu Jesúsu larígei lumúsun fádiri íñutimaati, le loúnwenren. 51 Ába laríñagun Jesúsu.

—Ígira jumáña, buídurügaali.

Ábati lagúruruni Jesúsu larígei músu ligía, ába lareídagun. 52 Ába laríñagun joun jábutigu fádirigu, joun wügúriña weírigutiña lídan jaffínen juríu, lúma joun jábutigu tisúdaarana témpulu, ja ñúbinbaña anúgei.

—¿Jiábin nuágu táu efeín lúma wéwe camá jamuga jíwerutina? 53 Dan lé meja júma nan témpulurugu ságü wéyu, magúrugubeitün nuágu, wel, niján jidáani lun jadügüni jugúndan náu, óraali lun lagúmadijan le labúremebei lubúriga.

Laríñagun Pédro luágu ibídiñe lan Jesúsu lun

(Mt. 26.57-58, 69-75, Mr. 14.53-54, 66-72, Jn. 18.12-18, 25-27)

54 Ábati járügüdüni Jesúsu, ába janúgüni lúbiñoun fádiri le íñutimaabei, ábati lafálaruni Pédro dísegiñe. 55 Ába jáfuragun wátu ñi lamídaangua baríeru, ába jañúurun geyégu láu, ába gíñe lañúurun Pédro jádan. 56 Quefti taríjini ában músu ñun larúgürügü wátu, ába teréderun aríaguei, ába taríñagun.

—Lúmañein buga gíñe Jesúsu gürígia le.

57 Ába leyéedagun Pédro, laríñaga.

—Ibídiñeti wügúri ligía nun.

58 Murúsun luegiñe, ábaya laríjini ában, ába laríñagun.

—Jánigu gíñe amúrü.

Ába laríñagun Pédro.

—Máma jánigu áu.

59 Queí buri ában óra lárigiñe, ábaya laríñagun ában.

—Inárüni luágu lúmañajañein lan wügúri le ladúga Galiléana gíñe.

60 Ábati laríñagun Pédro.

—Ibídiñeti nun ca lan uágu badímureja.

Lídan meme óra ligía, dan le nijángua lan Pédro adímureja, ába layúgurujan ában gáyu. 61 Ába ladígiragun Wabúreme Jesúsu aríja luágun Pédro, ába larítangun Pédro luágu lé buga laríñagubei Jesúsu lun. “Lubáragiñe layúgurujan gáyu ugúñe, beyéedaguba náu úrüwa weíyaasu.” 62 Ábati láfuridun Pédro, ába layájun láu igárigu.

Jéjerajan láu Jesúsu

(Mt. 26.67-68, Mr. 14.65)

63 Ja wügúriña ja oúnigirubalin Jesúsu, ába jéjerajan láu, bei jameí.

64 Ába jagúraguni lágu, ába jagáyuaian ligíbuagun, aríñageina jagía.

—¡Bugúya le profétabei, aríñagabeígia ca lan agáyuajabei buágu!
 65 Ába buri jaríñagun sarágu ámu cátei anábei.

Jesúsu ligíbugiñe líñun-ágei lúrudu
 (Mt. 26.59-66, Mr. 14.55-64, Jn. 18.19-24)

66 Dan le larúgadunbei, ába joúndaragun wügúriña weírigutiña lídan jafíñen juríu, jábutigu jafádirigun juríu, jáma arúfudajatiña lilúrudun Moisés, ába janúgüni Jesúsu ligíbugiñoún jadámurin le líñun-ágei lúrudu. Ába jaríñagun lun ñi.

67 —Aríñagabeí woun, ¿amúrüsan Crístubei le lúnbei lasálbaruniña gürígia? Ába laríñagun joun.

—Ánja aríñaga jun luágu ánja lan, mafíñebadün nun, 68 ánjaün nálügüdagua, moúnabun jubádina, mígiragüdün jumáname. 69 Nariñaga ában cátei jun. lúmagiñe guetó, nañúuruba, áu le Wügúri Garaúwarügüti, lueígiñe loúnwenren Búngiu le Súnti Gabáfuti.

70 Ábati jálügüdüni súnigubei.

—¿Amúrü lubeíti Liraúbei Búngiu?

Ába laríñagun Jesúsu joun.

—Ánja, áu, quei jaríñaguni jugúya guánarügü.

71 Ábati jaríñagun.

—Mabúseerunjadiwa geféen jamá ámu woun, agáamba wamáali lídaangiñe guánarügü liyúma.

Jesúsu ligíbugiñe Piláto
 (Mt. 27.1-2, 11-14, Mr. 15.1-5, Jn. 18.28-38)

23 1 Ábati jásaarun sun líñun-ágei lúrudu, ába janúgüni Jesúsu ligíbugiñoun Piláto, 2 ába jagúmeserun íchiga lidúnrun, jaríñaga.

—Darí wamaali wügúri le achágaraguágüdaña gürígia, laríñajare luágu moun lan lun wafáyeijan seínsu lun urúei Rómata, aríñagati gíñe luágu ligía lan Crístubei le lanúadirubei Búngiu lun lasálbaruniña gürígia, aríñaga ligía luágu urúei lan ligía.

3 Ábati laríñagun Piláto lun.

—¿Amúrüsan Jarúeitebei Juríu?

Laríñaga Jesúsu lun.

—Ánja, ítara líña quei baríñaguni.

4 Ábati laríñagun Piláto joun jábutigu fádirigu lúma joun jíbiri gürígia.

—Madáritina dúru luágu wügúri le.

5 Ábatima jaríñagun jére.

—Lachágaraguágüdüñanu sun gürígia Judéana láu ligáburi larúfudajan, lagúmesera Galiléagiñe, niján mémegua adúgei chülú ñájoun.

Jesúsu ligíbugiñe Heródes

⁶Dan le lagáambunbalin Piláto cátei le, ába lálügüdajan ánjein Galiléana lubeí wügúri ligía. ⁷Dánti le jaríñagun lun luágu Galiléana lan, ába loúnajani lun Heródes, le gumándan Galiléa, ladúga ñíñein Heródes Jerusalén lídan dan ligía. ⁸Ába lagúndaaragun Heródes dan le laríjini Jesúsu, ladúga agáambañajaali lan luágu áni lúja labúseerun laríjini, agúrabatiti laríjin ladúgün ában miláguru. ⁹Ába lálügüdaguni luágu sarágu cátei, moúnabunti Jesúsu ni cáta. ¹⁰Ñíñanu jábutigu fádirigu jáma arúfudajatiña lilúrudun Moisés, magúmuti jíchugun lidúnrun. ¹¹Ábati loúseruni Heródes jáu lisúdaaranigu quei ni cáta, éjeraja jagía láu. Ábati jadáüraguagüdüni táu anáanguni wédegutu quei lanáangun urúei, ábaya loúnajani Heródes lun Piláto. ¹²Wéyu ligía, ába gamádagua lan Heródes lúma Piláto, lubáragiñe líra, gáganiguañajatiña.

Lasíadirúniwa Jesúsu lun loúnwen (Mt. 27.15-26, Mr. 15.6-15, Jn. 18.39-19.16)

¹³Ábati loúndaruniña Piláto jábutigu fádirigu jáma lúrudugu, jáma buri ámu güriña, ¹⁴ába laríñagun joun.

—Jugúya anügübalin wügúri le nun, jaríñaga luágu chagáguagüda lániña güriña, álügüdagua náali jigíbugiñe, áni aríja jumúti luágu madári nan ni murúsun dúru luágu lídaangiñe le jaríñagubei luágu.

¹⁵Madáriti gíñe Heródes lidúnrun, giríbugüdalá woun. Aríja jumáli luágu madúgün lan ni cáta le lúnti lafarún jilágubei lueígiñe,

¹⁶nabeíchagüdali lubeíti, lárigiñeme, ábame nígiragüdüni.

¹⁷Gagáburititi Piláto lúnja lígiragüdün ában adaürúti fédurugu, ¹⁸ába jagúarajan súngubei lídan ában.

—¡Áfarabéi le! ¡Ígiragüdabéi Barabási!

¹⁹Barabási ligía, ladaürúña lueígiñe ligía lan ában jádaangiñe ja inúragubaña jóungua luágu gumádi, lúma lueígiñe láfarajan. ²⁰Busénti yebe Piláto lígiragüdüni Jesúsu, ábaya ladímurejan joun, ²¹ligíatima jagúaragun.

—¡Dáguabéi luágu gurúwa! ¡Dáguabéi luágu gurúwa!

²²Ába laríñagun Piláto joun luágu lúrüwan weíyaasu.

—¿Cáti wuríbati ladúgübei? Madáritina ni cáta le lúnti lafarún jilágubei lueígiñe. Nabeíchagüdali, ábame nígiragüdüni.

²³Ábatima jagúarajan lun ládarawagún luágu gurúwa, jéretiti jagúarajan jagía jáma jábutigu fádirigu, ába jabíjini le jabúseerubei.

²⁴Ábagubeíti ladúgüni Piláto le jabúseerubei, ²⁵ábati lígiragüdüni wügúri le jabúseerubei, le adaürúbei lueígiñe inúraguni lúma áfarajani, ábati ledéregeruni Jesúsu joun lun jadúgüni jagúndan láu.

Ládarawagún Jesúsu luágu gurúwa
(Mt. 27.32-44, Mr. 15.21-32, Jn. 19.17-27)

²⁶Dan le joúdiña lan láu Jesúsu lun ládarawagún luágu gurúwa, ába járügüdün ában wügúri Cirénena gíriti Simón, liábiña áraabugíne, ába janúgagüdüni gurúwa lun, ába lídin láu lárigi lárigi Jesúsu.

²⁷Sarágu jána gürígia afálaruti jáma sarágu würiña jádan ayájuajeina, agúarajeina láu íruni luágu. ²⁸Ába ladígiragun Jesúsu jawágun, ába laríñagun joun.

—Würiña Jerusalénna, mayájua jumá nuágu, jayájua juoúgua lúma jawágu jirájüñü, ²⁹ladúga liábinba buri wéyu dánme le laríñawagún. “Fuleiseiwatiña ja siñábei jagáraüdüni jáma gíne ja marájüñüjañábaña, jáma ja mátagüðajanbaña.” ³⁰Ábamei jaríñagun gürígia lun wúbü íñuti. “Áburujabá wawágun”, aríñaga jagíame lun wúbü únabuti. “Darúguabá wáu.” ³¹Ladúga ánjein adúgajabalín sun le láu tíðibu wéwe le dúðügili, ¿cábagi madúgün jamá láu le mábeijali? (Ítara líña ladímurejan luóúgua, le madúnrunbei, lúma jawágu ja gadúnrunbaña.)

³²Barútiña gíne biáma gadúnruntiña lun jafarún úara lúma Jesúsu. ³³Dan le jachúlürünbei lídoun fulásu le gíribei Lufúlasun Lábu Ichügü, ába jádaraguni Jesúsu luágu gurúwa jáma gíne biáma wuríbatíña jagía, ában lueígiñe loúnwenren, ában lueígiñe lubáúna. ³⁴Dánti le añája lan ádaraguei Jesúsu luágu gurúwa, ába laríñagun.

—Núguchi, ferúduna báña ladúga ibíðineti joun ca lan jadúgübei.

Ába jájurerun súaara ubúnuruni lun jaríjin cába lan un jádaangiñe terédera lanáangun Jesúsu. ³⁵Níñanu gürígia aríagua, níñanu gíne lúrudugu jéjerajaña láu, jaríñaga.

—Sálbati ámu, sálbagonalá gíñeti lúngua, ánjein inárüni lubeí luágu ligía lan Crístubei le lanúadirubei Búngiu lun lasálbaruniña gürígia.

³⁶Éjerajatiña gíne súaara láu, láu jayárafadun íchiga tagúbüri diweín lun lun látunun, ³⁷jaríñaga buri lun.

—Ánjein Jarúeite bubeí juríu, sálbaguabá búngua.

³⁸Níñeinti ában abúrújóuni loúgiñe lichügü, laríñajare ñi. “Niján Jarúeite Juríu.”

³⁹Ába lanábuni ában jádaangiñe wuríbatíña ja dáwagubaña luágu gurúwa ñi Jesúsu, laríñaga.

—Ánjein bugúya lubeí Crístubei, sálbaguabá búngua, sálba báwame.

⁴⁰Ába ladeñjan le ában lun loúba, laríñaga lun.

—¿Manúfudetibusan lueí Búngiu, bugúya le lábugiñebei ában meme sáfuri lúma? ⁴¹Wagía, garíchatíwa lun wasúfurirun ladúga wafáyeijaña luágu wadúga, ánjeinti wügúri le, madúgünti ni cáta wuríbatí.

⁴²Ábati laríñagun.

—Jesúsu, barítaguame nuágu dánme le lagúmeserun barúeijan.

⁴³Larínaga Jesúsu lun.

—Nináriün báu luágu númabadibu lan siélu, ugúñe méme.

Loúnwen Jesúsu

(Mt. 27.45-56, Mr. 15.33-41, Jn. 19.28-30)

⁴⁴Amídirugu, ába labúrigadun sun fulásu darí ladaúnrüin úrüwa rábounwéyu. ⁴⁵Ába labúrigadun wéyu, ába tajeíridagun tubélun témpulu tamídan túmagua. ⁴⁶Ábati lagúaragun Jesúsu ítara.

—Núguchi, deréga numútu nuwáni bújaburugun.

Quei larínagun ítara, ába loúnwen.

⁴⁷Dan le laríjinbalin jábuti súdeara Rómana le asúseredubei, ába ladímurejan weírigu luágu Búngiu, larínaga.

—Ináruni, madúnrunti buga wügúri le.

⁴⁸Sun gürígia ja níbaña, ja aríjubalin le asúseredubei, ába jóúdin nígiñe, áfarajeina jameí janíguagu, le jagárigu. ⁴⁹Ánjaña sun lumádagu Jesúsu jáma giñe würiña ja núbínbaña úara lúma Galiléagiñe, ába jeréderun díse aríjei buri cátei le.

Labunún Jesúsu

(Mt. 27.57-61, Mr. 15.42-47, Jn. 19.38-42)

⁵⁰Níñein ában wügúri gíríti José, lídaangiñeti fulásu le gíríbei Arimatéa, le jafúlasun juríu. Buíti ligáburi wügúri ligía, richáguati ligíbugiñe Búngiu, lídaañein líñun-ágei lúrudu le jáni juríu. ⁵¹Agúrabañu líñein larúeijan Búngiu, magúndaanti lubeíti láu cátei le ladúgübei líñun-ágei lúrudu láu Jesúsu. ⁵²Ábati lídin lúmoun Piláto, ába lamúriajani lúgubu Jesúsu lúma. ⁵³Lárigiñe laráriragüdüni lueígiñe gurúwa, ába loúburaguni táu ában gamísa, ába lácharuni lídoun ában umúajaü achigíti luágu ában dúbü le ní lubei úagili lan ni ában abunúti. ⁵⁴Wáandaradi wéyu ligía, luwéyuri aráansejani lubá luwéyuri eméraaguni joun juríu, áni agúñeeli gumése.

⁵⁵Ába jafálaruni würiña já meja núbínbaña lúma Jesúsu Galiléagiñe José, aríja jameí umúajaü, aríja jameí buídu ída líña lan líchugún lúgubu Jesúsu lídoun umúajaü. ⁵⁶Dan le jagríbudunbei jábiñoun, ába jaráanseruni ibíñei buri le íchugúbei jawágu jiláaña, ábati jeméraagun lídan wéyu le eméraaguagülei quei larínaguni lilúrudun Moisés.

Lásaarun Jesúsu lídaangiñe oúweni

(Mt. 28.1-10, Mr. 16.1-8, Jn. 20.1-10)

24

¹Wéyu dimáasu, ába jagríbudun würiña luágun umúajaü, bináafingua, barúina jameí ibíñei le jaráanserubei jámagua.

²Dan le jachúlürünbei, mámaali lídan lubára dúbü le lidaú umúajaü.

³Ába jebélurun lídoun umúajaü ligía, madári jamúti lúgubu Wabúreme Jesúsu ní. ⁴Súnti añája lan ní arítagua jageí lánfuna, ligía jaríjin bián

wügúriña rára jarúgabu táu anáanguni mirítu. ⁵Queíti jélemuchun láu jagíbu únabun, buin láu anúfudei, ába jaríñagun wügúriña jagía joun.

—¿Ca uágu jáluajei le wínwanbei jádan jiláaña? ⁶Úati ya, saráli lídaangiñe oúweni. Jarítagua jumá luágu lé meja laríñagubei jun dan le Galiléañein lán meja, luágu le lúnbei lasúseredun lun, ligía le Wügúri Garaúwarügüti, ⁷luágu ledéregerúaba lan jájaburugun gafígountiña, ábame jádaraguni luágu gurúwa, ábame lásaarun lídaangiñe oúweni luágu lúrwun wéyu.

⁸Ábati jarítagua luágu dimúrei le laríñagubei Jesúsu. ⁹Lárigiñeti jagíribudun umúajaurugúgiñe, ába jabájüdaguni sun cátei le asúseredubei joun únsu apóstolugu lúma joun jíbiri lánigu Jesúsu. ¹⁰Ja anúgübalin ugánu le joun apóstolugu, María Magdaléna, Juána, María to lúguchu Jacóbo, jáma ja jíbiri würiña. ¹¹Dan le jaríñagunbalin buri cátei le joun apóstolugu, ába janúgüni quei lílülün áu, maffíñetiña joun.

¹²Ába láfuridun Pédro, ába lídin eíbaagueina luágun umúajaü, dan le laríjinbei lurágeirugun, gamísa rügúñoun ñi, úaali úgubu. Ába lídin lúbiñoun láu luweírin anígi láu cátei le laríjubei.

Luágu úma lun Emaúsun

(Mr. 16.12-13)

¹³Luágu méme wéyu ligía, jóúdiña bíama jádaangiñe lánigu Jesúsu lídoun ában liraúraü fulásu gíriti Emaús, úrwu óra eíbuguni Jerusaléngiñe, ¹⁴adímurejeina jáña luágu sun cátei lé buri asúseredubei. ¹⁵Súnti adímurejeina jamá, ába layárafadun Jesúsu joun, ába lagúmeserun eíbuga úara jáma. ¹⁶Láu sun aríja jamáni, siñáti jasúbudiruni luágu Jesúsu lan. ¹⁷Ábati laríñagun joun.

—¿Cásan le uágubei jadímureja, sun eíbugeina jumá?

¹⁸Ába jaráramagun láu íruni jagíbuagu, ába louñabun ában jádaangiñe, gíriti Cleofás, ába laríñagun.

—Sun güri-gia subúdi jamúti le asúseredubei Jerusalén lídoun buri wéyu le. ¿Amúrü rügúñein jádaangiñe ja ñíbaña ibídiñejabu lun?

¹⁹Ábati laríñagun joun.

—¿Cági asúseredubei?

Jaríñaga lun.

—Luáguti Jesúsu le Nazarétu, ában meja proféta láu ubáfu luágu le ladúgübei lúma luágu lerérun ligíbugiñe Búngiu lúma jagíbugiñe sun güri-gia. ²⁰Ábati jedéregeruni jábutigu wafádiriñegu jáma walúrudungu lun siádiwa lan lun oúweni lúma lun ládarawagún luágu gurúwa. ²¹Rúwamutí yebe wafíñen luágu ligíaba lan eséfurei linásiñun Israel. Úrwu wéyu guetó lueígiñe lasúseredun cátei le. ²²Láu sun líra, weírigüda jamáali jádaangiñe würiña ja wámabaña wanígi láu jóúdin luágun umúajaü lubá buga larúgan, ²³queíti madári jamáni lúgubu ñi, ába jayábin abájüdagua woun luágu aríja jamá ánjeligu ñi, aríñaga jamá joun

luágu wínwan lan Jesúsu. ²⁴Ába jóudin jádaangiñe wíbirigu aríjei umúajaii, ába jadáriruni ítara quei jaríñaguni wíríña jagía, maríjin jamúti Jesúsu.

²⁵Ábati laríñagun Jesúsu joun.

—¿Louguati gíñe gunfaráanda jumá, lúti gíñe lubá jafíñerun luágu lé meja jaríñagubei profétagu! ²⁶¿Ma funági lúnti meja lasúfuriruni Crístu sun cátei le lubáragiñe lerésibiruni luweírigun?

²⁷Ábati lagúmeserun afúnraanguágüdei sun le taríñagubei Lerérun Búngiu luágu joun, lagúmesera túmangiñe buri lilíburun Moisés túmoun sun jalíburun profétagu.

²⁸Dan le jachúlürün lídoun fulásu le ñíjinbaña lubeí, ába ladúgün Jesúsu camá jamuga lasígiraali leíbugun. ²⁹Ába jéredun luágu lun leréderun jáma, jaríñaga lun.

—Reídeibá wáma, ladúga ladáruduña áni gúñemémeeli.

Ábati lebélorun Jesúsu lun leréderun jáma. ³⁰Dánti le ñurújali jáma luágu dábula, ába lanúgünun fein lújaburugu, ába leteíngiruni Búngiu tuágu, ába lagúbachagunun, ába líchugunun joun. ³¹Lídan óra ligía, ába léfegechun jágu, ába jasúbudiruni luágu Jesúsu lan, ába lagúmuchagun jagíbugiñe. ³²Ábati jaríñagun jámagua.

—¿Ma sandítiwa tásüdün wanígi le wagúndan dan le adímurejeina lubeí woun luágu úma, aríñagaleí tíla Lerérun Búngiu woun?

³³Ábati magúrabajaanjaña lan, ába jártügüdün úma lun jagíribudun ubúrugin Jerusalén le ñí lubei jadáriraña únsu apóstolugu oúndaragu jáma gíñe jíbiri lánigu. ³⁴Ába jaríñagun ja oúndaraguñubaña ñi joun.

—Inárüni luágu saráali lan Wabúreme Jesúsu lídaangiñe ouweni lúnya labágaridun, aríja láali Simón.

³⁵Ábati jabájüdaguni bián wügúriña jagía le asúseredubei joun luágu úma, lúma luágu jasúbudiruni luágu Jesúsu lan dan le lagúbachagúnbarun fein.

Larúfudagun Jesúsu lúngua joun disípulugu

(Mt. 28.16-20, Mr. 16.14-18, Jn. 20.19-23)

³⁶Ñígiña adímureja luágu buri cátei le, ligía lasáliragun Jesúsu jamídaangua, ába labúsurun joun, aríñageina.

—Ñurúguaü jun.

³⁷Ába tájüchürün janígi láu sarágu anúfudei, jarítangun luágu pántu lan jaríjubei. ³⁸Ába laríñagun Jesúsu joun.

—¿Ca uágu tájüchüra janígi? ¿Ca uágu níjein lubeí liloúguan afíñeni le tídan janígi? ³⁹Aríja jumeí nújabu lúma nugúdi, áu méme le. Gurújumana, pántu, mágürügüti, mábu ligía, anáti áu.

⁴⁰Dan laríñaguni líra, ába larúfuduni lújabu lúma lugúdi joun.

⁴¹Queíti mafíñen mémegiña lan ladúga ugúndani lúma luweírin anígi le jawágubei, ába laríñagun Jesúsu joun.

—¿Níjeinsan eígini júma ya?

⁴²Ába jíchugun murúsun úduraü súti lun lúma síruudu, ⁴³ába lanúgüni, ába leígini jagíbugiñe sun jagía. ⁴⁴Lárigiñe, ába laríñagun joun.

—Le asúseredubei nun, ligía lé meja uágubei naríñaga jun dán meja le júmagidina, luágu lagúnfulirúaba lan sun le bürúwañubei nuágu tídan lilíburun Moisés, tídan jalíburun profétagu, lúma tídan líburu to gíriboun Sálmos.

⁴⁵Ábati gunfaráandagüda lánun Lerérun Búngiu joun, ⁴⁶ába laríñagun joun.

—Bürúwañu líña luágu lúnti lan loúnwen Crístu, ába lánme lásaarun lídaangiñe oúweni lúnya labágaridun luágu lúruwan wéyu, ⁴⁷lúnti lan gíñe lapúrichijoún lídan líri joun sun gürígia uboúagu lun jasáansiruni jóuserun lun ferúdunawa lan jafígoun, lagúmeseruña apúrichijani ligía ubúrugugiñe Jerusalén. ⁴⁸Jugúya geféentün luágu buri cátei le. ⁴⁹Noúnajabei Sífiri Sándu, le uágubei laríñaga Núguchi Búngiu jun, ítara líña lubeíti, reídei jumá ya ubúrugun Jerusalén daríme jerésibiruni ubáfu lúmagiñe Búngiu le siélubei.

Lamúdeirun Jesúsu siélun

(Mr. 16.19-20)

⁵⁰Ábati lanúgüniña Jesúsu boúgudín lueí ubúrugun chülú Betánia, ába liñúruni lújabu, ába ln ferúdunawa laabíniruniña. ⁵¹Dánti labíniruniña, ába lamúdeirun jawei, ába lanúgüniwa siélun. ⁵²Lárigiñe jájuduragun lun, ába jagíribudun járigoún ubúrugun Jerusalén, ¡ma jagúndan! ⁵³Súnwandánti témpulurugüñanu lan íchiga uweíriguni lun Búngiu.